

**NATIONAL ASSEMBLY OF
SEYCHELLES**

Wednesday 6th October 2021

The Assembly met at 9.02am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab e bonzour nou piblik ki swiv nou. Nou ava konmans en nouvo lazournen avek *Presentation of Papers*. Madanm Clerk.

MADAM CLERK

Mersi Mr Speaker. Bonzour Mr Speaker, tou bann Manm e tou dimoun a lekout.

S.I. 91 of 2021 Interpretation and General Provisions (Change in Title of Public Office and Public Officer) (Revocation) Notice, 2021

S.I. 92 of 2021 Disaster Risk Management (Appointment of Director General) Order, 2021.

Mersi Mr Speaker.

MR SPEAKER

Mersi Madanm Clerk. E nou ava fer *First Reading Public Bills*.

MADAM CLERK

Mersi Mr Speaker. *This Act may be cited as the Access to Information (Amendment) Act, and shall be read and construed as one with the Access to Information Act 2021, (Act 4 of 2018), which as amended is hereinafter referred to as the principal Act.*

This Act may be cited as the Unemployment Relief Scheme (Repeal) Act, 2021. Mersi Mr Speaker.

MR SPEAKER

Mersi Madanm Clerk. E nou ava konmans lo *Second Reading* avek *Miscellaneous (Repeal of Statutes) Bill, 2021 (Bill No. 44 of 2021)*. Madanm reporter ou ava apel Vis-Prezidan ek son delegasyon. Eski mwan i pa Vis-Prezidan i Minis Marie-Celine Zialor.

Bonzour Mrs Marie-Celine Zilaor Minis pour Lazenés, Spor e Lafanmir. Bonzour osi Mr Clive Roucou Sekreter Prensipal pour Lafanmir e Mrs Amelie Nourrice *Senior Legal Draftsperson* dan lofis *Attorney General*.

Nou konmans avek Mosyon pou *Second Reading* Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour Minis avek ou delegasyon. Bonzour tou mon bann koleg Onorab, e tou dimoun ki pe ekoute dan lakour oubyen ki pe swiv nou lo televizyon.

Mr Speaker anba *Order 69* (2) mon *move* ki *the Miscellaneous (Repeal of Statutes) Bill, 2021* i ganny lir en Dezyenm Fwa. Mersi.

MR SPEAKER

Mersi. Nou ava ganny segonnman pou sa *Bill* Onorab Sandy Arissol.

HON SANDY ARISSOL

Mr Speaker mersi. Bonzour Mr Speaker. Bonzour Minis avek ou delegasyon, tou Manm a lekout e tou dimoun a lekout.

Mr Speaker mon ti ava kontan segonn Mosyon anmennen par Onorab Georges. Mersi.

MR SPEAKER

Mersi. Minis nou ava apel pou prezant *Bill*.

MINISTER MARIE-CELINE ZIALOR

Mersi Mr Speaker. Bonzour Mr Speaker avek ou tim. Bonzour tou bann Manm

Onorab. E bonzour tou bann dimoun ki a lekout.

Mr Speaker en konponan restriktirasyon ki Gouvernman pe fer i enkli degrosi bann Minister, Lazans e bann Konsil pou anmenn plis efikasite.

E enn parmi sa bann desizyon dan Minister Lafanmir, Lazenes e Spor, se pou dizourd Konsey pou bann dimoun aze e Konsey pou bann dimoun dezabilite respektivman e ranplas zot par en divizyon ki tonm anba responsabilite Departman Lafanmir.

Mr Speaker Lalwa pou Konsey Dezabilite 1994 ti kree Konsey Nasyonal pou bann dimoun ki pe viv avek dezabilite, e Lalwa pou Konsey pou bann Dimoun Aze 1997 ti kree Konsey pou bann dimoun aze.

Sa Konsey pou Dezabilite ti annan plizyer fonksyon. Par egzant pou kordin tou aktivite prive oubyen piblik vize ver bann dimoun avek dezabilite. E an kolaborasyon avek bann lorganizasyon piblik ou prive asire ki bann dimoun avek dezabilite i ganny en swen e lasistans nesaser;

Dan promouvwar promot devlop organiz bann servis e programm reabilitasyon e lanplwa pou bann dimoun ki pe

viv avek dezabilite. E sa Konsey ti osi responsab pou administre sa fon pou bann dimoun ki nou kapab dekrir konman otreman kapab.

E sa fon pou sa bann dimoun anba sa Konsey ti ganny fonde an 2018.

Konsey pou Dimoun Aze i ti annan li osi lezot fonksyon par egzantp kordin program, e aktivite bann lorganizasyon piblik e prive ki angaze dan lentere bann dimoun aze. E pou lasistans pou led e swen neser.

E i osi Konsey Gouvernman lo tou bann bezwen vize ver bann dimoun aze.

E an konklizyon sa bann fonksyon i kapab byen fasilman ganny abzorbe par Departman Lafanmir e pou nou kapab enplimant vizyon Minister e vizyon Gouvernman.

Nou lapros se pou anmenn plis lenpak pozitiv pou sa de group dimoun an partikilye, e vwala aköz nou pe vin devan Lasanble ozordi pou dizourd sa de Lalwa. Mersi Mr Speaker.

MR SPEAKER

Mersi Minis. Nou ava ouver lasal pou deba par bann Manm. Onorab Henrie i a konmanse.

HON GERVAIS HENRIE

Mersi Mr Speaker. Bonzour tou dimoun. Mr Speaker mon krwar sa si e i dwatet en konsern pou nou tou la anndan, aköz dabor konman bann Manm Lasanble, nou reprezant dimoun dan kominote bann *constituent* i an gran mazorite i kapab dimoun aze.

Aköz nou popilasyon aktyelman pe vyei. E en kantite nou bann *constituent* i bann dimoun aze, e zot byennet i dwatet nou konsern.

Egalman i annan bann dimoun otreman kapab dan nou kominote. Zot osi zot byennet i dwatet nou konsern. Me lo en baz personnel nou tou nou pou vye en zour, e alor nou bezwen konsernen avek ki mannyer nou byennet pou ete letan nou pou'n ariv sa staz dan nou lavi.

Ou si non, non pa swete me demen bomaten nou tou nou kapab annan en dezabilite. Alor ankor lo en nivo personnel sa size i tous nou.

Donk mon entervansyon ozordi i pou plito demann en kantite kestyon. Aköz mon konsernen avek byennet mon bann *constituent*. Mon konsernen avek mon bann zanmi e fanmir otour mwan ki

dan sa bann sityasyon, ou kapab dan sa sityasyon demen bomaten, apre mwan menm mon personelman.

Donk dabor si nou pou get Konsey pou bann dimoun avek dezabilite, nou dabor mon ava remersye bann dimoun ki'n travay ziska la, pou dan diferan fason ede pou amelyor byennet bann dimoun avek dezabilite egalman bann dimoun aze dan nou pei.

E mon krwar poudir sa Konsey parmi son bann sikse i annan sa *Disabled Trust Fund* ki Minis in koz lo la, in ede anmenn serten amelyorasyon dan lavi bann dimoun ki pe viv avek en dezabilite. E nou konman Lasanble Nasyonal nou'n siport sa aprouve pou sa fon ganny kree e dan Bidze sak lannen e demann bann kestyon pou asire ki i ariv kot bann dimoun ki bezwen.

Egalman Konsey in tradwir Konvansyon Kreol ki'n permet alor bann dimoun konn byen ki zot bann drwa bann keksoz koumsa.

E selman nou kapab fer ankor pli byen. E mon oule ki Minis dan son *summing-up* letan in dir ek nou ki dezorme letan i pou vin anba en divizyon, pou anmenn plis lenpak pozitiv pou sa de group dimoun, mon ti ava kontan i don nou en pe

bann lide kwa ki zot pe mazin met an plas pou rekonfort mon poudir nou konnen egzakteman ki nou pe fer.

Letan mon dir ki nou kapab fer pli byen, mon ti ava kontan vwar poudir dezorme pou nou al delavan, nou fer bann keksoz ki vremen amelyor lavi bann dimoun avek dezabilite dabor mon ava koz lo la.

Par egzanp dan kestyon lanplwa. Gouvernman li menm i bezwen *lead by example*. Mon anvi vwar ki bann dimoun otreman kapab ki annan sa fakilte mantal e osi dan zot fason fizik, ganny en pe loportinite lanplwa par egzanp dan sa divizyon ki pou kree, pou kwa pa nou met en pe sa bann dimoun la anndan.

Parske zot li pli konpran zot ki mars dan sa soulye e zot pou pli kapab fer rann dibyen zot bann dimoun ki zot pe sipoze deservi.

E enn bann keksoz ki mon ava konsernen avek, se ki dezorme i bezwen annan en lapros konmsi i annan en lentere Nasyonal dan sa size bann dimoun *disabled*, akoz ozordi pou sa pti pei i annan tro bokou bann groupman, otizm, dimoun aveg, dimoun ki sourd, *Local Government* in kree bann group dan distrik.

Aprè zot annan en lot lasosyasyon lo nivo Nasyonal ki regroup tousala. Me pou kwa pa nou asiz otour en latab e nou drafte en Polisi Nasyonal ki dan lentere tou dimoun, ki nou tou nou koz menm langaz “*we are on the same page*” parey nou dir an *Anglais*.

E nou bezwen dabor partaz responsabilite vizavi sa bann dimoun e responsabilite ki nou bezwen partaze vizavi zot, se vreman pou promouvwar *independent living* otan posib, pou sa group dimoun. E osi promouvwar bann Lalwa ki asir enklisivite avek *accessibility*.

E mon koleg Onorab Naddy Zialor ki pa la ozordi, souvandfwa i koz lo akoz i ti ganny en fwa en loportinite pou al Leta Ini e laba in vwar sa ki Leta Ini *Disability Act*, ki i pran kont poudir dan lanplwa zot bezwen ganny akse;- akse avek bann batiman par egzantp, so sa i bann keksoz ki mon swete dezormen sa divizyon ki pe kree i *take care of*.

Now kot i konsern bann dimoun aze, Mr Speaker, nou konman en pei, nou en legzanp e nou’n fer en kantite sikse kot ozordi nou bann dimoun pe viv pli lontan.

Akoz konman en Leta, nou’n fer en kantite lenvestisman dan bann servis,

par egzantp Lasante, ki’n permet dimoun viv pli lontan. E bann lezot sipor ki swa lozman, ledikasyon, *planning* familyal tou sa bann keksoz, konbinezon faktor in fer ki nou pe viv pli lontan.

Me sa i pe anmenn en defayans dan sosyete. Parske an menm tan ki nou popilasyon pe vyei, popilasyon ki travay ki kapab kontinyen siport nou popilasyon ki pe vyei, lo lot kot eli i pe desann e nou, nou annan konsern.

Nou annan konsern ki mannyer alors sor bann dimoun aze pou ete a lavenir e enkli mon ler mon ariv sa laz, si mon arive Bondye pitye.

Alor mwan bann kestyon ki mon oule demande otour nouvo plan, se ki par egzantp nou konnen konman en pei nou bezwen rann kont avek kominote enternasyonal partikilyerman i annan bann Konvansyon ki nou *sign to*, ki detanzantan nou al bezwen fer bann rapor.

So dezormen ki mannyer sa pou marse e ki kalite langazman nou pou kontinyen fer.

Ki sa divizyon pou pe fer spesifikman, pou asir byennet? E partikilyerman pou *monitor* byennet bann dimoun dan nou kominote.

E ki kapasite, sa nouvo divizyon pou annan an term resours imen, e finansyel pou kapab siport bann servis avek program.

Ki kalite lankadremman legal ki pou egziste? Anfet bomaten dan mon pe lir konmsi pou mon kapab enform mon lekor en pe otour sa size, i annan pei par egzanp ki i annan bann Lalwa, ki kriminaliz neglizans vizavi dimoun aze.

E ozordi dan nou pei i annan en kantite sa bann lenstans dimoun i pran zot kart ATM donn bal, zot al sers lazan pansyon dimoun aze, zot servi malapropo, pa donn manze, bann keksoz koumsa.

E pou mwan sa i a triste mon en kantite. Nou konnen poudir *Council* letan i ti ganny apwente an Out 2018 dayer sa *Council* ki la son manda ti'n merit fini 2 mwan pase, enn son bann aksan i ti pe met lo *focus* lo bann *Homes for the Elderly*.

E apre osi size *carer*, size *carer* konman en Lasanble nou ava rapel poudir a plizyer repriz. Letan *ASP* in vini nou'n koz ek zot lo pou asir en standar servis;- zot pa bann dimoun ki trair konfyans bann dimoun aze ki zot pe travay dan zot lakour.

So sa i en size ki'n konsern nou en kantite konman

sizyenm Lasanble, e mon krwar i dwatet reste osi en priyorite *focus* pou setyenm Lasanble.

So avek labsans sa *Council* ki mannyer sa bann size aprean i kontinyen ganny regarde?

Nou konnen poudir i annan en *National Policy* ki *on aging*, en dokiman tre enteresan ki mon'n ganny sans lir yer. E la par egzanp mon anvi konnen be ki bann lamannman ki nou pou anmenn ladan. Son lenplimantasyon, ki zistans ou'n arive dan enplimant bann provizyon sa Polisi.

Size dimoun aze, i en size (ki mannyer mon kapab dir sa) i annan en mo ki bann *public servant* zot kontan servi ennler *multisectorial* akoz i tous diferan Departman li, depi Lasante, *Social Affairs*.

So ki mannyer sa divizyon pou asir sa kolizyon dan bann Polisi? Ki mannyer sa pou ganny enplimante? Parski nou bezwen pran kont i kapab annan en pe lafatig parmi bann *public servant* pou enplimant bann program. Administrasyon i nouvo, lantouzyazm mwan mon vwar i la.

Be *how do you drive that process* pou dir ek bann dimoun, sanzman in arive nou

bezwen sanz fason, vwar vin pli inovativ, pli kreativ, *to get the process going. How do you do that?*

Ki mannyer nou redinamiz bann dimoun ki pe *oversee* sa size? Ki mannyer nou pou travay an kolaborasyon avek bann lezot *stakeholders*? Lekel ki pou fer kwa? Kote pou fer? Kan pou fer?

E kestyon ki osi trakas mwan se nou pe anmenn en nouvo striktir. Ki evalyasyon in annan lo *the former structure* pou vwar kwa ki pa'n marse, kwa ki nou kapab anbelir lo la, e kwa ki *we have to do away with*?

So ki nou kapab fer sir poudir nou konnen ki nou pe fer.

Me pli enportan, formil ki nou pe propoze, si in ganny teste kwa son bann vremen bann pwen ki nou konnen poudir pou vremen pou vremen for ladan. Defi i resours imen avek finansyel mon'n tous briyevman taler. E i reste en konsern.

E evidaman Bidze pe vini mwan Novanm, i bann size ki nou pou adrese. Pa reste mwan ankor bokou pwen, me mon krwar pwen ki pli enportan, se lefet ki sanzman in arive. Erezman i la, nou pe viv en sanzman en.

Alor ki mannyer nou pou *empower* e edik popilasyon, poudir ki ou par pou annan pou zwe dan sa prosesis? Ki ou responsabilite ki ou bezwen pran depi yer, pou asire ki ou fanmir ki aze ki ou fanmir ki pe viv avek en dezabilite, ou annan en responsabilite an ver li pou donn Leta en koudmen pou son byennet.

Napa personn antre nou la ki'n dir ki Gouvernman i annan solisyon pou tou problem. Gouvernman i bezwen zwenn nou *halfway* konman en *service provider*, me nou osi nou bezwen annan en responsabilite ver nou lekor, nou pros, nou kominote, nou vilaz, nou distrik, nou pei.

So ki mannyer alor nou pou *empower* e *educate* bann NGO, bann lezot *stakeholders* partikilyerman lekol par egzantp. Eski i pa'n ler pou met dan *school curriculum, caring for the elderly*?

Ki mannyer nou edik nou zanfand pou pran swen avek nou gran paran. Serten nou zenerasyon lepok nou ti kominote ti ankor viv ansanm mon ti reste avek Tann Mannout ek Tann Pti Ser ki ti pran swen avek mwan e mon'n kontan zot tou dilon mon lavi.

Me ozordi depi boner manrmay i kit lakour i al dan

flat e i perdi sa koneksyon. I en realite nou pei alor ki mannyer nou re edik nou dimoun pou pran swen avek lezot ?

E dernyen pwen Mr Speaker, se responsabilite personnel ki nou pe koz bokou lo la. Parski bokou nou, nou pli vye avek - nou pli pre- pli pre avek nou laz retret ki nou ti ete ler nou ti zenn.

So we have to be prepared. Nou *retirement plan*, nou pou mor demen letan nou mor nou kit fardo avek lezot par deryer. Nou lakaz lontan nou'n fer letan nou pou'n vye prezan ki mannyer nou pou ranplas son twa.

I en kantite keksoz ki mwan personnelman letan mon regard otour mwan - akoz mon bann frer i annan ki'n ariv laz sekirite sosyal bann zanmi ki mon vwar dan fason zot pe viv i *worries me* en kantite.

E konman *MNA* souvandfwa letan mon pas dan distrik mon koz ek dimoun, poudir nou bezwen pran konsyan sa bann keksoz.

E sa divizyon i pou bezwen annan en rol ledikasyon. I *empower* pou zot osi kontinyelman reflesi dan sa direksyon. Me otremman mon aksepte sa sanzman ki Minister Lafanmir pe vin avek. Mon pou akonpanyi zot dan sa demars,

parske konman en Manm Lasanble pou parey mon'n dir lo konmansman mon bann *constituent* zot aze, zot bann dimoun ki pe viv avek dezabilite.

Mwan menm mon ouswa mon fanmir demen pou dan sa leta sa sityasyon, donk mon bezwen gard en lizye. E mon demann tou bann lezot Manm Lasanble pou nou gard en lizye lo sa size konsernan dimoun aze, avek dimoun avek dezabilite ;- ki en mannyer nou ava kapab kit sa pei e sa *monde* ki nou, nou pe viv ladan ozordi e meyer landrwa ki nou ti zwenn li yer. Mersi.

MR SPEAKER

Mersi Onorab. Onorab swivan Onorab Uranie.

HON ROCKY URANIE

Mersi Mr Speaker. Bonzour tou dimoun a lekout. Sa size i enteres mwan bokou. Mwan dan mon distrik mon'n ganny sans vwar plizyer dimoun aze, e osi bann dimoun ki annan dezabilite.

E boner sa lannen ti annan en group dezabilite sorti *VTC* ki ti vin La Digue, ki ti vin fer bann aktivite. E mon ti ganny sans enterakte avek zot. E apre environ 3 mwan pase mon ti ganny sans ankor sans

pase al vizit plizyer bann dezabilite, ansanm avek bann dimoun sorti *National Sports Council*. Pou koz ek zot pou gete ki mannyer nou kapab pli byen entegre zot dan lakominote. Fer bann ki ankor kontan reste lakaz sorti.

E pareyman pou bann dimoun aze, mon'n koz avek plizyer e La Digue bann dimoun aze zot kontan pas zot pti sezour al bor lanmer, vwayaze, sorti kot en fanmir al kot en lot, la ek *COVID* nou konnen i en pe difisil.

Bon nou Gouvernman avan ti fer sir ki ti kree en Konsey ki ti kapab *take care*, avek sa de group dimoun aze e bann ki annan dezabilite.

Sa bann Konsey ti fer sir ti endepandan avek Gouvernman parey nou dir dan en serten fason, kot zot ki ti konnen ki mannyer ki vreman bann dimoun aze e osi bann dimoun dezabilite i bezwen.

E la zot ti gid Gouvernman e Konsey Gouvernman petet bann meyer fason pou tret bann dimoun aze ek bann ki annan dezabilite.

Konsey parey mon dir, ti travay endepandan. E nou dimoun aze ti ganny sibvansyonnen par Gouvernman dan plizyer laspe ;- parey tiket avyon, tiket

bis, bato e menm *loan* ti ganny entrodwir kot nou dimoun aze ti kapab pran *loan up to* R100mil e Gouvernman ti abzorb ladan apepre 25poursan sa *loan*.

Bon prezan mon kestyon eski la ler Konsey pou sorti pou al anba Minister, eski sa bann *incentives* ki ti pe ganny donnen i pou ankor la? *Ok?*

E apre Konsey osi ti kapab al rod larzan parey nou dir, e zot ti konn tre byen zot vi ki zot ki ti la avek sa bann dimoun ki meyer fason zot kapab depans sa larzan avek sa bann dimoun.

Me la ler i al anba Minister mon santi konmsi ki Minister konmsi ki pou annan sa kontrol total lo ki mannyer depans larzan. E finalman ou krwar zot pou annan en kontrol menm petet politiz sa de group dimoun la, servi politik avek sa de group dimoun.

E pou mwan sa mon pa pe tro, tro an faver, konpran So akoz mon ti ava kontan konmsi ki politik pa antre dan sa de zafer kot nou dimoun ...

(Interruption)

MR SPEAKER

E bann Manm ava evit en pe komanter *off-mic* silvouple.

HON ROCKY URANIE

... nou dimoun i ganny sans pou epanouir, e si i annan keksoz zot pa kontan, nou dimoun aze pa kontan oubyen nou dezabilite pa kontan, ler ti annan sa Konsey petet zot ti kapab santi zot pli lib, pli lib pou zot *voice out*.

Me la ler ou pran ou pe met anba en Minister, mon pa tro krwar i pou annan sa kantite lendepandans, pou zot kapab *voice out* sa ki zot anvi Mr Speaker.

E apre i annan sa bnn dimoun osi ki ti'n *train* ki travay avek sa de group dimoun. Parey nou ganny dir ki zot pou ganny abzorbe, me selman nou'n vwar osi kot i annan bann landrwa kot avan, kot enn de bann landrwa kot in fer *redundancy*, kot ti dir ou bann dimoun pou ganny abzorbe, apre nou vwar ki sa bann dimoun pa tou ki abzorbe.

Dimoun i ganny fer triyaz, lekel ki pou ganny abzorbe e lekel ki pa pou gannyen. So mwan mon ti ava montan konnen ki lasirans sa bann dimoun ki laba ki ti lo sa bann Konsey pou ganny abzorbe, ki fer sir ki personn pa ganny kir deor. E politik osi pa antre pou kontrol sa de group dimoun.

Akoz Gouvernman avan in fer bokou program, menm parey nou apel sa *inclusion*.

Inclusion in antre menm dan lekol. Menm nou'n vwar kot i annan lekol ki'n ganny fer ki modern, *ok?* Par egzanp ou pou ale ou pou vwar Praslin ki i annan *lift* ki'n ganny mete, ou pou vwar i annan *ramp*. Konmsi ki pe ede fer ki lavi ki sa bann dimoun ki i annan dezabilite i kapab antre, ganny enkli zot osi pa ganny kit deryer.

E nou'n vwar lakaz lozman pou dimoun aze ganny fer, dimoun aze in ganny *carer*, nou ti vwar *carer* larzan ti ganny ogmante par Gouvernman avan, pou montre son langazman ki vreman *care* pou sa bann group dimoun.

So eski zot, zot pou pare prezan ler in tire in met la, pou zot kapab kontinyen sa bann ki ti bon? E osi apre mon ti ava kontan vreman konnen ki vreman zot pe vin avek ki pou diferan konmsi ki pou vreman anmenn sa sanzman, an plis ki sa Gouvernman ti pe fer avek sa de group dimoun?

Pa'n parfe me selman nou'n vwar poudir i annan bokou bon keksoz ki'n ganny fer.

Prezan mon ti oule konnen dan ki laliny, kwa ki zot pe vin avek an plis pou vreman anmenn sanzman dan lavi sa de

group dimoun? mersi Mr Speaker.

MR SPEAKER

Mersi Onorab. Nou ava swiv par Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis avek tim ki avek ou.

Mr Speaker sa ki nou pe diskrit lo la ozordi. I en keksoz vreman, vreman enportan pou lasosyete Seselwa. Annefe mon ti ava kontan *or* mon krwar ti pou an reisi deba si ozordi Onorab Naddy Zialor ki en dimoun ki pe viv avek dezabilite, ki en dimoun ki'n osi servi si mon pa tronpe lo Konsey Dezabilite, ti prezan pou kapab donn en pe son leksperyans.

Share en pe son *knowledge* avek nou lo sa bann size, me malerezman Onorab Zialor Mr Speaker i pa avek nou ozordi.

Me toudmenm mon krwar nou annan ase dimoun dan Lasanble ki kapab debat en pti pe lo sa size. Mon ti ava kontan osi refer atraver ou Mr Speaker lo referans ki Onorab Henrie in fer bomaten lo *quality of life*, lo Sistenm Lasante, lo Sistenm Sosyal ki'n fer ki nou bann

dimoun aze ozordi zot viv bokou plis letan.

Sorry nou bann dimoun an zeneral i viv bokou plis letan. Nou popilasyon i en popilasyon ki'n ganny dekrir konman en Popilasyon ki pe vin pli aze. E mon kontan ki Onorab Henrie in rekonnet bann travay ki nou'n fer, ki Gouvernman oparavan in fer pou fer sir ki byennet pep Seselwa i ganny *taken care of*.

E sa i bann aki sosyal ki tou kou nou pou koz lo la. Tou kou nou konman en Gouvernman oparavan nou'n toultan koz lo bann aki sosyal, e nou'n touzour met sa bann size o premye. E nou touzour parey nou dir nou met nou bann dimoun o sant nou devlopman.

Mr Speaker bomaten letan mon'n ekout Minis, Minis son lentrodiksyon ti vreman bref, i pa'n antre dan gran detay, Minis pa'n dir nou ki pou ki plan parey Onorab Uranie in dir - ki plan ki zot pou annan pou al delavan la ki dezormen Konsey pou sa de Konsey pou bann Dezabilite avek pou bann Dimoun Aze pou nepli egziste.

Mon krwar ti ava bon si nou ganny en pe plis lenformasyon pou nou konnen ki plan ki stratezi *going forward* pou sa de group dan nou

sosyete ki vremen, vremen enportan, de group ki nou bezwen vremen *take care of* zot. E nou pa kapab les zot deryer.

An dizan Mr Speaker. Mon pou zis retourn en pti pe par egzanp lo reform ekonomi Makroekonomik ki ti fer - ki ti konmanse an 2008.

Annefe nou ti vwar en reform striktirel an 2008 ki nou ti fer ansanm avek *IMF* en pti pe parey sa ki pe fer la ozordi, petet en kontinyasyon sa ki Gouvernman ozordi pe fer.

Gouvernman ti revwar lafason ki i ti pe fonksyonnen. Enn bann keksoz fondamantal dan sa reform, sete kot Gouvernman ti retir sa ki nou apel *the non-core services* avek Gouvernman, *the non-core function* avek Gouvernman avek bann Minister.

E lanmenm la kot nou ti vwar bann kreasyon bann lazans dan bann landrwa kot sa antite ti pe donn en servis. Nou ti vwar kreasyon bann Lotorite dan landrwa kot son fonksyon sa antite ti en fonksyon regilatwar e osi *enforcement*, e osi bann Konsey.

Minis in dir taler sa de Konsey ki'n ganny kree menm avan 2008. Me solman sa i ti en kontinyasyon bann diferan keksoz ki Gouvernman ti pe fer

pou amelyor lavi sa bann dimoun.

Mr Speaker Minis in koz lo degrosi Gouvernman, me mwan dan mon fason ki mon get li sa prosedir sa *process* ki ti pe fer ki ti'n konmanse depi 2008, ti osi en *process* degrosi Gouvernman.

E sa ti enn bann seval batay si mon kapab dir parti *SNP* ki ti dan Lopozisyon sa letan. Sete tir pouvwar dan lanmen bann Minister, tir pouvwar dan lanmen bann Minis ki ti kontrol tou keksoz.

E mon krwar atraver sa proses kot nou'n retir bann *non-core*, kot nou'n redwir groser Minister konsantre lo Polisi, bann Departman konsantre lo Polisi, e bann Lazans donn bann servis - parey mon'n eksplike - mon krwar sa ti sete le bi.

E mon krwar dan mon pwennvi pou mon Gouvernman oparavan nou'n *achieve* nou'n nobou *achieve* dan lamazorite ka sa bi kot nou ti anvi fe sir ki servis ki ganny donner atraver Gouvernman, dabor i adres servis piblik. Servis ki nou donn piblik i enn ki a la nivo ki delivre e ki napa politik dan servis piblik.

Parkont Mr Speaker depi lannen pase nou pe vwar en diferan *pattern*, kot dan

mazorite lenstans sa pe ganny sanze.

Kot nouvo Gouvernman LDS ozordi pe plito re santraliz Gouvernman, e pe retir en pe partisipasyon. Par egzanp mon ava donn en legzanp;- par egzanp dan bann kot i annan bann *Board*, souvandfwa lo bann *Board* i annan bann dimoun petet ki sorti avek lekspertiz dan bann sekter ki pa neserman Gouvernman, me dan sekter prive par egzanp.

So konmsi mn vwar li i en fason kot nou pe tir partisipasyon mazorite dan serten ka, kot zot kapab kontribye pou zot anmenn keksoz de nouvo dan sa bann diferan lazans Konsey Lotorite.

Mon'n deza koz lo la Mr Speaker dan mon repons Diskour Bidze, e mon pa mank loportinite sak fwa i annan en *Bill* ouswa en keksoz ki vin de devan nou Lasanble, pou dir ki poudir petet sa direksyon kot nou pe ale la, i en direksyon kot nou pe tir pouvwar, *or* nou pe tir direksyon dan lamazorite e nou pe santraliz li santraliz dan bann Minister, kot Minister i ganny dirize par Minis.

E mon rapel kot bokou fwa Onorab Ferrari ki ozordi i Minis Mr Speaker, i ti koz bokou lo la. Bokou bann *Bill* ki ti vin devan Lasanble sak fwa i vwar Minis

ladan la manman problem, tire Minis, pa oule vwar Minis! Konmsi i pa oule vwar Minis!

Me la ozordi nou pe vwar tou le kontrer. Konmsi eski se letan ti zis en mannev pou blok Gouvernman pou anpes Gouvernman marse, e prezan ozordi ouswa ti linyorans - pa konnen ki pe fer. Prezan ozordi nou vwar en lot keksoz ki zot ti dir zot pe vin anmenn.

Mr Speaker sa i anmenn mwan lo mwan dezyenm pwen. Resours dan Minister, nou konnen poudir ozordi sirtou avek reform nou pe degrosi Minis in dir, nou pe degrosi Gouvernman.

Me ki mannyer nou ganny sa resours pou nou kapab delivre sa servis, sa servis alaoter ki nou anvi delivre pou sa de group vreman, vreman enportan dan nou sosyete. Ki mannyer nou ganny dimoun pou kapab fer sa louvraz.

E pou fer li efektivman pou nou kapab fer sir ki nou pa tourn an aryer. Tou sa bann aki ki'n Onorab Henrie in mansyonnen Mr Speaker atraver ou. Tou sa bann aki.

Tou bann keksoz ki Onorab Rocky Uranie in mansyonnen, bann keksoz ki nou'n fer, *carer*, bann landrwa kot nou'n sibvansyonnn bann dimoun aze. Konmsi nou pa

oule retourn an aryer. Nou anvi bouz delavan, e nou anvi vwar en meyer lavi pou nou bann dimoun aze, ek pou nou bann dimoun ki annan dezabilite.

So ki mannyer Minis i bezwen kapab eksplik nou ankor i vin lo stratezi e striktir. Ki mannyer sa ki pou anmennen ozordi i pou fer nou bouz delavan e i pa pou fer nou - en mo ki mon kontan servi 'regrese.'

Konmsi nou pa pe vwar nou tourn an aryer, kot bann sa bann keksoz ki nou'n benefisye, ki nou'n nobou anmennen, pa tourn an aryer.

En lot pwen ki mon ti ava kontan koz lo la Mr Speaker se enklisivite. Onorab Uranie in koz en pti pe li enklisivite.

Sa ki sa de Konsey ti pe fer, ti pe enkli dimoun dan sa de kategori;- savedir bann dimoun aze, e osi bann dimoun avek dezabilite, lo zot Konsey. Se zot ki konn zot spesifisite.

Se zot ki konnen kan mannyer. Mon pa pe dir ki lezot dimoun pa konnen, me solman i enportan pou ekout zot lavwa. Zot ki pe viv avek sa lavyeyes, zot ki pe viv avek sa dezabilite, e zot ki konnen ki mannyer nou pou fer bann entervansyon pou kapab amelyor zot lavi, *or at least* pou kit zot lo sa nivo

konfor ki ozordi zot pe vwar zot pe zourir.

So ki mannyer nou retourn sa enklisivite? Fer sir ki bann dimoun aze bann dimoun dezabilite zot osi partisip dan bann *decision making*.

En legzanp mon pou donner Mr Speaker. Otour lemonn ozordi zenn pe dir, bokou bann dimoun dan zot laz 40, 50, 60 pe fer desizyon pou zenn san ki zenn li menm i ganny enkli ladan, sa i *worldwide* sa. I annan en mouvman zenn pe anvoy lavwa, zenn pe dir fer enn desid lavenir zenn.

Annefe sa ki ot pe desid lo la pou nou la, zot pa pou la pou *enjoy* zot *or* zot pa pou la pou vwar konsekans. So les nou osi kontribye. Pou nou dir ki mannyer nou oule vwar nou fitir.

Pou mwan sa enpilsivite i mars en pe parey avek bann *disabled* avek bann dimoun aze. So mon krwar i enportan ki nou pa negliz sa bout enklisivite. Mon krwar i enportan ki nou fer sir - nou fer sir Mr Speaker, ki bann dimoun aze ek bann dimoun ki i annan dezabilite, i annan en lavwa kelkonk parla, ki Minister ler i pe fer son bann stratezi son bann Polisi i kapab enkli sa

ladan e ki nou kapab kontinyen bous delavan anmenn keksoz pli meyer pou sa de group dimoun dan nou sosyete.

So avek sa Mr Speaker mon krwar mon ava aret la, e mon ava ekout Minis apre si i annan nesesite pou koz pli tar. Mersi.

MR SPEAKER

Mersi Onorab Cosgrow. Mon ava zis fer remark ki ler nou ti konmanse ti napa bokou Manm ki ti'n lev lanmen, me anmezir deba in ale in annan en bon pe Manm ki'n lev lanmen, alor annou retourn ankor lo vey en pe letan. Limit ki nou koze. Nou ava swiv Onorab Georges.

HON BERNARD GEORGES

Mersi MR Speaker. Mr Speaker sa mon ti anvi pran laparol bomaten prensipalman pou en regre me anmezir ki mon'n ekout bann Manm lapeti pou koze in grandi en pe.

Me avan tou, mon ti ava kontan zis fer en remark. Lasanble depi yer i trankil tou keksoz pe mars byen, nou napa okenn gran lenteripsyon. Mon demann mwan akoz ?

(laughter)

HON BERNARD GEORGES

Depi bomaten mon pe fer sa refleksyon.

Mr Speaker rezon mon ti anvi pran laparol bomaten, sete akoz *the National Council for the Disabled* ti en lide ki ti sorti dan en seminar, ki mon ti partisip ladan, dan bann lannen 1980 kekfwa dan *early* dan bann lannen 1990 akoz nou'n ganny dir ki depi 1994 e in ganny *set-up*.

E sa serte en seri seminar ki ti ganny organize par Zidisyer ek Servis Sosyal. E toulezan ti annan en seminar ki ti apel *Law and Seychelles Policy Seminar*.

E ti annan donk en en lesanz ant bann Ziz ek bann Avoka lo en kote, bann travayer servis sosyal, Minister Sosyal eksetera lo lot kote. E bokou keksoz enteresan ti sorti ladan. Dan sa bann diskisyon. E mon rapel ki kestyon ti ganny demande be si i annan en *National Council for Children?*

I ti annan *NCC* a sa lepok, akoz nou napa bann lezot enn pou *Elderly*, enn pou sa lepok - bann dimoun Otreman Kapab, se nou ti apel zot bann dimoun avek dezabilite, se pou sa rezon ki Gouvernman in sezi sa lide e in konstitye sa *National Council*. Sertenman *National Council for the Disabled*.

E donk la ozordi plizyer lannen pli tar, nou vwar en lide

ki nou ti partisip ladan prensipalman. Mwan dan sa Lasanble e ozordi nou pe vwar demantelman sa lenstitisyon. E mon ti anvi zis presize ki tel parey avan ti napa e en sirkonstans in arive kot ti bezwen, lavi i evolye lavi i dinamik.

E ozordi nou vwar ki nou kapab fer li pli byen, dan en lot fason. Akoz bann sekans otour nou. Bann Manm lot kote latab pa pou oubliye ki nou pe viv *still* dan en kontrent ekonomik ase enportan. E bokou restriktirasyon ki pe arive, pa pe ariv selman par lanvi restriktire, me par nesosite restriktire.

I annan de keksoz ki *guide* lafason ki en ladministrasyon i fer son travay. Enn se son bann legzisans finansye, bezwen travay dan en Bidze. E lot se son persepsyon ki mannyer keksoz i devret devlope.

E donk i pa'n vin en - i pa'n vin avek en gran sirpriz ki ziska prezan sa de Manm Lopozisyon ki'n koze, in anmenn sa *de mantra* ki zot ladministrasyon ti viv lo la;- enn se lasistans, lot se met zonm o sant devlopman.

Sa nou'n tande pandan 43an. E nou pou kontinyen tande e zot pou kontinyen ensiste lo la, malgre ki zot

konsyan ki sa ladministrasyon ki la, i pa zot ladministrasyon. I bezwen fer keksoz dan en diferan fason akoz son bann kontrent Polisi ek son bann kontrent finansye ekonomik ki i pe viv avek.

Lasistans Mr Speaker nou'n koz en kantite lo la. E mon pa anvi antre dan en polemik ozordi. Me mon bezwen mon krwar, i mon devwar pou nou regard ankor en kou sa zafer met dimoun o sant devlopman.

Akoz sa i en parol fasil pou dir. Me larealite Mr Speaker i tre, tre diferan. Mwan mon anvi san parey mon dir antre dan okenn polemik, met detrwa kestyon lo latab pou mon bann koleg lo lot kote latab reflexir lo la.

Pandan dezyenm repiblik sa 12mil ekek dimoun ki'n bezwen kit Sesel pou al viv aletranze, eski sa Gouvernman ti met zot o sant devlopman? Sa bann dimoun ki vin devan *TRNUC* tou le semenn pou koz lo soufrans ki zot in pas ladan, eski zot ti'n ganny met o sant devlopman zot?

Sa 150 morso later ki yer menm nou fek pe koz lo la ki Gouvernman in pran e zanmen servi pandan pros 40an, eski zot propriyeter ti ganny met o sant devlopman zot?

Mr Speaker nou bezwen pa fer en lekivalans parey mon ti dir yer, kot lekivalans pa egziste. E nou pa kapab parey bann kontab i montre nou, regard en *balance sheet* zis lo profi, oubyen lo *incomes* san regard depans.

Lavi i montre nou parey nou pe vwar ozordi ki ou bezwen regard tou le de kote. Ou pa kapab zis pa vwar en kote, regard zis avek en lizye e regard zis sa ki bon, san regard bann kote ki negatif. Akoz sansan ou lavi pou tris.

E sete dan sa konteks alor, ki nou bezwen etidye sa ki pe arive la ozordi dan sa *Bill*, ki pe demann sanz lafason ki nou zer sa de *constituency Elderly* avek *Disabled* parey Lalwa i apel zot.

I annefe e in annan touzour dan lemond, de kalite lapros ;- enn se bef dan disab sakenn vey son lizye, e lot se *cradle-to-grave-assistance*. En pei parey *Hong Kong* par egzanp, ki sa rezim pli kapitalis o *monde* napa okenn servis sosyal. *Zero!*

Si ou aret travay e napa person pou donn ou manze ou mor. Si ou ariv a laz retreat napa en zanfann pou okip ou, ou mor. Oubyen ou bezwen viv lo lasarite legliz oubyen bann *NGO* eksetera.

Epi ou annan lot ekstrenm e sa se en legzanp ki nou okouran se *SPUP /SPPF/Parti Lepep/US* pandan 40 ekek lannen, kot premye keksoz ki arive ler ou ne, zot met R1000 lo ou kont labank e dernyen keksoz ki arive avek ou ler ou mor zot donn ou en serkey - *cradle-to-grave assistance*. *Cradle-to-grave assistance*.

Larealite se ki bann zanmi lo lot kote latab se ki ou pa kapab fer en lekivalans ant sa de. Tou le de i defayan. Ou pa kapab aksepte, en sityasyon parey *Hong Kong* e ou pa kapab akoz i pa pou posib viv anba en sistenm *cradle-to-grave* eternalman, akoz bann sityasyon ekonomik pou fer sir ki ou pa kapab.

Alor dan sa konteks ou bezwen en fason pou ou reponn a bann legzizans bann dimoun aze ek bann dimoun avek dezabilite parey ou fer avek zanfann ek bann lezot dimoun - bann zenn - dan konteks ki ou bezwen viv ladan. Napa lot fason fer.

Alor Mr Speaker mon konpran. Mon konpran ki en keksoz ki'n ganny etabli par en rezim, ler i ganny *dismantle* par en lot i toultan vin avek en serten lanmertim avek en serten kestyon, eski sa se meyer

fason? Nou osi lo sa kote latab nou annan sa kestyon.

Me nou bezwen osi demann nou lekor, eski fason fer bann *Board* ti en bon fason travay? E nou lo sa kote latab, nou okouran ki non sa ti annan bokou defayans, akoz enn fwa ankòr enn fwa ti annan tro.

Vwar Mr Speaker an 2008, ler premye kris ekonomik in tap nou, *IMF* in egzize ki nou *trim civil service*. Sa ti zot premye kondisyon. Akoz *civil service* ti annan tro bokou lagres.

E dimoun in ganny *early redundancy*, *early retirement* eksetera, eksetera. Me kisisa ki nou'n vwar, bokou Lazans in ganny kree lazans pou netway biro, *Cleaning Agency*, Lazans pou rod lanplwa, *Employment Agency*. Tou sord Lazans in ganny fer, netway dan bann kote semen eksetera.

Tousala se bann nouvo Lazans ki'n ganny fer e ozordi nou realize ki - avek respe ki mon annan avek bann dimoun ki travay dan sa bann Lazans - me se pa zot fot neserman, ki sa sete pa en bon model.

E anefè sel keksoz ki nou'n fer olye *trim civil service*, nou'n tir la nou'n met laba e nou'n les li angrese. E donk sa Gouvernman ki'n vin o pouvwar in bezwen fer fas avek sa e regarde kote i kapab *trim* dan

legzisans ekonomik ki nou ladan.

E si nou'n ariv si zot in ariv en desizyon ozordi, ki sa de Lazans - e pou annan lezot nou konnen pou annan lezot e deza in annan ki'n ganny restriktire - pou annan lezot restriktirasyon ki pou arive, annou met nou konfyans ; - annou sertennman demann kestyon i nou rol pou demann kestyon *by all means* fer li.

Me annou met nou konfyans dan sa bann dimoun parey Minis Zialor ki vin isi devan nou ozordi, e ki dir nou ki sa i neser.

E annou konpran ki sa ki pe ganny fer, pa pou neserman annan en defayans lo lafason ki sa de *constituency* - dan lekel mwan menm mwan mon form parti enn, akoz mon osi mon en trwazyenm-az mwan. *National Council for the Elderly* (mon ti sipoze mon ti pou tonm ladan) ki mannyer nou kapab kontinyelman akonpany sa de *constituency*, me fer li dan en lot fason.

E Mr Speaker mwan mon krwar mon pa la pou dikte avek ni Gouvernman ni avek okenn dimoun ki mannyer sa i devret ganny fer.

Me mwan mon krwar senserman ki dan plas en kantite Lazans, sa ki nou

bezwen plis dan sa pei, se en Gouvernman responsab ki pran anba son lezel *polycymaking* pou okenn sa bann *constituency*.

E si i annan nesesite pou sa bann *constituency* parey bann dimoun sourd, pou bann dimoun ki pe viv avek *alzheimer*, oubyen okenn sa bann lezot *mini constituencies*, les bann *NGO* aport sa soutyen. Se sa larealite 2021.

E si bann *NGO* i bezwen lasistans, akoz zot pe fer travay nob en travay ki Gouvernman i vwar i enportan e ki i pa kapab *raise* fon lo li tousel, me ki i pe rann en servis esansyel, les Gouvernman propoz dan Bidze. Les nou aksepte isi ler Bidze i vin devan nou, pou donn zot en lasistans akoz nou pe fer en bon travay. Mon krwar se koumsa ki en pei i zer byen son *Policy* e i zer byen son lekonomi.

E Mr Speaker pou sa rezon avek regre ki mon annan ki *National Council for the Elderly* in sort dan en konteks (eskiz mwan) *National Council Disabled* sorti dan konteks kot mwan mon ti parmi sa bann ki'n kree li, e ki ozordi mwan mon parmi sa bann ki pe *demantle* li, annou aksepte ki larealite i sanze parey mon'n dir lavi i dinamik.

E ki ladministrasyon ki vini toultan i bezwen travay dan byennet son popilasyon dan meyer fason ki i kapab. Alor avek sa detrwa mo Mr Speaker mon ti ava kontan reasir Minis ki i pou ganny mon sipor pou sa *Bill* ozordi. Mon remersye ou.

(APPLAUSE)

MR SPEAKER

Mersi Onorab Georges. Nou ava swiv Onorab Aglae.

HON EGBERT AGLAE

Bonzour Mr Speaker. Mersi. Bonzour Minis ek *PS Roucou*, e lot madanm laba bonzour e tou bann Onorab.

Mr Speaker mon krwar ozordi apre ki mon'n ekout entervenans avan mwan, e mon'n swiv en pe osi bann parkour, bann diskisyon depi ler nouvo ladministrasyon, in vin an fors an mars. I fer mwan per e mon enkyet lo lafason kot Sesel pou ale kot i konsern tret son sitwayen.

I kler pou mwan ki nou annan en latid ki pe vini, bef dan disab, sakenn vey son lizye, si ou kapab naze ou naze, swa ou noye. Si ou fanmir, ou paran i annan ou ava reisi ou ava progrese. E si ou, ou dan mal ou pou reste laba deryer demerd ou. I kler pou mwan.

E bann legzanp ki Onorab Georges atraver Onorab Georges atraver ou Mr Speaker pe donnen e bann pei osi ki'n fer referans avek, i klerman ki i en bann pei ki mon kapab dir bann pei kapitalis. E zot annan bann sistenm liberal parey zot siporte, ki fer ki mwan e Lepep Seselwa si zot in ganny ladministrasyon en bon pe letan pase, mwan mon pa ti pou la anndan pe vin koze. Sa Aglae pa ti pou la.

Mr Speaker mon'n ekout Onorab Henrie atraver ou osi dan son bann son lentervansyon ki in fer, i montre mon poudir li osi i pa kler. I annan dout, ki lentansyon pou retir Konsey? Pour mwan i pa neserman pirman en lentansyon finansyel. E osi *what's the way forward* pou sa de kous vilnerab, nou dimoun vye avek nou dezabilite?

Mr Speaker sa de group dimoun zot de group vilnerab, e i annan en dikton ki dir en sosyete i ganny ziz-e lafason ki i tret son bann dimoun aze.

E pou mwan dimoun aze malgre ki i annan serten personnaz dan *Cabinet* ozordi ki byen dan pozisyon, ki li i dir dan sa menm Lasanble, "akoz ki Gouvernman i bezwen met larzan investir dan bann dimoun ki pe al *pass away*?" Ti

dir la anndan dan sa Lasanble. Mon ava rod *verbatim*, mon ava rode napa problem ek sa.

(Interruption)

MR SPEAKER

Bann Manm aret en pe komanter silvouple.

HON EGBERT AGLAE

(Zot in koze mon'n ekoute... ! E pou mwan Mr Speaker tousala i pe fer mon vwar sa limaz, sa portre, ki pe ganny penn ozordi.

En kote nou dir nou pou *downsize* Gouvernman, restriktire. Lo en lot kote nou pe vwar poudir menm si ou pe sorti ou pe tir en Konsey ki rol en Konsey li menm li, i anmenn en pti pe plis latransparans ;- ki fer ki ou pe tir en *layer* latransparans li menm lo kote pran desizyon ;- etabli bann nouvo Polisi. Ouswa bann kad legal, ou pe anmenn li anba Minister ki fer ki prezan ou pe fer grosi ou Minister prezan ou. Ou pe *fatten* li *up* la.

Mon pa konnen si sa i zot model, reorganizasyon restriktirasyon ki zot, zot krwar ladan.

E nou tou nou konnen bann pei demokratik, bann legzanp ki nou vwar mondyal, i

annan bann diferan kalite Konsey.

E en Konsey i ganny gete koman en landrwa drwat, swa en Departman, swa en lorganizasyon ouswa en Minister, pou tir en pe pwa lour. Pou li kapab osi sa Konsey al pli ver lasosyete ki petet en Gouvernman li pa kapab arive pou al desann *down* laba dan *grassroot*.

Dan en fason i servi sa Konsey li menm li, ki byensir apre bann Konsey i ganny devlope atraver zot anmenn bann *NGOs onboard*, bann lezot ka sivil ki krwar dan sa prensip ki zot pe siporte.

E zot, zot al ver piblik laba ater zot. E zot retransmet bann lenformasyon e zot anmenn pli o lo nivo Egzekitiv.

E sa ki nou pe vwar la parey mon'n koleg in dir Onorab Cosgrow - ozordi Onorab Zilaor, petet i annan ou rezon akoz i pa la. I pa kontan. Akoz i parey en Lanbasader pou bann dezabilite. Mon krwar si i ti vin koze la anndan i ti pou gele.

E pou mwan i regretab ki nou pe al dan sa kalite direksyon. I annan osi bann lenstans, kot bann Konsey i afilye zot lekor avek serten lorganizasyon non-

gouvernmantal onivo enternasyonal.

E nou konnen osi poudir bokou bann organizasyon non-gouvernmantal enternasyonal ki ganny rekonnèt, zot pa tro kontan *deal* direktman avek Gouvernman, akoz zot santi i annan en *layer* politik ki atase avek. E zot retisan.

E i pli fasil pou zot al ver en sosyete non-sivil ki pa neserman dan en lankadremman politik, pou zot al fer bann koz, zot kapab fer bann donasyon, zot kapab vini donn bann sipor teknikal, tousala avek sa bann Konsey osi.

E pou mwan i devret mon poz kestyon la, eski prezan akoz mon konnen poudir i annan sa bann Konsey ki ti annan bann *sort of* parey bann *MOU*, kot zot ganny siporte avek sa bann lorganizasyon non-gouvernmantal, eski sa prezan nou pa pou vwar i pou fini i pou mor?

Akoz i pa neserman sa bann lorganizasyon pou vin direktman avek en Minister, pou zot kapab petet dan en fason transparans fer sa ki zot krwar ladan?

En lot keksoz mon krwar ki Konsey i anmenn bann diferan Konsey, se zot ogmant

bann kapasite pou devlop bann *partnership*.

Zot redwir en pe bann depandans, ki sa bann kad, sa bann dimoun parey dezabilite, parey bann nou bann dimoun aze, ki vin direktman en fardo pou Gouvernman. Me ki zot al ver en Konsey kot zot kapab osi partaz zot bann pwennvi, an menm tan Konsey i donn zot bann sipor, parey nou'n vwar lo nivo distrik dan lepase in arive.

Nou kapab kestyonnen petet nou pou dir parey Onorab Georges atraver ou Mr Speaker. ou'n koz en pe bann benefis lepase ki ti pe ganny donner. Si nou, nou krwar poudir sa bann benefis pa merit pe pase, annou vin fran, dir sa bann benefis mon krwar fodre nou arete.

Annou pa rod diferan rezon ouswa lakoz, pou nou penn sa portre, nou bezwen tir sa akoz sa ti koumsa, sa ti koumsa. I pa li. Annou get *the way forward* si nou anvi bouz delavan. Si nou anvi kree sa sosyete modern kot i konsern sa de groupman.

Akoz pou mwan direksyon ki nou pe ale, i pa neserman en direksyon ki pou donn lespwar sa group - sa de group dimoun.

En lot pwen ankor se ki mannyer sa bann regroupman ki ti deza egziste anba Konsey

pou fonksyonnen? Ki mannyer en dimoun ki tonm dan sa kad pou *reach out* - petet Minis i ava eksplik mon en pti dan son repons - si i pe al kree sa Departman?

Ki mannyer sa Departman pou fonksyonnen? Ki bann diferan lebra, ki pou *reach out* dan en fason desantralize an ver sa de kad groupman?

Mon ti a kontan konnen li menm, eski i pou annan ase mendev pou kapab fer sa travay li menm? Akoz nou vwar dan lepase, bann Minister, bann Departman resours imen in enn bann faktor ki'n anpes servis *delivery*.

Eski nou rod fason pou nou pou zot pa al pri, dan sa serk visye zot osi? Sa i en lot.

E an terminan Mr Speaker, mon krwar en eleman enportan dan sa ki zot pe fer, se k mannyer zot kapab etabli sa *trust*? Kot sa de kous - mon konnen bokou i annan ki pe ekout nou la, sirtou nou bann dimoun *elderly* ki dan lakour, zot pa travay byensir zot in pran zot retreat.

Ki konfyans e *trust* ki ou pou donn zot poudir zot bann byennet, zot bann lekspektasyon li menm - akoz zot in travay pou sa pei, zot in batir, ozordi zot in kouraz in fini e zot annan dernyen pti zour

pou zot viv, pou zot kapab ganny en pti sipor, konfor dan dignite ziska ler zot ferm zot lizye. Sa i enn.

E lot kote, bann paran ki mon konnen ki i annan zanfan ek dezabilite ki annan en latas nob toulezour dan zot lavi. Fodre ou ladan pou ou konpran.

Zot annan en latas enorm pou montre toulezour pou zot kapab okip en zanfan ek dezabilite, eski zot osi parske Gouvernman pe siport zot, atraver Lazans Proteksyon Sosyal, donn nou en garanti poudir sa bann keksoz pou kontinyen?

Ki sa i pa en konmansman pou pran serten bann benefis ki zot pe deza pe gannyen, ki pa ase dan li menm pou siport zot.

Avek sa Mr Speaker, mon pa tro krwar dan sa prensip ki pe ganny met devan, me nouvo ladministrasyon li menm li zot ki pe *run border*, zot annan zot prop fason fer mon respe sa. Me selman mwan mon pa krwar ladan. Mersi.

(APPLAUSE)

MR SPEAKER

Mersi Onorab.

MR SPEAKER

Onorab Gill.

HON CHURCHILL GILL

Mersi Mr Speaker. bonzour Minis ek ou delegasyon. Bonzour tou Manm e tou dimoun a lekout.

Mr Speaker mon ti a voudre ki Minis ler i fe son *summing-up* i donn ou en pe leklersisman lo sa detrwa pwen ki mon pou met devan li.

Premye sa de *Council*, pe ganny *repeal* parey nou tou nou konnen, rezon ki Minis i la. E sa de *Council* zot, zot ti annan zot manda.

E zot manda ti konpri kantite dimoun pou kapab *run* sa de *Council*. Minis in fer nou konpran ki prezan i pou annan en divizyon dan son Minister ki pou *take over* pou sa de *Council*.

Alors Minis eski ou kapab dir nou natirelman i pa pou menm kantite travayer ki ozordi sa de *Council* i annan.

Eski ou kapab fer nou konpran ki menm si kapasite *staff* i pa pou menm kantite, me selman eski i pou garanti ki tou bann kordinasyon ki devret ganny fer avek bann program ki devret ganny fer pou sa de group dimoun, sa pa pou ganny afekte e i pou kontinyen? E sa

de group dimoun pa pou santi zot, zot pe ganny kit deryer.

Aprè bann pou bann sa de group dimoun ki baze Praslin, sa osi si ou kapab dir nou be program pou lo zil ek bann *issues* ki afekte sa bann dimoun ki lo zil, ki mannyer sa pou ganny adrese? Eski zot pou annan en reprezantan ki pou baze Praslin, pou fer li pli fasil pou adres bann problem ki *arise from time to time*?

Aprè ler dimoun bann dimoun aze pe tann nou pe diskite sa bann size, natirelman i pou annan serten krentif, eski Minis dan ou *summing-up* ou kapab donn sa garanti ki tou bann *Home of the Elderly* ozordi, tou pou reste operasyonnel?

E bann ki ti dan *pipeline* ki ti sipoze vini, si sa pou ganny materyalize oubyen si pa pou ganny materyalize?

E dan sa *Council* ozordi, ti annan plizyer Minister ki ti *involve* dan sa *Council*. E la ki i pou baze dan en Minister, eski i pou annan bann koneksyon kordinasyon, avek lezot Minister menm si sa divizyon pou baze dan ou Minister?

Akoz mon mazine sa bann kordinasyon ti pou fer sa bann program oubyen sa bann diferan servis efektiv. Alors si zis ou ava les nou

konnen si sa i pou leka, e si non, ki fason ki sa divizyon pou marse, pou asire ki tou bann program i pou alaoter?

Natirelman avek diferan manda, an term kantite dimoun, nou ekspekte ki pou annan en *budget cut* dan sa divizyon, alors eski ankor servis ki ti pe ganny donner, nou pa pou vwar ki i annan petet en defayans ladan, me plito i pou alaoter pou satisfè sa de group dimoun?

Aprè mon dernyen pwen, Onorab Georges in fer sorti - in fer nou konpran ki nou bezwen pran kont realite ekonomik, ki kler. Nou tou i la ek nou, e an menm tan in fer nou konpran osi ki en administrasyon i fer son bann program dapre son filozofi, ki i santi krwar dan sa letan ozordi. Mon napa problem ek sa.

Me selman sa de group dimoun ki nou pe koz lo la, i de group dimoun, i pou toultan ekout nou. Nou zenerasyon i ava ale lot zenerasyon i a vini, sa de kalite group dimoun pou toultan egziste dan pei.

Alors ti enportan ki menm si nou dan bann diferan sityasyon difisil, mon krwar konman en pei i osi nou responsabilite an ver sa de group dimoun, pou asire ki zot ganny bann servis adekwat ki

zot kapab santi zot konfortab dan zot lavi, menm si zot dan sa de kalite group dimoun. Mersi.

MR SPEAKER

Mersi.

(APPLAUSE)

MR SPEAKER

Mersi Onorab. nou ava swiv Onorab Vidot.

HON AUDREY VIDOT

Mersi Mr Speaker. Bonzour Mr Speaker bonzour Minis ek ou delegasyon, tou Manm Onorab e tou dimoun ki pe swiv nou, espesyalman bonzour bann zabitan Roche Caiman.

Mr Speaker sa rikord reye ki mon koleg Onorab Georges avek mon bann koleg *LDS* i kontan zwe, pou fer rod tou fason pou sey anbet Seselwa ki 43an Parti *United Seychelles* pa'n fer naryen.

E ki nou tou nou'n abitye, nou'n fini konpran e nou'n abitye ki sa i en rikord reye ki nepli annan valer. Akoz Seselwa i konn tre byen ki *United Seychelles* i en parti politik ki'n anmenn pep Seselwa an ver lendepandans ek liberasyon. Atraver en sistenm sipor sosyal ki zis e for.

LDS in koz sanzman. Be dan sa 43an ki *US* in dan Gouvernman, in annan vre sanzman. In bann sanzman ki'n ganny fer avek bokou konsiltasyon. E langazman pep Seselwa.

Mr Speaker, ankor avek tou respe mon annan pou mon bann koleg lo lot kote latav, menm si zot pa kontan ki *United Seychelles* in toultan kler dan son langazman dan devlopman imen, reform ki *United Seychelles* ti fer an 2008, ti enn bann legzanp kler, kot Gouvernman sa letan ti fer bokou miting konsiltativ, avek bi donn lenformasyon e edik son pep avek bann sanzman ki pe anmennen.

Menm si i ti annan bann plan i ti annan son bann stratezi me i ti valoriz kontribisyon bann pwen ki bann piblik ti annan, pou asire ki ler sa reform i ganny fer Seselwa i santi li form parti ladan.

Sa ki nou koz sanzman. Sanzman kot i annan respe, kot piblik ki donn son pwennvi. I donn son nide, pou ki letan pei pe re adres li an term ekonomik, i angaz li ladan.

Malerezman ozordi menm si en parti politik ki sa letan ler nou, nou ti anmenn reform 2008 zot, zot pa ti an faver,

ozordi zot, zot vin avek reform nou konpran sityasyon pei ozordi. Me oli konsiltasyon?

Oli langazman kot sakenn bann endividi i ganny en sans pou li partaz son pwennvi, son lopinyon, e fer li form parti vremen sa reform ki nouvo Gouvernman pe vin avek?

Ozordi devan nou, nou annan en Lalwa ki nou pe retir bann Konsey ki egziste. Mr Speaker mwan mon parkour karyer mon'n fer bokou dan term kominote, e mon'n ganny sans enterakte avek sa bann Konsey lo nivo distrik.

Sa bann Konsey ti en loportinite kot Gouvernman i donn sans bann diferan endividi atraver en striktir, kot zot, zot ti kapab vin en lavwa pou bann diferan groupman.

Bann dimoun avek dezabilite, nou bann dimoun aze. Sa bann dimoun letan Gouvernman i vin enplimant en program, sa bann dimoun i ganny en loportinite pou zot partisipe, donn zot pwennvi.

Si i en keksoz ki pou afekte zot, baze lo bann diferan program zeneral ki sa Gouvernman i anmennen, atraver ki swa son Polisi, ki swa son enplimantasyon son bann gran plan ou stratezi.

Sa bann dimoun ti ganny en sans annan en striktir, kot

zot ti kapab ganny sa group dimoun, pou kapab al koz for pou zot.

Apard ki nou bann Manm Lasanble i anmenn lezot ankor, pou fer sir ki zot ganny otan lavwa ki zot santi zot konfortab, kot politik pa ganny zwe ladan, sa bann dimoun ti kapab vini koze, e partisipe e donn zot lopinyon.

Lopinyon piblik ozordi i enportan. Si nou la ozordi konman bann politisyen, nou annan bann langazman, piblik i met *trust* dan nou. So nou bezwen valoriz zot bann pwennvi e zot bann konsern.

Minis ozordi in vin prezant nou avek sa Lalwa, in bref. Me nou pa'n ganny sans tann li dir nou ki bann *feedback* ki sa bann Konsey in annan lo plan e stratezi sa nouvo Gouvernman.

Ki mannyer zot, zot santi poudir wi sa bann sanzman ki zot pe fer, i annan keksoz ki pou dibyen pou zot, oubyen zot annan serten konsern ki sa bann konsern? Nou, nou anvi konnen nou.

Akoz sa bann dimoun zot reprezant en group dan nou bann kominote. Ki mannyer sa bann dimoun pou santi zot, kote zot pou ale pou zot vwar zot apre zot lavwa i ganny tande? *Ok?*

Nou tou nou konnen poudir menm si ou reprezant en mazorite dan nou distrik, nou tou sakenn endividi i annan son swa son lopinyon, lekel sa endividi ki li i vin koz avek. Se pou sa i annan sa bann Konsey sa bann striktir, kot sa bann dimoun osi i annan sa letan pou zot kapab al kot sa bann endividi koz pou zot, ed zot atraver bann diferan program ki zot kapab organize.

E nou konn tre byen, nou konn tre byen poudir ozordi pe enport lopinyon diferan parti politik lopinyon dimoun. Nou konnen poudir i annan bann endividi ki dan biznes. Ki li i santi li apartenans an term lekel groupman dan bann diferan program ki li i anvi donn son lenvestisman;-

Ki i vwar latransparans, ki son larzan pa ganny vole. Ki son larzan i ganny zer byen, e i annan *trust* dan sa endividi ki pe *lead* sa lorganizasyon oubyen sa groupman, pou li kapab fer sa diferans.

So letan sa bann keksoz pou ganny sa bann sanzman pe ganny fer, konmsi i enportan dimoun i konnen detay. Dimoun la, la deor i anvi konnen ki detay plan sa bann gran, gran plan e striktir ki sa Gouvernman pe vin avek.

Nou tann zis ganny dir, me napa konsiltasyon pou sa bann dimoun konnen e santi, pou zot santi zot lapartenans dan sa bann sanzman.

Se pou sa rezon dimoun pe kritike. Se pou sa rezon dimoun pe *voice out*. Akoz dimoun i anvi vwar zot pwennvi i ganny valorize.

Mwan mon pou dir zot fran, mon pa pe siporte pou retir sa bann striktir, akoz mwan mon'n vwar e mon'n valoriz konman en ansyen *DA*, mon'n valoriz bann pwennvi, bann konsern ki sa bann diferan groupman in anmennen anver Gouvernman, anver Minister.

E Minister menm si i ti annan en program i ti annan son azanda a sa letan, me zot ti valoriz bann konsern e bann pwennvi ki sa bann endividi ti annan atraver dyalog konsiltasyon. Mon rapel byen mon koleg Onorab Georges dan bann deba dan sizenm Lasanble, in koz for lo dyalog.

Be Onorab mon demande si ou Gouvernman atraver zot bann Minister sa bann sanzman ki zot pe fer, kan ki zot in fer dyalog? Kan? Kan ki dimoun sa bann dimoun in ganny sans konnen ki plan e stratezi zot Gouvernman?

Petet si zot ti vini dimoun pa ti ava demann sa kantite kestyon. Dimoun pa ti ava annan lenkyetid. Ozordi dimoun pe viv avek lensertitid, akoz zot napa ase lenformasyon avek gidans lo sa bann sanzman ki pe fer.

Sanzman i annan en responsabilite ki vin avek. Nou konman bann dirizan nou bezwen edik nou pep. Donn zot lenformasyon fer li *feel at ease*, si ou konnen ou pe sanz sa ozordi pou tel rezon.

Dir li ki bout ki li i annan pou li zwe rol ladan. Pa vini zis vini vin fer sanzman fer li, apre zis dir li vini anvale, bour li dan son lagorz dir li anvale, aksepte! Pa koumsa i marse sa!

(Onorab Sandy Arissol ou ava esper ou tour ler ou ava koze)

Nou bezwen serye! Nou bezwen serye dan sa pei. Sanzman i vin ek responsabilite, nou pa kapab zis dir wi-wi-wi koz labous plen! Wi nou'n laglwar pou nou anmenn sanzman. Wi Gouvernman piblik in vot pou met zot la, me prezan me ekout sa bann dimoun. Pa zis akoz in met zot la yer ou ti sant en zistwar, la ozordi ou vini ou vin sant en lot.

Be sa enn ki ou ti zwe yer la, letan ou ti pe rod li pou ou

ganny son vot, ou pa vin, vin donn li en *feedback*? Ou pa vin dir li?

Dir li akoz i ou pe fer tel sanzman. Akoz ki ou pe kennsel sa? Resaman i annan en rankont ki i annan en miting ki'n ganny fer pou bann dimoun avek dezabilite, ti annan en pake *issues*.

Be dan sa bann sanzman ki pe anmennen ozordi la, zot pa lev sa bann *issues*? Zot pa dir ki dimoun pe santi? Pou nou vwar si vreman sa desizyon ki zot Lasanble pe vin pran ozordi, i vreman enn ki zis e *fair* ki dan lentere sa bann dimoun? Nou bezwen serye nou en? Nou konman bann dirizan, nou bezwen serye nou.

Mr Speaker Gouvernman ti annan en rezon avan akoz ki i ti kree sa bann striktir. In annan bokou keksoz pozitiv ki'n ganny arive, me ozordi wi zot anvi fer sanzman sa bann striktir zot anvi fer li vin pli pti.

Be dir nou kwa ki ti mal, kwa ki ti annan problem ki ozordi zot vwar zot, zot bezwen vin devan ki zot bezwen tire, koupe dan sa fason. Se sa ki Kreol i anvi konnen. Se sa ki nou bann dimoun nou bann diferan groupman i anvi konnen.

E i nou responsabilite konman bann dirizan pou nou

edik nou pep. Mon konnen Minis ou'n enn bann dimoun ki krwar dan ledikasyon, ki krwar dan *empower* nou bann dimoun.

Me nou bezwen fer sir ki sa lanvi, sa kapasite ki ou'n toultan pratike i de kour atraver ou Minister e ou bann dimoun i annan sa konsiltasyon avek sa bann dimoun. I enportan sa.

I enportan nou montre nou langazman nou komitman anver sa. Nou pa kapab zis wi dir sanzman, sanzman, Seselwa in vot pou en sanzman, me selman Seselwa pa ganny lenformasyon a tan.

Seselwa pa ganny sa konsiltasyon pou li dir be vwala mon sityasyon ozordi, vwala akoz mon annan sa pwennvi ozordi baze lo sa sanzman ki ou, ou pe anmennen. Ou ti dir mwan sa an gran lir ou pa pe respekte ozordi ou pe fer lekotrer.

Be omwen sa bann sanzman lekotrer ki ou pe fer, vini vin koz ek mwan mon ki ti met ou la. Ou bezwen dir zot. Ou konpran? Ou bezwen dir zot. Mon pa pe koz pou mwan Audrey Vidot mwan, mon pe koz pou sa bann dimoun ki ti elekte zot!

Onorab Woodcock si ou annan ou keksoz pou dir esper

ler ou lanmen i leve, ou ava koze!

Akoz nou bezwen pran nou responsabilite konman bann dirizan. Annou donn sa bann dimoun ganny en sans pou zot *voice out* dir, wi sa bann sanzman ki zot p anmennen, vwala ki mwan konman en sitwayen mon santi.

Prezan ou, ou ava konnen si vreman i en sanzman ki pe ganny fer deswit, oubyen si bezwen ganny prolonze.

Alors mwan mon dir ankor enn fwa, mwan mon pa pou angaz mwan pou mon lev mon lanmen pou mon siporte pou kennsel sa bann striktir, akoz mwan mon toultan krwar dan lendependans, ki sa bann dimoun i lib (Onorab Woodcock esper ou tour) sa bann dimoun i lib.

I lib pou zot koze e ganny en sans pou zot *voice out* kwa ki zot, zot pe santi ozordi atraver reform ki Gouvernman in fini konmans anonse, me ki pa ankor al an detay ki mannyer li i bezwen pran son responsabilite angaz li.

Oubyen i form parti sa sanzman. Koumsa demen i kapab dir be wi, mwan mon form par ladan, mon konnen poudir sa i dan benefis. Petet mon ava donn li en sans pou li kapab fer li byen. Sa i

enportan. So lo sa not mon ava dir ou mersi pou donn mon laparol Mr Speaker.

MR SPEAKER

Mersi.

(APPLAUSE)

MR SPEAKER

Mersi Onorab. Nou ava pran en poz la e nou ava rebran travay avek deba 11er.

(BREAK)

MR SPEAKER

Nou ava kontinyen avek deba bann Onorab sey obzerv limit 10 mint silvouple, pou nou kapab pran sa *Bill in time*. Onorab Sandy Arissol.

HON SANDY ARISSOL

Mersi Mr Speaker. Bonzour Minis avek ou delegasyon. Bonzour tou dimoun ki a lekout. Mr Speaker letan nou koz trwazyenm-az parey Onorab in dir nou koz bann dimoun avek en abilite spesyal, nou tou i konsern nou e nou tou nou annan dan nou distrik, e nou tou nou bann reprezantan zisteman sa bann dimoun.

E konman *Chief Whip* lo nou kote, mon i ava kontan zis dir avek lezot Manm e tou piblik

ki a lekout, poudir Onorab Naddy Zialor pa la ozordi zisteman dan sa deba pou en rezon medikal. So i pa'n sey sov deba okenn fason, me pou rezon medikal alor i pa la.

E mon asire parey bann lezot Manm in dir e Minis osi ki ti pou la si Naddy Zialor ti la zisteman li osi i ti pou kapab fer en pti entervansyon l osa ki nou pe koz lo la.

Be selman sa ki malere avek sa ki nou pe dir ozordi, sa ki mwan mon santi mon, sagrinen Mr Speaker, se letan ou ganny lenpresyon par bann Manm lo lot kote latap, poudir sa *Bill* ki nou pe *repeal* ozordi i vedir ki nou pe pran tou bann trwazyenm-az, oubyen bann dimoun avek en abilite spesyal nou pe met zot dan en *sling* e nou pe al zet zot Dan Goulo La Digue.

I mal! Mon pa dakor! Si nou pe *repeal* sa Lalwa ozordi, zot pe donn lenpresyon deor poudir bann trwazyenm-az pa pou ganny asiste ankor, pa pou ganny son *carer*, i pa pou ganny son benefis ki la. Pa sa !

Fodre nou arete fer sa bann politik senm lafreyer. Fer dimoun per. Donn lenpresyon poudir later pa ou vire, parey zot ti fer parey eleksyon. Si nou vot pou *LDS* tou bann possegonder zot *allowance* pou

ganny koupe;- nou bann trwazyenm-az pa pou ganny sekirite sosyal ankor;- nou pou aras zot *carer*. *Guys* sa bann politik ki'n fini.

Parey Onorab Audrey pe dir nou serye nou, e li ozordi Mr Speaker i vini dan en triko nimer 5 i dir nou serye nou. Be li i bezwen serye li! Parske li byento dimoun Roche Caiman pou fer sa sanzman ki li i pe koz lo la ! I enportan sa. Fodre pa ki nou bliye *ok?*

Letan Onorab Aglae i vini i dir ek nou en Manm dan sa menm Lasanble Nasyonal i zistifye koudeta ki ti pase le Zen '77 ! E sa menm Manm i vini ozordi dan sa menm Lasanble kot i zistifye koudeta, i vini i dir ek nou i *per*.

I *per* selman anba en Gouvernman ki ti fer koudeta i pa ti *per* li! la i per anba en Gouvernman ki'n ganny atraver bwat vote! *Guys* me nou annan en problem. Fodre zot sanz zot *mindset!*

Zot parey bann dimoun en group - zot bann ki'n koze - zot in antre dan stor pa dan stor lagrikiltir dan stor '*The Man*', '*The Myth*' and *The Legend* zot in ganny en bal lagrenn fer per pou zot senmen.

Personn pa pou aste avek zot sa *anymore!* In fini. Vin devan koz larealite, dir dimoun

vreman ki pe pase. Zis parey Onorab Gill in fer. Annou donn Onorab Gill en gro lanmen felisitasyon Onorab Gill.

(APPLAUSE)

HON SANDY ARISSOL

Se sa nou rol konman Manm Lasanble Nasyonal. Pa vin fer politik bonmarse parey nou'n ganny dir.

E letan Onorab Rocky Mr Speaker, i dir ek nou, nou fer politik avek, konmsi fodre pa politik i antre dan a ki nou pe fer, annou pa servi nou bann trwazyenm-az pou politik. Be mon riye.

Lekel Gouvernman ki'n fer plis politik avek nou trwazyenm-az ? Non be sey dir mwan. Be pa Gouvernman *US* ki Onorab Rocky i form par ladan? Letan Gouvernman *US* ti pran trwazyenm-az zot trennen ziska dan baro eleksyon, ler mon i dir mon pou vot pou Msye Ramkalawan, ou ava reste lanmenm ou a demerd ou ! Ou ava rod ou transpor ou ava mont ou menm! Be lekel ki ti fer sa? En?

Letan bann trwazyenm-az toulezan depan kapris Prezidan ki ti la i ganny R50 mon ava donn R100 lannen prosen. Akoz pou zot servi bann trwazyenm-az. Be lekel ki ti

servi trwazyenm-az be pa *US* Gouvernman Onorab Rocky Mr Speaker?

La ozordi i vire i dir ek nou pa fer politik ek bann trwazyenm-az. Be annou tret zot byen. *Guys* nou'n ganny nou pe la ganny lan le 25 Oktob, napa en trwazyenm-az ki'n ganny arase son sekirite sosyal. Napa en trwazyenm-az ki'n ganny arase son *carer*, napa en dimoun avek en abilite spesyal ki'n ganny arase son lasistans ki sipoze gannyen!

Mon kontan letan zot koz lo bann dimoun avek abilite spesyal. Naddy, Onorab Naddy en lepok ti dan zot kan li, zanmen dan okenn moman zot, Gouvernman ki ti annan sa *Bill* ti dir be *ok* annou met Naddy en kou dan Lasanble Nasyonal, zisteman pou li reprezant bann dimoun avek en abilite spesyal. Zanmen zot in fer, *ok*?

Me parkont letan zot annan en Manm pa avek en abilite spesyal, avek en nide diferan, zot fors li par lafnet zot dir li fodre sorti la. *Zot mindset* fodre zot sanze ! Fodre zot bouz delavan. Nou, nou anvi bouze e nou anvi zot vin avek nou. Arete avek sa zafer fer per. Senm lafreyer, donn dimoun en move lenpresyon.

Me annou koz lo keksoz ki bon, annou koz lo keksoz ki vre.

Me mon mazine Mr Speaker si i annan serten sanzman ki Minis pe vin avek, i bezwen annan keksoz ki Minis in vwar. Gouvernman in vwar. *PS* in vwar. Kekfwa zot pa anvi dir nou, be nou konman Manm Lasanble nou, nou konn plizyer keksoz ki'n pase dan nou distrik atraver kominike, laranzman,

Ti annan en delegasyon ti ganny pran par Minis ti al Silhouette bann trwazyenm-az, zot depans manze Mr Speaker ti ariv R75mil. Oule dir mwan 5, 6 trwazyenm-az i kapab manz lavalier R75 mil? Konmsi sa i pa bann keksoz ki nou devret fer dimoun konnen?

Letan nou annan bann aktivite ki ganny fer dan distrik, e nou vwar bann kalite dimoun ki vin lo sa Komite, kantite parti ki ganny fer, kantite keksoz ki ganny aste lo non trwazyenm-az, oubyen bann dimoun avek en abilite spesyal. Be apre ki nou vwar? Ki nou'n vwar nou konman *MNA*?

Pa vwar en parti pe sorti avek gro sak anba son lebra, i pe anmenn pou tantin Fifin? Lot i pe anmenn pou tonton bonnonm? Tousala in pase dan nou distrik. Nou konnen nou!

Me parkont sa ki nou devret adrese. Letan Onorab Audrey i dir 1 ii ti deza *DA*

konman en ansyen DA. I konnen li mon pe koz lo la. I konnen li! I kann tre byen mon pe koz lo la li!

Me selman parkont Mr Speaker, ozordi zot dir ek ou,” non Gouvernman in sanze fodre nou ekout nou dimoun, annou pa zis pran aksyon.”

Selman, selman sa Onorab ki mon kontan li en kantite la, i pe reponn la Mr Speaker, taler mon mansyon son non.

Selman ler konsiltasyon i ganny fer La Digue Onorab Rocky pa asiste Mr Speaker li. i pa ale li. i anvoy en reprezantan. Selman son Manm i vini i dir ek nou “napa konsiltasyon! Fodre zot konsilte!”

Be ler bannla i al Praslin Komite Lafanmir, i zwenn ek bann MNA Praslin konsiltasyon sa. E nou ki reprezant Lepep. Alor konsiltasyon i vin atraver nou. E mwan mon pou siport mon Gouvernman Mr Speaker. ler zot ti fe koudeta ‘77 zot ti demann konsiltasyon zot? Zot ti konsilte lekel zot?

Zot ti konsilte Msye Mancham? Zot ti konsilte lekel?

(Off-mic)

HON SANDY ARISSOL

Anr zot konsilte Onorab Ferrari? Good, ti annan konsiltasyon? Vwar? Zot in pran dan en fason dan en *mindset* ki pa sanze. Nou bezwen bouze, nou’n ariv 2021 alor pei i bezwen bouze.

Parey in ganny dir sa bann vye retorik, sa bann vye polemik, ki SPPF ti zwe ki son Manm in aksepte zot in zwe, person pa’n ekoute, alor pei i bezwen bouze.

Mr Speaker mwan mon krwar poudir i enportan sa ki Minis pe fer, parey Onorab Georges in eksplik byen. E mwan mon ti servi en legzanp kot si en paran i anvoy son zanfan laboutik, pou aste serten konmisyon ler larzan i reste zanfan pa donn bal lo sa larzan reste.

I tournen i dir ek sn manman oubyen son papa la larzan ki’n reste. Sa larzan i kapab ganny servi dan en lot fason pou sanmenm sa lakour. Sa i en keksoz ki Gouvernman SPPF pa ti fer Minis.

Zot al laboutik, ler zot in fini aste tou konmisyon, si i reste en R200 zot donn bal dan sa R200 - zot pa *believe* dan *savings*. Ozordi sa ki Gouvernman pe fer, se ler i

rantre dan lakour i vwar poudir nou annan plizyer stov dan en sel lakaz. Nou annan plizyer *sink*, nou annan plizyer kastrol sakenn pe kwi son manze.

Alor manman oubyen papa i vini i kriy tou son bann zanfan get sa nou pe viv anba en twa, nou en sel fanmir annou rode ki mannyer nou pou kapab fer serten lekonomi dan lakour. Nou ava kwi en sel manze nou ava mize, nou tou ansanm nou ava kapab viv konman en fanmir.

Nou pa kapab dan en menm Minister sakenn pe kwi pou li, sakenn pe anmenn son boutey gas, sakenn pe ouver tiyo, sakenn pe drese. Swa lakaz pou ekspoze, swa pou annan en dife ki pou arive e plizyer nou pou ganny blese. Sa ki Minis pe anmennen anba nouvo Gouvernman nou'n vwar pou dir i annan sa bann plizyer sa bann pti zafer ki egziste la.

Ferm zot anmenn zot anba nou Minister ki nou'n kree, pou ki Minis i av annan plis *oversight*, ki PS i ava kapab konpran ki pe pase, pou nou asire poudir sa ki nou pe delivre avek Lepep ki nou trwazyenm-az ki nou bann dimoun avek abilite spesyal nou ava kapab *oversee* zot byen.

Mr Speaker mon pe dir sa, parske mon anv i ki Minis letan

nou pe fer tou sa bann pti zafer i enportan pou nou asire osi, ki nou bann *Old People Home* pe ganny byen *monitor*. Sa osi i enportan sa.

Kalite dimoun nou pe anvoy laba, lekel dimoun ki pe al administre sa bann *home*, lekel sekirite ki nou mete kot sa bann *home*, e ki kalite aktivite ki pe pase kot sa bann *home*, kot nou bann dimoun aze i ete. Sa osi i enportan sa.

Pa krwar ler nou ferm sa pti brans, nou dir tou dimoun i *ok* dan *homes*, sa osi i enportan pou nou gete. Parske laba Minis i annan en kantite keksoz ki pase.

E letan ou koz ek bann fanmir bann trwazyenm-az, i annan en kantite keksoz ki pase. E nou bezwen aksepte e avoue.

Mon lot pwen Mr Speaker, mon ti ava kontan dir avek Minis, letan nou pe koz lo nou bann trwazyenm-az sirtou i enportan pou nou gete ki kalite program nou annan.

Par egzanp letan en trwazyenm-az in ariv laz 75an, ki arive avek li? Eski ozordi nou annan en statistik konbyen dimoun aze ki par lao 75an Sesel? Ki arive avek sa bann dimoun trwazyenm-az dan distrik? Eski zot ganny en vizit dokter par egzanp? Eski i

ganny sans fer en pti fizyo par egzanp? Oubyen zis letan ou'n ganny 75an tou dimoun i bliy ou nou kit laba, sa i en problemn Gouvernman, zanfan li i al reste *L'Angleterre*, i al reste *Australie*, oubyen i sorti i al reste kot son madanm son msye, e Gouvernman ki bezwen responsab son manman oubyen son papa.

Mon krwar sa i latitud ki nou Gouvernman i pe sey sanze. Parske i nou fanmir. Nou ki bezwen *cater* pou nou vye zis parey li i ti *cater* letan nou, nou ti ankor pti e li i ti bokou pli zenn.

Mon rapel nou ti al en sesyon Mr Speaker avek *Planning Authority* bann distrik lavil ler mon ti *MNA Saint Louis*, en keksoz enteresan ki nou ti ganny dir se tou bann distrik lavil pe vyei, zot pe vyei dan lesans ki *Planning* en lepok pa ti permet ou mont vertikal. E ater napa lespas pou zanfan konstri, oubyen i annan bann sistenm desarz ki pase *STP*, ki konekte nou avek santral sa i fer ki bann zanfan pa kapab azout en bout kot son paran.

Ki i fer prezan, tou bann zenn garson oubyen bann zenn fiy zot al imigre kot zot *boyfriend* oubyen kot zot *girlfriend* dan en lot distrik kot i annan later. Baie Lazare,

Takamaka, Anse Royale. E lavil li i annan zis bann dimoun ki pe vyei. E lavil osi i vyei an menm tan.

Tousala nou ti ganny dir kot *Planning*, so i enportan prezan pou Gouvernman vwar avek Minister Lafanmir, Minister Later *Planning* pou nou re balans tousala pou ki pei i balanse.

Si nou pe al La Digue pou al Dan Goulo, nou pa kapab al dan en *fibreglass* nou tou asize dan en menm kote, nou pou savire. *Fibreglass* i bezwen annan de kote dimoun de kote pou tenir balans ziska ler nou ariv Dan Goulo La Digue kot Onorab Rocky.

Mon krwar tou sa bann zafer i enportan, pou nou balanse, pou nou Gouvernman gete letan nou pe met tou keksoz annord pou nou fer li byen.

Mon trwazyenm e mon dernyen pwen Mr Speaker, mon ti ava kontan koz lo la. se bann lasistans ki nou pe donner.

Mon krwar i enportan ozordi nou bann trwazyenm-az parey Onorab Henrie in dir se pa en Gouvernman ki pey bann trwazyenm-az, se larzan *tax payers money*. Otan ki nou pey *tax*, nou bann dimoun pou kontinyen ganny asiste. Ler

biznes pa pey *tax* pei pa fonksyonnen. Fodre nou arete avek sa zafer, parey zot ti fer lontan,

“Msye Rene i donn ou R100 i dir mwan donn ou sa.”

Fini sa *ok?* Bann dimoun in kontribye, zot zanfan pe travay, zot zanfan i kontribye, alor zot ganny en pti keksoz zot osi letan zot in ariv lo laz.

Be mwan mon krwar i enportan pou nou vwar. Parske en keksoz ki mon’n realize Minis, lo bann dimoun ki otreman kapab, oubyen bann dimoun ki annan en abilite spesyal lontan nou ti apel zot dimoun avek dezabilite, i annan plizyer zot i dan lanplwa, ki mon kontan avek. Plizyer zot i dan lanplwa.

Me parkont letan ou get lalis bann dimoun lasistans *welfare* dan distrik Bel Ombre, i annan plizyer zot ki kapab travay. I napa en abilite spesyal li. I napa en dezabilite li, ou get li i kapab travay.

Be li i pe ganny en lasistans *welfare* tou le mwan. Me parkont sa enn ki i annan en abilite spesyal, li i pe kontribye dan lekonomi pei par fer son bout ki i kapab fer depandan son abilite.

Mon krwar sa osi Gouvernman i bezwen zwenn avek nou Lotorite Distrik, pou

nou pas en kou dan sa bann lalis la, gete lekel sa bann dimoun ki pe ganny asiste pou ki tou dimoun ki bezwen lasistans Sesel i kontinyen gannyen anba nou Gouvernman. Me pas en lagrenn fer per fer nou krwar nou pe koup tou, ki pa egziste pou zot kontinyen gannyen.

Alor Mr Speaker mwan mon pou donn sipor Minis avek son *Bill* e mon pou kontinyen siport mon Gouvernman dan demars ki i pe fer. Me parkont mon ti ava kontan ki *SBC* i konpran tre byen poudir pa *repeal* sa *Bill* ki nou pe fer, nou pa pe *repeal* noy trwazyenm-az premyerman. Nou pa pe *repeal* nou bann dimoun ki pe viv avek abilite spesyal, e nou pa pe *repeal* lasistans ki nou pe donn zot.

Sa i kontinyen la li i la li e i pou la. me parkont i annan bann pti detay ki Minis i ava eksplik nou dan son rezimen, ki mannyer ansanm nou kapab fer nou pei avans pli devan.

E asire ki nou bann dimoun avek abilite spesyal e osi bann dimoun aze, parey mon manman ek mon papa ki ankor la, ki mon kontan zot en kantite, mon fer mye pou zot, zot osi zot benefisye parey nenport ki dimoun i benefisye.

Mr Speaker toultan mon kit dan mon lespri poudir ozordi mon byen konman en dimoun, me taler 3er apre midi oubyen 1er apre midi, mon kapab vwar mon dan group dezabilite kot mon fer aksidan mon perdi en lazam oubyen mon paralize, mon osi finalman mon vwar mon dan sa lot group.

Alor i enportan toultan nou bezwen konsyan sipor ki nou donn zot, lankourazman e lanmour ki nou fer pou sa bann group dimoun.

Avek sa detrwa mo Mr Speaker, mon ti ava kontan remersye ou konman kontribisyon ki mon'n fer. Mersi.

(APPLAUSE)

MR SPEAKER

Mersi Onorab Arissol. Onorab Lemiel.

HON SYLVANNE LEMIEL

Mersi Mr Speaker. bonzour Minis avek ou delegasyon. Bonzour tou dimoun ki pe ekout nou.

Mr Speaker, mon pran laparol ozordi letan sa *Bill* in ganny anmennen devan nou, pou nou *repeal* sa de Konsey pou dezabilite avek pou *Elderly*.

Mon pou koz dan en fason an tan ki mon'n deza form parti Konsey pou dezabilite. Sa bann letan mon ti travay konman direkter zeneral kot *Local Government* pou program, e mon ti form parti en Manm ansanm avek Onorab Naddy Zialor ki ti en manm li osi lo sa Komite.

E atraver Konsey, nou ti'n kapab fer en kantite keksoz. Nou ti kapab fer bokou aktivite, menm bann lesanz aletranze kot nou ti ale, mon rapel nou de Onorab Zilaor nou ti ganny sans al *JICA Japon*, kot nou'n annan bann lesanz ki nou'n fer pou 7 semenn e an menm tan *Thailand* osi nou vizit ti an de parti ;- kot nou ti'n ganny sans ...

Ou konnen li konman en dimoun ki pe viv avek en abilite spesyal, kot ti ganny sans annan sa *empowerment of* en dimoun ki pe viv avek dezabilite.

So ozordi letan mon pe mazine santiman i preski parey, mon plizoumwenn mon annan bokou kestyon e leklersisman letan sa *Bill* in vin devan nou.

Akoz Mr Speaker ler ou gete de group tre spesyal ki nou annan dan nou pei, e dan nenport ki sosyete mon krwar, zot konsidere de group dimoun

tre spesyal se nou bann dimoun ki pe viv avek en abilite spesyal zot menm, e nou bann dimoun aze.

So mon krwar ki okenn Gouvernman ki vin o pouvwar ozordi i *LDS*, yer ti nou, e demen i kapab en lot nou pa devret pe kit deryer sa bann dimoun. Nou devret pe touzour rod bann fason ki pli bon. Bann fason ki pli meyer. Pou nou kapab amelyor lavi sa de group dimoun mon kapab dir.

Parey moto bann dimoun dezabilite zot menm zot kontan servi "*Nothing About Us Without Us*", zot bezwen ganny konsilte. E mon panse osi ladan i pou demann dimoun aze osi zot bezwen ganny sa konsiltasyon, zot bezwen konnen ki pe pase.

Akoz tou dernyerman, ler nou pe koz lo *repeal* sa *Bill*, i paret mwan i annan serten bann desizyon ki pe konmans ganny pran *or* ki pe konmans anvoy lo latab. Me selman apre i ganny - ou konnen i ganny *either* zot al refer *or* zot anvoy devan pou ekout leko, e apre i ganny *back track* *or* i dir nou ava fer li pli tar.

Nou'n koz lo fer dimoun per lenkyetid. I pa vedir fer dimoun per lenkyetid sa. Parfwa i zis sa bann pti desizyon koumsa ki letan par egzantp la pou *être* kler, i ti

annan en propozisyon ki bann dimoun ki pe viv dan *home* i annan serten larzan ki zot peye pou reste dan sa *home*. Pey pou zot serkey, pey pou aktivite ki ganny fer, e sa ti ariv en *quite* en bon son larzan ki ti pou ganny tire lo zot sekirite sosyal.

Sa li menm ti kree en panik. In kree en panik akoz Anse Royale nou annan en *home*, e sa miting ti ganny fer avek sa bann dimoun ki pe viv dan sa *home*, e zot ti lev telefonn zot ti *call* e sa ti en panik, ti en laper ki sa bann dimoun ti pe dir be la ki pou arive avek nou. Ki sa bann sanzman. Pe dir nou, nou ki pou bezwen al repar sa *home* ki nou pe reste ladan?

Ou konnen i bann pti keksoz ki en kote si Gouvernman in deside pou li *back track* lo sa desizyon petet mon krwar i byen, petet zot merit analiz ankor en pti pe.

Mon konpran sa bann dimoun pe reste dan sa landrwa - wi petet zot pou bezwen fer serten kontribisyon, me selman annou pa touye. Nou konnen ki sa pti larzan ki zot gannyen li menm, i pa sifi.

Akoz ler ou'n ariv sa laz nou pe ganny dir zot manz byen, bwar bann keksoz ki bon, fer bann keksoz ki bon pou ou lasante pou ou viv byen. Alors mon krwar i enportan pou nou

get byen lo kote bann desizyon ki nou pran, sirtou le tan nou pe mazin i tous pos nou bann dimoun aze.

E an menm tan Minis petet mon ti pou kontan ganny en leklersisman. In annan bann *Board of Trustees* dan bann *Homes*. Mon krwar tousala ti form parti tonm anba sa *Konsey for Elderly*, annan bann pti *Board*, annan bann dimoun ki responsab *Homes*.

E pandan sa letan mon pou pran legzanp Anse Royale dan *Home* in annan bann larzan ki ti ganny pran avek sa bann dimoun, pa pran *as such*. Bann larzan ki ti ganny kontribye, bann kontribisyon ki sa *Board of Trustees* li menm ti pe zere. Kot zot ti pe pey zot elektrisite, lot, lot mon krwar ti'n ariv R100 ekek mil pou Anse Royale.

So ozordi letan nou pe *repeal* *Lalwa Council*, bann *Boards* i ale *Board of Trustees* i osi i *phase out*, ki arive avek sa bann larzan, sa bann dimoun ki'n kontribye?

Akoz sa i zot larzan sekirite sosyal ki'n ganny kontribye dan sa fon. So ki i arive avek sa? Sa i enn mon kestyon mon ti ava kontan ganny en leklersisman.

E lezot kestyon osi ki mon annan mon osi, se lo kote ki

bann lenpak pli pozitiv? Minis ou'n dir pou annan sa nouvo divizyon, mon konpran.

Mon osi parey mon bann lezot koleg ki'n demande, mon ti pou kontan konnen egzakteman ki bann lenpak pli pozitiv ki petet sa divizyon pe mazin anmennen pou nou bann dimoun aze, e pou bann dimoun dezabilite?

Eski dan Minister zot annan zot Polisi pou tou le de group dimoun? Sa Polisi ki'n la depi ava, n eski zot pe mazin travay lo en lot an tan ki nou pe *repeal* sa de *Lalwa*, sa bann Polisi ki deza la nou pe kontinyen lo manm Polisi.

Or nou pe mazin sanz sa bann Polisi osi pou rann lavi en pti pe *or* lapros travay ki sa Departman, pou al pran sa divizyon pou al pran pou li vin en pti pe pli amikal mon kapab dir i en pti pe pli anmenn bann dimoun ansanm.

Apré mon pe mazine osi Minis en lot kestyon lo kote ki striktir petet ki letan sa *Lalwa* in ganny *repeal* pou amann sa divizyon, petet eski zot pe mazin annan bann striktir ki zot pe met an plas, pou zot pli vin angaz en pe plis annan dimoun dezabilite, annan dimoun *elderly* ki parey ler ti annan sa *Board* ti annan sa bann dimoun lo la, eski sa i pou kontinyen

avek zot nouvo desizyon ki zot pe mazin pran?

En lot keksoz Minis ki petet ti ava bon ariv a ou latansyon, ki nou pe vwar i annan bann sanzman menm avan *repeal of* sa de Lalwa.

Nou pe vwar i annan serten dimoun - la mon pe koz lo *case* reel ki bann dimoun in pran kontak ek mon ki'n enformen.

Bann dimoun ki'n ne ek en dezabilite i annan en larzan ki zot gannyen tou le mwan. I pe arive la dan lenstans kot i annan serten ki'n fini ganny *call* par Minister Lasante, e sa bann dimoun pe rod en fason pou vwar ou *Minister*, kekfwa zis pou donn zot en sipor pou eksplike.

E zot pe mazine i paretman ot in fini annan sa santiman ki keksoz pe vreman sanze wi. Akoz nou pa kapab al kot *Board* konmela napa personn ki pou diriz nou pou dir nou, mon zanfan in ganny *call* i annan 17an in ne avek en serten dezabilite, ki pou viv avek tou dilon son lavi, i e ganny dir poudir ou pe al ganny 18an sa larzan envalidite ki ou gannyen pou koupe akoz ou pe al ganny 18an.

So sa osi i pe kree serten panik. Sanmenm sa ki mon pe dir i pa neserman nou ki pe

met sa pou fer dimoun per. Me dimoun zot menm baze lo keksoz ki zot pe ganny dir i pe anmenn serten lafreyer dan zot.

Akoz zot pa pe ganny byen eksplike. petet mon piti i annan sa dezabilite akoz ki sa larzan pe ganny koupe? Petet en bon lesplikasyon i merit ganny donnen.

Parfwa mon santi petet Minis menm si i parey la sa de *Bill* zot in deside pou zot *repeal* li, i merit annan serten zot vin devan parey bann program kot zot vreman enform lamas dimoun, bann problem televize, kot nou konnen egzaktaman *as from now on* prezan ki mannyer sa bann keksoz pou marse, ki mannyer keksoz pou ete?

Dan sa Departman dan sa divizyon pou al annan sa tel dimoun si ou konman sa dimoun ki pe viv avek sa abilite otremman kapab, *or* si ou sa vye dimoun ou pe rankontre serten problem, i annan tel *desk* tel landrwa ki ou kapab *call*.

Akoz lontan zot ti deswit telefonn kekfwa Mrs Franchette kot Konsey Dezabilite oubyen *Chairman*. *Chairman* sa *Board*, *Chairman* Konsey Dezabilite.

So i merit annan sa ledikasyon i merit annan sa bon kominikasyon ki pe sorti kot Gouvernman, pe al kot sa bann

dimoun e nou osi konman bann *leaders* dan kominote, nou merit ganny plis lenformasyon pou nou kapab.

Par egzanp la sa madanm ki ti apros mwan pou dir mon konsernan son zanfan, mon kapab pli byen eksplik li. Be tel keksoz pe ariv tel mannyer aköz tel keksoz.

Me i annan de letan la ki ou pa pe kapab eksplike aköz ou pa pe vreman ganny en konpran tro konpran ki pe pase, *until* ki kekfwa nou ava ganny sa bon leksplikasyon en bon desizyon lo sa kote ki pe vreman arive sirtou la avek bann dimoun ki dan sa de kategori, ki nou pe tous zot egzakteman.

So an menm tan i enportan pou nou dir mersi osi, nou pe *repeal* sa de Lalwa, in annan en kantite dimoun ki'n anmenn bann soutyen ki'n travay en kantite avek sa de kous dimoun.

Mwan mon ti ava kontan ozordi profit sa lokazyon pou mon dir zot mersi. Tou sa bann dimoun ki'n *serve* lo sa bann *Council* Dezabilite depi avan, ki'n *serve* lo Konsey *Elderly*, depi lontan ziska la nou dir zot mersi.

Mersi pou sa travay ki zot in fer. Mersi pou sa kontribisyon ki zot in

anmennen, petet wi ti ankor annan en kantite travay pou fer, e mon espere ki sa divizyon ki pe al ganny formen, anba Minister i ava kapab kontiny sa travay e menm fer li pli byen.

E anbelir lo sa ki ti bon, ki'n ganny kit deryer e petet anmenn sa soutyen an plis pou sa de kous dimoun pou ki zot santi zot pli byen, zot santi zot, zot kapab viv pli byen.

E zot santi zot kot zot kapab annan sa landrwa ki zot kapab aproz pou zot vini pou zot anmenn zot bann *issues* devan, e menm anmenn zot bann nide osi petet ki zot annan devan.

So Mr Speaker mon osi parey mon'n dir antan ki mon'n deza konman en manm ki'n servi lo sa Konsey avan, nou annan sa bann *past Chairperson* osi, ki'n la lo sa Konsey. Mon konnen Mrs Patricia i enn bann dimoun ki ti servi lo la e i ankor kot lopital ozordi i pe travay e i enn bann dimoun ki ti vreman pouse i osi pou anmenn serten sanzman dan lavi bann dimoun dezabilite.

Nou annan Ms Marie-May osi ki'n deza en *Chairperson* lo sa Komite, e mon krwar ziska la dernyerman li menm ki ti ankor *hold* pozisyon *Chairperson* lo sa Komite. Nou dir mersi Marie-

May, mersi Mrs Patricia pou tou sa travay dir ki zot in fer.

E mon espere atraver sa nouvo divizyon zot ava kontinyen *engage* avek sa Minister. E mon espere osi ki petet bann in annan sizesyon ki'n annan bann *NGO* i *take onboard* serten bann travay avek dezabilite avek nou bann dimoun aze osi.

Mon espere ki sa lyen ant sa divizyon avek sa bann *NGO*, si nou pe mazin bann *NGO* ki pou *take up* sa, sa i a mars byen.

Minis petet dernyen avan fini sa *Disabled Trust Fund*. Parey sa bann diferan ki annan, mon krwar ti annan enn pou *Elderly* tou *if I am not mistaken*.

So anba sa Lalwa letan i pou ganny *repeal* konmsi sa osi ki mannyer i pou marse ki i pou kontinyen sa ouswa li osi i *phase out*?

E si i arive i *phase out* ki pou fason par egzanp ozordi en dezabilite ki bezwen en *wheelchair* napa sa mwayen li pou aste i vin anba sa *Trust Fund*, kot i *apply* atraver Minister.

Prezan si i ariv ki avek sa fezabilite *repealing of the Council Disabled and Elderly*, ki mannyer sa bann keksoz koumsa pou marse?

So avek sa de pti mo Mr Speaker, mon a dir ou mersi.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker dan nou *tea break* la apre enn de komanter ki'n ganny pase, ki'n ganny sorti lo lot kote latib, mon'n donn en pti *call* Onorab Zialor. Akoz mon santi poudir bann entervenans lot kote latib ki'n koze sirtou ler entervenans partikilye Onorab Cosgrow avek Onorab, sirtou Onorab Aglae, mon krwar zot in sey kre en *misapprehension* pou donn lenpresyon konmkwa Onorab Zialor pa *care* ki i kont sa *repeal* sa de *Council* ki devan nou, sirtou *Council of the Disabled*.

Konmsi Mr Speaker mon vremen sagren ki ozordi nou pe koz lo en *Bill* sitan enportan ki tous bann dimoun ki annan abilite spesyal, ki nou vin fer politik lo en frer.

En frer ki tou son lavi in devoue pou ed bann dimoun ki annan abilite spesyal parey li menm pou zot vin fer bann politik sitan bon marse ki mon santi in denigre en pe son personnalite, son karakter koman en dimoun ki fer sitan

bokou pou bann dimoun avek dezabilite dan son pei.

Mr Speaker mon war sa i vremen, vremen sagrinan. Akoz nou, menm si lot kote latab i annan en dimoun ki annan problem lasante, zanmen nou'n fer politik avek sa, en konparezon i annan en Manm ki 3 mwan pa dan Lasanble.

Nou pa'n fer okenn politik bon marse parey zot in fer lo en frer ki ozordi i annan en sityasyon medikal, ki i pa'n kapab vin Lasanble pou fer bann politik sitan bon marse. Mr Speaker, i *very, very shameful* e mon vremen, vremen sagren ki zot in kapab fer en keksoz koumsa ozordi dan sa Lasanble.

Mr Speaker sa de *Bill* ki devan nou, sa *Bill* ki devan nou la pou *repeal Council for the Elderly* avek *Council for the Elderly* avek *Council for the Elderly* avek *Council for the Elderly* i en *Bill* ki vremen, vremen enportan. Ou konnen akoz mon pou dir sa Mr Speaker?

Ou konnen i enportan pou nou get zesyon lafason ki sa bann *Council* in ganny deroule dan lepase.

Me sa ki malere Mr Speaker se ki ler mon'n ekout bann entervenans lo lot kote latab mon santi poudir a sak fwa ki Gouvernman pe pran

bann desizyon, zot vin avek menm kalite politik bon marse. Parey nou kontan dir zot annan en gitar avek zis 2 lakord. E en lakord ki zot in zve vremen, vremen byen ozordi parey zot abitye zve.

Onorab Uranie in koz lo zafer tou bann benefis ki bann dimoun avek dezabilite, ouswa bann benefis ki bann *elderly* pe gannyen. Me enner Mr Speaker mon demande si i ti dan Lasanble ler Bidze pou 2021 ti pase?

Mon pa konnen kek fwa i pa konpran ki ti pe pase, me selman i kler poudir dan Bidze Nasyonal i fer provizyon pou tou sa bann benefis. E napa okenn benefis ki pou ganny *repeal* ki pou nepli donnen apre ki sa de *Council* i ganny *repeal*. Tou sa bann servis pou kontinyen Mr Speaker.

Bann *elderly* pou kontinyen ganny zot *carer* parey Onorab Arissol in koz lo la, zot pou kontinyen ganny zot sekirite sosyal, zot pou kontinyen ganny bis piblik san ki zot bezwen peye, zot pou kontinyen ganny bann benefis pou bann ki lo *Inner Islands* ler zot pran avyon pou zot vin Mahe.

Napa naryen ki pe ganny koupe. Sa i en *scaremongering tactics* ki sa parti - ou konnen

zot ti sant menm sanson, menm zistwar lannen ale, lannen vini zot pa zanmen sanz zot *tune*, zot zwe zot lanmizik apre zot dans zot menm.

Mr Speaker mon pou komanse mon a remersye Onorab Roucou pou sa travay fantastik ki li ek son lekip pe fer koman *PS* kot *Family Affairs*.

Annefe Sanmdi i ti Praslin avek en lekip e nou'n ganny sans al vizit *Home for the Elderly*, Onorab Porice ti la, e nou i annan en miting avek tou bann parti prenan ki konsernen avek konsern, ankadreman, bann dimoun avek dezabilite osi bann dimoun aze.

E plizyer ban konsern bann *issue* in ganny sorti. E *PS* ti donn en komitman pou adres sa bann *issue* ki'n pertinan ki'n la, ki bann *elderly* avek bann dimoun avek abilite spesyal in fer fas avek pou plizyer lannen.

E wi i annan serten travay ki'n ganny fer, me nou pou bezwen al met osi poudir i annan en kantite keksoz enportan ki ti'n merit ganny fer ki pa'n ganny fer. E in osi annan labi dan enn de landrwa ki mon poudir pou sa ki lo la.

Konsern pertinan ki'n ganny fer resorti Mr Speaker se kot i konsern sa *Disabled Trust Fund*, ki tou le lannen i annan en Bidze ki nou mete sa ler mon

krwar ti R400mil. E nou'n war poudir i annan bokou bann depans ki'n ganny fer atraver sa fon, dan sa fon ki ozordi napa rikord. Ou konnen i mank rikord.

Onorab Sandy in koz lo, avan eleksyon aktivite ki zot ti fer pou anmenn detrwa dimoun avek detrwa *elderly* Silhouette, zis pou sey anbet sa bann dimoun pou vot pou zot parey zot abitye fer. Apre selman napa rikord. Ou konpran?

E Onorab Roucou ti la ler ti ganny refer sorti dan sa miting Praslin ki bann lasosyasyon pou bann dimoun avek dezabilite pa konnen poudir i annan sa fon. Zot pa konnen akoz zot pou ale pou ganny sa bann lasistans.

E mon kestyon alor i kote sa larzan ti pe ale, lekel ki ti pe servi sa larzan? Konmsi ti annan move zesyon sa *Disabled Trust Fund* ki enportan ozordi pou nou get dan sa bann keksoz. E mwan mon pe demann Minis si i kapab donn en pe detay, en pe lenformasyon si zot pe fer en *audit* sa bann larzan, pou fer sir ki sa bann larzan i ganny depanse dan en fason ki byen.

Onorab Uranie in dir koumsa ler i annan sa bann *Council* dimoun i pli lib, zot pli lib pou zot fer zot bann travay.

Me selman i pa vedir pli lib pou fer ou travay, i vedir i pli lib pou ou donn bal dan larzan ki pa pou ou, dan larzan Leta! Laliberte savedir i osi ki ou pran ou responsabilite.

E dan lepase nou konnen poudir i annan bokou bann *Council* bann Lazans ki'n ganny kree menm bann fon parey nou'n war *Children's Fund* kot zot pe donn bal ladan!

Nou'n war *APDAR* sa zafer lwe lakaz ek dalon. Nou'n war "Bal dan simityer." nou'n war konmsi i annan bokou bann Lazans, bann antite ki'n ganny kree zis pour swa donn en dimoun pozisyon ouswa pou zot donn bal dan larzan Leta, dan en fason kot ti annan *mismanagement of public funds*, e prezan ki in fer in fer en, nou'n kre en Gouvernman ki'n anfle.

Konmsi e la i enportan pou nou re get sa bann striktir fer keksoz dan en fason byen kot sak sou ek sak kas i ganny depanse dan en fason ki byen, kot nou war nou konnen kote sa Roupie pe ale. Pa ozordi kot nou pe demann keston kote, be sa larzan la in ganny servi pour kwa?

Selman ler ou al kot bann dimoun ek dezabilite, ou al kot bann trwazyenm-az personn pa konnen kot sa larzan ion ganny servi. Nou pe koz ozordi lo bann

diferan proze pou nou bann dimoun ek dezabilite.

I annan proze Marie Jeanne pou fer en proze pou bann dimoun avek, ki annan abilite spesyal e osi bann dimoun trwazyenm-az. Plis ki 12an pe ale sa proze ti annan 2 kare later en in ganny vann i reste zis enn. Ti pou ganny finanse anba *India Grant* plizyer Minis in vin devan Lasanble Nasyonal dan Gouvernman *US*, oparavan enkli Minis Larue.

"Be proze pe al komanse!"

"Proze pe al komanse!"

Sak fwa eleksyon proze pe al komanse, selman zanmen sa bann proze i materyalize. Pourtan larzan ti la, larzan ti annan be sa ti pou ganny servi pi fer sa proze Marie Jeanne ziska ozordi bann *elderly* avek bann dimoun avek dezabilite pe espere. E si mon pa tronpe Mahe osi i annan en tel proze parey, ziska ozordi sa proze pa ankor materyalize.

En lot gro konsern ozordi pou bann dimoun avek dezabilite Mr Speaker. Annou fer en vizit kot tou bann lakour, bann *Homes for the Elderly*. Get zot leta. Mr Speaker pou konnen ki pe arive ozordi? Se ki nou'n les sa bann *Homes for the Elderly* tonm rin! Minis ou'n war leta *Home for the Elderly*

Grand Anse Praslin e *PS* fek war sa semenn ki la.

Get leta nou bann *Homes* ozordi? Apre ki ou war i arive, ler in ariv dan en sityasyon vreman agrave, la zot fer en zafer anba, anba zot donn kontra enn zot gro dalon, i vini i dir ar i pou kout 20milyon 15milyon pou *refer base* sa landrwa konplet.

Kan si ti annan en *proper maintenance* plan lo sa bann *Homes for the Elderly* nou pa ti pou bezwen depans sa bann gro larzan, ki nou Gouvernman ozordi nou bezwen al depanse, pou *maintain* sa bann *Elderly Home*, pou met sa bann *Elderly Homes* annord.

Mon lot kestyon se ki mon bezwen fer resorti Mr Speaker e annefe i en konsern ki mwan menm mon ti souleve dan miting avek *PS* Roucou Praslin, se ki i napa en Polisi kler kot i konsern ankadre nou bann dimoun avek abilite spesyal dan landrwa travay.

Konmsi i bezwen en parey nou dir i bezwen annan en *networking* - en sinerzi antre tou bann Minister e en Polisi kler pou gete ki mannyer dan bann landrwa travay pou ankadre bann dimoun avek - ki annan abilite spesyal.

Konmsi ki mannyer nou pou anmas zot, ki mannyer nou

pou met zot dan lanplwa ? Akoz bokou sa bann dimoun kekfwa pou annan serten sipor adisyonnèl ki zot pou bezwen dan bann landrwa ki zot pe travay.

Petet ou Minister i lavolonte me ski tou Minister i annan sa volonte, konmsi pou zot annan en program en Polisi pou ede met nou bann dimoun avek abilite spesyal dan lanplwa.

Mr Speaker mon'n vreman sagren - e annefe ou konnen ennler mon demande si enn de bann Manm lot kote latab zot ekout zot lekor ler zot koze, zot in koz lo politik. Politik ki ler nou pou *repeal* sa *Council* prezan nou pou revwar Polisi antre dan zesyon, dan lafason ki nou travay, nou donn nou sipor bann dimoun avek dezabilite avek bann dimoun *Home for the Elderly*.

Ou konnen Mr Speaker dan lepase sa, i sanmenm sa de group nou sitwayen ki parti *US* in profit plis lo la. Mr Speaker ler i dir ou eleksyon pou zot al vote la ti annan en bann - zot ti ganny kordinen zot. Personn pa ti kapab vin sers zot pou al vote, e laba ki ti organize e zot ti ganny prepare e dir kote zot pour vote.

E ou *MNA*, en kandida ou pa ti kapab antre dan bann

Homes for the Elderly pou al koz ek sa bann dimoun. Zot pa ti les ou antre, laport ti frenmen selman zot kandida ti antre. E ler pou al vote se zot bann dimoun, bann dimoun ki ti siport zot parti bann dimoun Parti Lepep/SPPF/ *United Seychelles* ki ti anmenn nou bann *elderly* vote.

E zot ti *groom* sa bann dimoun, fors sa bann dimoun, abiz sa bann dimoun pou sa bann dimoun fer sir ki sa bann dimoun ler i al vote la i vot pou zot.

E sa Mr Speaker sanmenm sa ki apel politik, sanmenm sa ki apel labi e in arive dan nou pei! Zot pa'n tret nou bann dimoun aze byen, avek dignite. Zot enterese avek nou bann dimoun aze selman ler eleksyon pe vini apre zot pran sa bann dimoun zot zet akote, konmsi en pake lenz sal ! Mr Speaker zot pa'n vreman *care*.

Pou fer monte pansyon, lekel ki ti anmenn lager pou fer monte pansyon? Be se nou parti ki ti anmenn lager pou fer monte pansyon Mr Speaker.

Ou konnen Mr Speaker konmsi ler mon ekout zot lo lot kote latab konmsi mon pa ganny en konpran, mon pa ganny en konpran zot kalite *mindset*, zot kalite fason war

keksoz! Kan zot menm zot, zot responsab pou pa donn sa nou bann *elderly* ouswa dezabilite sa respe ek sa entegrite, ki zot merite.

Mon pou bezwen al lo Onorab Vidot pou mon dernyen entervansyon, dan mon entervansyon. Ou konnen Onorab Vidot in dir en keksoz taler ki mon krwar i pa'n vreman, mon krwar i pa konnen si i pa ti pe swiv politik sa letan.

Selman ler program makroekonomik *reform* ti vini an 2008, Lopoziyon sa letan ti siporte sa program, akoz i ti bon pou Sesel. Nou ti dan en sityasyon ekonomik.

Nou ti siporte a swiv al gete ou a war, me parkont zot, sa parti ki la ozordi i pa enterese zot. Zot pa pe donn okenn sipor, tou bann reform, tou bann travay ki Gouvernman pe fer pou restriktir Gouvernman pou fer li pli *lean*, pou koup en pe bann gaspiyaz, pou fer sir ki nou larzan i ganny depans dan en fason pli byen, zot kont. Zot pa ni'n vot pou Bidze zot.

Zot pe rod larzan pou bann dimoun avek dezabilite, eski zot ti vote pou dezabilite ki enkli larzan pou bann dimoun ki annan abilite, ki otreman kapab oubyen *elderly*? Zot pa ti vote sa Bidze zot. La ozordi zot pe rod larzan pou ed bann

elderly avek bann dimoun ki annan abilite spesyal.

Mr Speaker sanmenm sa ki apel ipokrizi. Sa Gouvernman i annan en plan en Gouvernman i bezwen fer striktir dapre son program ki i annan. E son program i pou ankadre tou group nou sosyete ki enkli bann dimoun ki annan abilite spesyal e osi bann *elderly*.

E mwan mon annan tou konfidans ki sa Gouvernman e sa Minis ki la devan avek son lekip, zot pou fer en travay pou donn tou sa soutyen ki nou bann dimoun ki annan abilite spesyal e nou bann dimoun *elderly* i bezwen. Avek sa de mo mon dir ou mersi Mr Speaker.

MR SPEAKER

Mersi Onorab. Onorab Sophola. Atann en pri moman Onorab Sophola, ki annan Onorab Aglae?

HON EGBERT AGLAE

Mr Speaker mon oule ekersi en *misapprehension* ki Onorab Woodcock in fer ki'n nonm mon non ek Onorab Cosgrow, ki'n dir poudir dan nou *speech* nou ti pe target Onorab Naddy Zialor avek en dezabilite fizik kan i pa leka!

Sa ki nou'n fer resorti se ki nou ti swete Onorab Zialor ti a

la pou nou ganny son pwennvi vizavi sa *Bill!* Mersi Mr Speaker.

MR SPEAKER

Mersi. Fodre realize poudir zot in ouver sa pwen an referans avek Onorab Zialor, Onorab Woodcock in donn son lopinyon lo sa ki zot in dir, mon pa war nanryen mal nou a kontinyen. Mersi.

(Interruption)

MR SPEAKER

Mersi. Onorab Sophola ou annan laparol.

HON NOLINE SOPHOLA

Mersi Mr Speaker. Bonzour Minis ek ou lekip. Mr Speaker bokou *CD* in ganny zwe depi bomaten, sakenn lo son prop tune, prezan mon a esey zwe pou mwan.

(laughter)

HON NOLINE SOPHOLA

Mr Speaker avan mon konmans mon lentervansyon, mon ti a kontan fer en leklersisman aköz depi bomaten dimoun avek dezabilite pe ganny nonmen anba diferan non. Par egzanp 'Dimoun otreman kapab', 'Dimoun spesyal' 'Dimoun vilnerab',

‘Abilite spesyal’.

Me fodre note ki nou pe koz lo menm group dimoun. Petet Minis si ou ti a kapab taler ed nou lo sa pwen. Mr Speaker le moman ki en size i koz lo nou ban dimoun aze e dimoun dezabilite, i en konsern pou nou tou ki annan en leker pou nou dimoun pli vilnerab ou spesyal.

Nou bezwen rekonnet ki bokou keksoz in ganny fer pou ed sa 2 group dimoun, pou ed zot ganny zot dignite dan lasosyete. Nou bezwen rekonnet e dakor ki sa Gouvernman 43an parey in ganny dir ki ti komans sa travay.

Mr Speaker parfwa nou en pep engra. Nou napa gratitid pou montre apresyasyon pou bon travay 43an ki nou tou ki la nou'n benefisyè ladan san eksepsyon. Legzanp zis pou nonm enn de lafason ki nou de group spesyal in ganny enkli. Premyerman dan sa 43an enklizyon in ganny fer. Bokou nou sa letan nou pa ni ti konnen kisisa sa mo.

Ramp ek bann batiman in ganny mete, plis *railing, pavement, toilet facilities*, benefis kontan pa kontan nou'n gannyen. *Home for the Elderly, carer*, lalis i long. Mon'n nonm sa de pwen zis koman pwen refleksyon.

Eski tou sa bann keksoz ti byen, eski ti mal? Sa mon les ek pep Seselwa pou zize. Me mwan mon dir ki en premye pa in ganny fer, prezan annou pa lager, batir lo la, amelyore se sa *way forward*.

Mr Speaker mon oule dir mersi tou dimoun ki ti travay pou asir ki sa de group dimoun ki spesyal dan lasosyete, in ganny rekonnet zot pa'n ganny kit deryer, rekonesans i enportan dan nou lavi.

Vyeisman i en staz dan nou lavi, me avek en dezabilite ou ganny en dezabilite dan nou lavi nou pa konnen lekel parmi nou ki pou tonm dan sa de kategori. E i enportan alor ki nou okip zot byen, aksepte zot parey tou lezot dimoun dan lasosyete.

Nou bann vye dimoun i annan zot ki ganny byen okipe, me parkont son ekstremitè se ki i annan zot ki vreman pe soufer.

Mr Speaker ozordi dan nou lasosyete nou war ki i annan sa serten group dezabilite ki pli vizib, pli enportan, mon krwar in ler pou nou rode aköz.

Mon pou donn en legzanp, si en fanmir i annan en manm ek en dezabilite e sa fanmir i ase eze finansyerman, ou parey nou dir dan term Kreol i koz for i fer tapaz sa kategori dezabilite i

ganny byen rekonnèt. Me parkont sa lezot group ki napa sa bann menm loportinite i ganny les e pe a lekar e selman enn fwa dan lannen ki zot ganny mansyonnen.

Mr Speaker sa i pa devret arive, tou i devret ganny menm loportinite e se sa prensip ki nou'n viv toultan. Me ozordi Minis in dir nou dan son prezantasyon ki Departman Lafanmir pou abzorb sa 2 group dimoun, vedir dimoun aze e group dezabilite.

Mon ti a swete ki Minis ti a kapab donn nou larepons sa enn de pwen ki mon pe rod leklersisman lo la, pou mon bann dimoun deor. Minis eski ou pou kapab donn nou rasyonnal, akoz ki ou Minister pe anmenn sa sanzman? Donn nou statistik sa de group dimoun par distrik.

Ki nouvote ki sa sanzman pou anmenn pou nou de group targete? Eski sa servis *carer* pou ganny revize, ki fason ki ou Minister pou *empower* zot? Ki servis an plis ki bann dimoun dan *Home* pou gannyen lo kote son fonksyonman?

Eski pou annan en Zofisyè ki pou atase espesyalman avek sa de zil vedir Praslin, La Digue ki prezans pou a plen tan lo sa de zil? Eski pou annan psikolog, *physiotherapist* ki pou

travay avek sa de group vilnerab, si nou pe dir *equal opportunity* dan tou distrik ou par rezyon? Mersi Mr Speaker. Mon ti a kontan ki Minis a kapab eklersi sa 2 pwen. Mersi.

MR SPEAKER

Mersi Onorab. Onorab Porice.

HON DOYACE PORICE

Mersi Mr Speaker. Bonzour Minis avek ou lekip. En pti keksoz mon anvi dir avan ki mon al en pti pe lo bann entervansyon. Pou zis fer konnen piblik la deor e osi petet Minis mon pa konnen si zot konnen.

Premye dimoun pou form group trwazyenm-az Sesel se mwan. Mon ti pran sa lide atraver en aktivite sanzman avek Moris pou bann zenn, e la mon ti vwar poudir sa ti pou bon pou Sesel pou nou bann trwazyenm-az. Me Gouvernman sa letan pa ti krwar ladan.

Me apre ki i ti pas lan, Minis Pool ki ti dan Minister pou *Local Government* ti deside pou form group trwazyenm-az dan tou distrik. E la mwan mon enn sa dimoun ki ti ed epou lans sa Lasosyasyon Trwazyenm-az e osi Lasosyasyon Dezabilite.

Dan sak distrik ti annan en *program officer* e osi en *youth worker*. E la mon pe tande poudir pe demann Minis si pou annan en dimoun ki responsab sa bann program dan distrik, omwen dan rezyon? Me Praslin, La Digue i de zann enn ki pe ansarz tou sa bann program ki pe tonm anba li e sa i en *program officer*.

E petet mon pou demann Minis dan son repons se fer konnen piblik la deor la fason ki sa Gouvernman pou travay dan sa divizyon avek sa de groupman. E osi atraver bann lasosyasyon ki annan ki deza anba *Local Government* Minister Gouvernman Lokal.

E mon ti a kontan ki Minis i asire ankor e i asir bann piblik la deor, petet zot pe ganny mal ganny enterprete, asir piblik la deor ki program dezabilite ek bann dimoun aze pou kontinyen parey i ti ete avan. Me dan en lot fason.

Petet i pou vin en pe pli elarzi e sa bann dimoun pou partisip en pe plis - non pa zis en serten pti group dimoun ki partisipe.

E mon santi atraver bann dout ki mon ti annan, mon'n antre avek sa Minister, mon'n koz atraver miting ki ti annan wikenn, mon'n ganny tou sa bann leksplikasyon atraver sa

divizyon ki zot pou kontinyen, zot pou kontinyen avek program sa de groupman.

E osi annan en pe plis formasyon osi pou zot, kot zot pou kapab, nou pa krwar poudir sa bann dezabilite i annan en kantite zot ki kapab ki annan bokou leksperyans. I annan bokou keksoz ki zot kapab fer. E petet sa i pou ed zot pou antre dan sa groupman plis.

E osi paran osi i a vwar ki fason keksoz pe ganny deroule e ankouraz zot zanfan pou zot partisipe. Nou konnen la deor i annan paran ki pa enterese avek bann groupman ki ti annan ;- ki toultan gard zot zanfan dezabilite dan lakour. Me atraver sa divizyon i annan keksoz pou zot ki pe vini.

E nou, nou ankouraz paran pou zot pous zot zanfan ankor plis e zot menm zot paran partisipe avek sa bann zanfan pou kapab fer zot lavi vin pli vivan e osi anmenn plis kontribisyon dan nou pei.

Alor Minis i annan bokou keksoz Mr Speaker osi i annan bokou keksoz ki mon bann lezot koleg in koz lo la ki mwan mo ti pou osi dan mon lentervansyon.

Mon pa pou repet menm keksoz, me sa en pti pe bann pwen ki mon ti a kontan Minis i ekersi piblik la deor, ki pa sa ki

nou pe krwar ki tou zot keksoz pe ganny koupe ki pou napa program isi laba. Mon ti a kontan ki nou eklersi ki mannyer sa divizyon pou ganny marse isi dan nou sosyete. Mersi.

MR SPEAKER

Mersi Onorab. Mon annan Onorab Labrosse.

HON RICHARD LABROSSE

Bonzour Mr Speaker. Mersi pou donn mon laparol. Avan mon komanse mon a dir bonzour mon de sanpyon devan mwan Minis ek mon *PS* ki sorti dan menm bastyon ek mwan Belvedere. I en plezir pou war zot ozordi.

(Off-Mic)

HON RICHARD LABROSSE

Li mon ava war li apre en pti kou.

Mr Speaker pou koz lo sa *Bill* li menm mon lanmour pou bann dimoun aze dan mon distrik enn ki fon dan mon leker. Kwa ki fer mon dir sa Mr Speaker kekfwa Onorab Roucou i la devan i a kapab demanti mwan ;- sak fwa eleksyon i fer dan Plaisance, ler premye bwat vote i ganny ouver pou konte, tou kou nou ganny bate nou, ou konnen akoz ?

Bann vye dimoun ki zot al serse bomaten, granmaten, zot fer vin vote.

Be sa voyaz Mr Speaker 2020 sa defet ki a bann zans ti donn *SPPF*, ti fer mwan menm bat Prezidan Faure Mr Speaker !

(laughter)

HON RICHARD LABROSSE

Mr Speaker pou kontinyen lo sa not menm konsernan nou bann vye dimoun, mon santi poudir ki dan lepase nou bann dimoun aze pa'n vreman ganny sa merit ki zot ti merite.

Parey dan mon distrik, mon annan en ta bann dimoun ki'n pran *retirement* ki zot in fer bann louvraz nob parey dan lasante, *teachers*. Mon mazine konmsi sa bann letan ler zot ti pou pran zot *retirement*, kekfwa ti ava annan en pti keksoz pou fer zot kapab pran zot retret, lo en fason en pti pe pli byen.

Me sa Gouvernman mon krwar ki ti la avan pa ti pe rekonnnet sa zot Mr Speaker. Ki mon ti war zot plito pe fer, se sak fwa en pti laniverser en pti R50, be nou tou nou konnen R50 pou li ariv R1000 en ta ale Mr Speaker. Mon pa konnen lo ki lozistik ki zot ti pe vin avek sa, e sa dan li menm in kre plis

soufrans pou nou bann dimoun la deor.

Ler zot, zot ti pe kriy, ler nou pe get pri lavi li menm bann komodite ki zot ti pe aste zot menm. E la mon ti a kontan ki Minis ek *PS* ler zot pe fer zot bann Polisi, konmsi reget en pe lo bann fason ki nou kapab refer zot letan zot pe fer zot *retirement* kot zot kekfwa zot a ganny en pti benefis.

Kekfwa pa neserman larzan, me kekfwa zot, zot bann profesyonnel zot a konnen mannyer pou ankadre sa.

Ler mon pe ekout bann entervenans ki'n koz avan mwan zot pe donn lenpresyon ki bann *Board*, bann keksoz ki pe ganny tire sa li menm li i pou en gro lobstak dan travay Minister Lafanmir oubyen dan lobstak Gouvernman.

Be selman ler mon pe asize mon pe demann mon lekore en kestyon Mr Speaker. Ti annan *Board* pou Dezabilite mon krwar, be selman nou ti tande ki en larzan dan *UNESCO* ti perdi ki zot ti pe fer lo sa *Board* zot, ki zot rol ki ti la?

E pa bliye nou ti annan *Board* pou bann Dimoun Aze Plaisance, kot mon ete laba dan mon *Home* ti pran sepa konbyen larzan pou al Silhouette.

Kontrer la Minis ler ou pe donn ou *reply* eksplik sa bann dimoun laba dan *old peoples home* laba Plaisance ki pou arive ek zot akoz tanzantan zot donn mwan en pri *call* en kou pe gete ki pou arive ek zot pti larzan.

Minis apre osi mon ti a kontan osi ler mon pe koz lo sa bann zafer *Board* osi parey mon'n dir sa bann dimoun ki la ki zot ti pe fer, me selman kekfwa i kapab pa zot tou kekfwa ki ti napa sa, ki lentere travay ti parey. Me la mon ava profite pou mwan remersye sa ban ki'n donn zot abilite, zot in donn zot leksperyans ek zot lanmour pou zot travay pou sa bann lorganizasyon.

Minis la ki nou pe koz lo *Repeal Board* mon ti a kontan ou konsider osi pou ou angaz ou Minister avek plis bann sosyete sivil ki nou annan deor. Akoz nou annan pa mal sosyete sivil ki fer ban zoli travay deor.

Par egzanp kot dezabilite mon konnen i annan en group solid ki zot, mon ganny san al vizite avek zot. Mrs Ernesta avek zot lekip en lekip vreman solid. E osi lo kote bann dimoun aze nou konnen i annan plizyer groupman dan distrik partou. Kekfwa la osi letan ou pe fer Polisi ou kapab regarde.

Akoz kote ki sa bann dimoun i - en ler ou tande Gouvernman Lokal, ennler ou tande, ki konmsi ou ankadre tousala dan en sel Polisi. Apre osi ler nou pe koz lo dimoun aze ek dezabilite, nou pa kapab osi zis mazine osi ki kekfw sa i en louvraz zis pou Gouvernman.

Mon krwar tou dimoun dan kominote bann zenn, bann fanmir i merit ansanm montre en pti pe plis respe pou nou bann dimoun.

Annou pa krwar kekfw sa i Gouvernman pe pey en *carer* sa *is the final say* sorti kot Gouvernman, me nou bann dimoun an deor ki nou pe fer?

E ler mon pe koz lo respe pou nou bann dimoun aze osi, kekfw bann dimoun osi dan lasosyete zot merit montre en pe plis lanmour sirtou ler zot ganny bann sans;- par egzant bann parti politik ler zot pe fer zot bann welele lo televizyon.

Dernyen fwa zot ti atak Mr Speaker, Mr Speaker in vye demisyonnen, me selman en keksoz nou pa realize ki 2020 zot ti anvoy en dimoun menm laz ek Mr Speaker pou debout ek mwan dan eleksyon. So si sa dimoun ti ganny eleksyon ki mannyer nou ti pou ete?

Zot ti pe dir Plaisance napa zenn apre ki nou'n war, nou'n war en zenn i koule

trankil sorti Minis, i asize dan kwen proporsyonnel pov tantin i asize se li. Sa mon krwar fodre nou arete m Speaker nou bezwen montre ne pe plis respe pou nou bann dimoun, nou pa kapab kontinyen lo sa bann kalite keksoz koumsa *ok*?

Pou kontinyen Mr Speaker pou al lo, Onorab Cosgrow *relax* ou lekor, *relax* ou'n koze taler mon ekout ou, ou ava zwenn mon 2025 parey ou'n dir. Wi Mr Speaker nou pe esper li 2025 Plaisance i pa konnen nou'n anmas en pti zafer pou li nou a war li apre pli tar.

Mr Speaker pou kontinyen lo la, ler nou pe koz lo *Home for Elderly Council*, mon ganny sans ganny en antretyen avek en madanm dan mon distrik e an se moman, *apparently* i ti ansyen *Chairman* lo sa *Board*. Mrs Jeannine Chang Faye in dir mon nonm son non.

E mon'n demann li en pe son leksperyans konmsi ki mannyer in war sa bann *Board* pe ale, ki son pwennvi lo la si sa *Board* pe fermen, be sa madanm li sa ki in dir mon Mr Speaker in fer mon ganny en konpran poudir ki sa *Board* i merite fermen.

Akoz li in dir mwan i merite fermen? In fer mwan ganny en konpran poudir sa konsey i sipoze en Konsey

Board, me selman Minis ki ti pe *run the show*! In fer mwan ganny en konpran ki menm desizyon ki li i ganny zis donnen lo en papye, i dir ki sinyen ki zot lo *Board* zot pa ti konnen.

So kekyon i nou pe demande *what the hell* nou ti annan en *Board then? Ok?* So Mr Speaker pou fini lo sa *Bill*, mon ti a kontan fer Minis ek *PS* konpran ki definitivman koman zot Manm Lasanble, mwan mon pou siport zot Polisi 100poursan. Mersi.

MR SPEAKER

Mersi Onorab. Onorab Waven William.

(Off-Mic)

MR SPEAKER

Onorab Cosgrow mon pa krwar i annan okenn pwen pou ou reponn, mersi. Nou a kontinyen. Nou pa bezwen enteripsyon ankor. Mersi. Onorab William ou annan laparol, silvouple avanse.

HON WAVEN WILLIAM

Mersi Mr Speaker. Byenveni Minis avek ou lekip. Bonzour tou dimoun ki a lekout. Mr Speaker mon krwar i bon ki nou retourn dan konteks sa *Bill* ki pe ganny avanse.

Mr Speaker pep Seselwa le 25 Oktob ti pran en desizyon e fer sanzman Gouvernman. Mr Speaker pep Seselwa pa ti'n met en lekip ki mwen kapab ouswa dezabilite dan gouvrenans pei. Mr Speaker pep Seselwa ti anvi sanzman!

Mr Speaker si ou permet mwan, mon anvi demann Minis par lefe ki letan mon'n ekout serten bann Manm lo lot kote latab, letan zot pe dir zot per, zot enkyet, zot pa konnen ki pe arive. Ouswa serten pe dir ki dimoun pe viv dan lasertitid. Be lemonn ozordi nou dan lensertitid Mr Speaker.

Mr Speaker nou tann sepa nou pe zve en vye rikord reye, me pep Seselwa in zve rikord '*sanzman!*' Mr Speaker sa Prozedlwa i dekol dan ladres ki Prezidan Larepublik ti fer le 01 Fevriye 2021 kot zot ti koz lo restriktirasyon ki pou anmennen dan bann *statutory bodies* avek bann lezot Lazans ki nesaser, sirtou dan sa nouvo lapros ki i anvi pran.

Be i pa drol ki sa *Bill* pe vin devan nou. E sa i fason fer sa Gouvernman. 43an nou ti annan en fason fer, me ozordi i annan en nouvo fason fer. Alors lot kote latab i bezwen konpran e aksepte sa akoz pou 43an nou'n aksepte sa dan en fason

fer e ozordi se en nouvo fason fer.

Mr Speaker letan mon pe regard sa ki'n ganny dir, mwan mon pou demann avek Minis, Minis zot konn tre byen poudir sa group mwen fortinen ouswa mwen kapab ouswa bann dimoun aze zot annan bann lenkyetid letan i annan bann kontradiksyon, ouswa bann lenformasyon ki pa dan konteks ouswa ki ganny fer pou konfiz sa de group dimoun.

Alors mon pou demann ou, silvouple apre ki sa *Bill* in pase pou la dan en Tet a Tet program lo televizyon, menm si pa ou, me serten bann dimoun dan ou Minister ale eksplik akoz. Mwan mon lafreyer se ki nou pou ganny en konferans de pre kot pou annan plis konfizyon ki pou ganny senmen dan sosyete.

Mr Speaker mon anvi osi dir ki dan en nouvo fason fer i pa vedir ki ou fodre ou annan Konsey. Me sa ki mon a demande se ki Minis letan sa sanzman pou ganny fer ki zot vin a labaz. Akoz a mon eksperyans o nivo distrik mon pa satisfè avek lafason ki keksoz in ganny fer.

Me nou ti viv avek. Nou pa'n kapab demann tou kestyon ki nou ti anvi. E mon kapab servi en legzanp, me mon

pa pou al ladan. Legzanp Onorab Naddy Zialor. Mon kontan ozordi ki Onorab Naddy Zialor i dan Lasanble.

Akoz i annan en Onorab ki dir li petet li i pa ti pou la si sa Gouvernman ti la sa lepok, me mon anvi anmenn sa lot kote pou dir be Onorab Naddy Zialor osi petet pa ti pou ganny son sans, si ti napa *sanzman!*

(APPLAUSE)

HON WAVEN WILLIAM

Mr Speaker mon anvi demann avek Minis ki letan zot vin a labaz asire ki tou bann akter konsernen zot ganny enplike dan sa diskisyon. Akoz i annan keksoz pou aranze. Mon kontan ki sa sanzman in vini, i donn nou sa lokazyon pou nou revwar.

Akoz Onorab Zialor in fer mwan konpran poudir se ki annou pa met latansyon lo sa dezabilite. Annou met latansyon lo sa abilite ki sa dimoun mwen kapab i annan. Akoz tro bokou letan dan lepase nou'n met *focus* lo sa dezabilite, me nou pa'n met latansyon lo sa abilite ki sa bann dimoun zot annan.

Alors mon ti a kontan ki *focus* i ganny mete lo la. Akoz sa ban dimoun zot anvi kontribye dan lasosyete. Mr

Speaker avek sa de pri mo parey mon dir i bon ki nou met keksoz dan konteks. Alors Minis ou pou annan sa sans pou eksplike tou sa bann kestyon ki'n ganny demande.

E mon krwar ki ou pou ver en bon travay e parey mon dir mon lapel solannel avek ou, se ki ou Minister zot pa aret sa konversasyon ki zot in gannyen dan Lasanble, me kre en lot loportinite pou eksplik pep seselwa egzaktman kwa ki pe arive. Mersi.

MR SPEAKER

Mersi Onorab. Minis in ariv ler pou nou ekout ou repons lo deba.

MINISTER MARIE-CELINE ZIALOR

Mersi Mr Speaker. E mon ti krwar mon pou dan Lasanble en pi gin letan. Mon krwar mon kontan. Mon kontan akoz i en topik ki'n anmenn bokou diskisyon. E mon remersye tou bann dimoun ki'n demann kestyon, demann leklersisman i annan diferan lopinyon.

E pou mwan me fer somer Mr Speaker e mon'n met mon larepons dan trwa diferan seksyon e pou anmenn an konteks sa Prozedlwa ki devan Lasanble ozordi. Premyerman mon'n ganny, en komanter in

ganny pase ki mon edikater, e lasemenn ansennyan la mon pou al met mon sapo en kou ,parey in ganny propoze.

E mon pou al fer en pti gin listwar pou mon montre. E mon pou komans par sa dernyen komanter ki Onorab William in fer. Konsiltasyon, lenformasyon i pa pe komans la ozordi e i pa zanmen fini la ozordi.

Si zot rapel byen nou kapab koz bokou lo *verbatim*, al get *verbatim* ;- lannen pase, lannen pase ler nou ti vin prezant Bidze pou Minister sa propozisyon ti en preparasyon, ti ganny diskite dan Lasanble li. I ti ganny diskite PS Roucou pa ti ankor vini, PS ki ti la oparavan in ti eksplike, ti ganny bokou kestyon lo sa de Konsey.

E lo ki laliny bann reform pou ganny fer, zisteman avek nou bann nouvo Polisi ki ti'n komanse e avek Bidze. Savedir i en konversasyon ki'n komans depi lannen pase.

E mwan mon vwar i drol Mr Speaker ki mannyer bann Manm Lopoziyon pe dir napa lenformasyon. Mon akont zot ki mannyer sa restriktirasyon ti vin an plas.

4 Novanm 2020 mon antre dan Lofis Minis, e petet an komanter ankor mwan osi mon pa sorti dan en profesyon

politisyen ni dan biznes ezyen, parey in ganny dir e lenpresyon ki nou pe donner kekfw petet kekfw poudir Gouvernman ki o pouvwar, i regard zis en serten group dimoun. Mwan osi mon pa ti pou la ! Mwan osi mon pa ti pou la.

E mon'n vini le 4 Novanm, ler mon vini *PS* ki ti la avan, dan Gouvernman oparavan *Chairperson* sa de Konsey dan Gouvernman oparavan, enkli lezot manm, enkli sa kantite lezot dimoun bann non ki'n mansyonnen ki pa'n ganny mansyonnen.

Ki'n vin vwar nou, ki'n vin vwar mwan personnelman, ki'n vin vwar *PS* personnelman ki'n annan en diskisyon depi le 4 Novanm ziske la, avek tou sa bann konsern ki zot in annan akoz sa bann Konsey pe ganny difikilte pou zot kapab desarz sa bann manda.

E tou sa ki'n ganny dir konsilte, nou, nou pa konsilte, mon war i drol zot pa konnen. Akoz nou ganny dir nou pe vin zis diktater.

Be nou ki'n ekoute, sa ki nou pe fer ozordi i akoz nou'n ekout sa bann dimoun ki ti pe deservi lo sa Konsey. Nou'n ekout ladministrasyon bann dimoun, bann teknisyen ki ti pe travay la. Nou'n ekout lakominote sa de group dimoun

ki'n vini, tou sa kantite lorganizasyon non-gouvernmental ki mon'n war.

Nou'n al vizit nou bann zil. *Off-camera* tou, nou pa'n bezwen esper televizyon ouswa esper vin dan Lasanble letan in annan *camera SBC* i la, ouswa TeleSesel pou nou fer keksoz ek nou leker ki byen. Enkli bann Manm Onorab osi ki'n fer bann diferan konsern ariv kot mon lofis, sirtou Onorab Zialor, Onorab Esparon, Onorab Doyace Porice.

Sa bann larestan Onorab ki pe koze bokou lo zot lanvi pou ed sa bann dimoun, ni enn sa bann konsern pa'n zanmen ariv kot mon lofis. Savedir sa bann petet komanter lo kote politik konsiltasyon lenformasyon, mon ape korize la.

E nou'n fer setou - konsiltasyon. Nou pa'n vini pou nou vini, pou nou vin tir sa bann Konsey, zis akoz nou pe fer sanzman.

Nou'n vini koman nou'n vini lo mon latab in annan en gro *file*, tou lede. E mon'n bezwen fer sir vini sorti kot Minister Finans pou al regard dan sa bann *trust fund* ki nou a pe koz lo la.

En kantite - resers en kantite. Asiz avek Biro *Attorney General* ki pe ganny reprezante

ozordi par Ms Amelie. E regarde eski, ki nou pou fer pou nou depay sa bann difil la, pou sa bann manda kapab ganny desarze?

AG i dir nou toultan si i annan okenn Lalwa, okenn Polisi ki pe anpaye, nou pa ganny kondannen par sa. Annou retire. E nou ekout Konsey. Konsiltasyon in ganny fer en kantite. Lenformasyon i la li i pa bezwen neserman lo parey sa ki nou dir an Angle *mainstream media*.

I nou responsabilite osi koman nou'n ganny dir bann dirizan ki serye, dirizan ki serye vwala ki i fer, i ekoute ler bann teknisyen, bann dimoun in anmenn tousala i ekout Biro *Attorney Zeneral* e regarde ki pli bon fason. Ler kantmenm televizyon pa pe filmen, nou'n ale nou'n al partou en bon pe landrwa avek detrwa zot e mon kapab dir osi la Digue.

Me Onorab Rocky Uranie, nou'n marse ansanm La Digue. I konn byen li e tou sa bann konsern ki'n met devan li ki son Gouvernman pa'n fer La Digue. E nou ti ansanm, tann parey, nou pa'n tann atraver en trwazyenm, en *third party* parey nou dir. Lo tou sa bann servis ki sa bann dimoun la Digue ti pe dir zot manke, sirtou pou sa bann group.

Mon pou servi sa mo dezabilite, akoz Lalwa i servi dezabilite e Lalwa i servi dimoun aze. Vwala sa de terminoloji, ki mannyer larestan dimoun i enterprete sa i dapre zot. E in annan pa mal konplent e konsern. E nou retourn ankor kot sa bann Konsey, zot in eksplik nou ki difikilte.

E alors vwala en pti git Mr Speaker listwar ki mannyer nou'n ariv la e i pa fer premye konversasyon so nou pe fer krwar. E nou krwar piblik pa konnen? Nou ki pa konnen ki piblik konnen. Nou ki pa konnen ki piblik.

Akoz mwan mon ganny bokou mesaz, nou ganny bokou rankont. W la letan *PS Roucou* in antre dan lofis, in fer osi en kantite miting avek diferan lasosyasyon trwazyenm-az dezabilite, diferan group dimoun, pou nou kapab pran sa bann desizyon ki ou vwar ozordi nou pe vin anmenn devan Lasanble Nasyonal. Sa i mon premye pwen Mr Speaker.

Mon dezyenm i koz lo filozofi restriktirasyon, mon krwar nou'n ganny dir, eksplike *non-core* avek *core*. Mon krwar si mon konpran byen kwa ki *core* kwa ki *non-core*. Si nou pe dir Onorab Henrie in dir nou,

nou annan en popilasyon ki pe vyei, en bon group dimoun.

E nou'n koz bokou lo lenportans sa de group dimoun. Zot ti vreman enportan pou Gouvernman oparavan, akoz zot ti *non-core* zot pa ti *core*? La ki nou a pe fer, nou a pe dir zot en gran group dimoun e nou a pe fer en fason ki dan restriktirasyon filozofi zot vreman enportan.

E nou pe fer mannyer ki zot ava ganny en platform anba zot divizyon, pou zot kapab anmenn bann servis pli spesyalize, bann servis pli modernize ki lasyans konmela i kapab ofer nou bann dimoun.

E avan ti annan en pe difikilte pou bann Konsey kapab fer sa, e zot in demande ki zot vin travay ansanm ler sa reform ki nou a pe dir fer la, i en reform restriktirasyon, i pa en reform ki pe tir fonksyon li.

Nou a pe zis tir en Lalwa ki a pe anpes enplimant bann nouvo fason fer pou sa de group dimoun e ki i a permet tou larestan dimoun ki lo sa de Konsey bann Manm *Board*. E ki mannyer *Board* ti ganny fonksyonnen, sa osi mon vwar i drol Mr Speaker ki bann Manm ki'n koze dan Lopozisyon, zot pa konpran ki mannyer zot prop Gouvernman ti pe fonksyonnen.

Dan sa *Board* mon a eksplik zot, sa de Konsey la ti annan zis *Board*, sirtou pou bann dimoun dezabilite i ti'n fer lanmwatye, i ti'n kwi lanmwatye, lanmwatye pa ti ankor ni fini kwi. I ti annan zis en group dimoun la ki pa i travay plen tan zot, zot ti lo en *Board*.

E *Board* i zwenn, i pran serten petet bann desizyon, zot ganny difikilte akoz parey mon krwar nou'n ganny dir par Onorab ki'n koze, ki i Minis tout fason ki ti pran tou bann desizyon.

Par egzanp zis avan eleksyon lannen pase, Minis in pas kot tou *Home* in dir ek zot aret fer kontribisyon. Prezidan pou pran swen ek zot, pa trakase ! Sa i bann desizyon ki ti annan *Board*, ti annan tou sa Konsey ki pe dir pou retir kontrol. Zot in pase. Mon'n pas kot bann lakour vye dimoun vwala ki zot pe dir.

E Departman li lafanmir i pou annan bann profesyonnel ki pou'n ganny lantrennman, ki pou'n devlop kapasite. I annan plis ki nou bezwen bann lenformasyon ki nou a pe gannyen avek Minister Lasante, avek osi Departman Sosyal i montre nou ki nou bezwen agrandi.

E vizyon Departman se annan bokou plis diferan servis spesyalize e kalite servis pou tou dimoun ;- enkli nou bann dimoun aze e avek bann dimoun ek dezabilite. E ler nou annan nou en Departman ki vin en platform, lafason ki nou pou fonksyonnen se ki, Gouvernman i pa pou vin fer tou keksoz i pou en fasilitater regilater.

E Departman anba gidans PS Roucou i ava regard tou bann Polisi ki zot pe demande in koz lo la, revwar tou. E parey Onorab Henrie in propoze, regarde ki proteksyon e anba ki Lalwa ki mannyer nou pou anmennen, pou nou annan plis proteksyon pou sa de group dimoun.

E nou'n ganny konsiltasyon avek *Attorney Zeneral* e manmzel Amelie ti pe eksplik nou ki la pou le moman anba nou sistenm anba nou Lalwa nou napa, nou napa en definisyon kwa en Konsey.

Akoz nou vwar parey i annan Konsey pou bann Ansennyan, Konsey pou bann Nurse, Konsey Dimoun Aze, tou bann Konsey, Konsey Nasyonal Lazenes, Konsey *Sport*. Tousala i fonksyonnn vremen diferan, i anba Konsey. Lazans osi napa en definisyon pou Lazans.

Vwala sa bann restriktirasyon ki nou, nou pe dir pou vin fer, e ki nou kapab annan liniformite e fer sir ki i annan kontrol- i annan kontrol. E mon ti ava anvi ankor Mr Speaker eksplik en keksoz kler se ki lo kote *staffing* ki'n leve, sa bann dimoun ki ti lo *Board* zot pa ti *staff* permanan, zot ti ganny zis en *allowance* parey tou *Board* i gannyen.

E zot ti annan petet en sekreter ki ti dan Sekretarya Minister ouswa Departman, ti Departman Sosyal avek Lafanmir oparavan, ki li prezan i pe sey egzekit tou sa kantite fonksyon ki mon'n mansyonnen dan mon lentrodiksyon. La pou sa lavantaz restriktirasyon se ki pou annan en Departman an antye.

Sa Departman Lafanmir i annan 3 divizyon. E nou'n koz lo bann dimoun spesyalize ki pou ede. Nou annan dan Departman ki pou vin donn en sipor aprezan pou enplimantasyon tou sa bann manda, tou bann spesyalize pou sa bann dimoun dan sa de kategori.

E mazin byen, bann dimoun avek bann dimoun aze i pa zis bann dimoun ki dan *Home*. Mon napa - mon ganny demande pou mwan donn en pe par distrik. Nou napa, be se sa

ki prezan sa divizyon, Departman pe lyez avek Departman Gouvernman Lokal pou ganny tou bann lenformasyon, pou fer sa ki nou apel *profiling* tou nou bann dimoun aze ki pa distrik, ki laz zot annan.

Parey avek tou bann dimoun ki annan dezabilite, pou regarde pou nou kapab prezan pran desizyon baze lo lenformasyon ki nou pou anmase. Nou pou anmas bokou avek Lasante par egzanp.

E mon a donn zot zis en pti legzanp letan nou a pe koz lo ki bann servis an plis ouswa modern pli bon nou pou anmennen.

Lasante pe dir ek nou la kantite dimoun ki pe ganny dyabet bann dimoun aze pe ogmante. I alarman en kantite. E zot pe vwar en logmantasyon zot bezwen prezan pe koup ledwa, lipye nou bann dimoun. E nou pe dir be *ok* annou al rod bann spesyalis regarde.

E i annan en dimoun prive ki'n vini avek en proze e ki'n dir nou ava anmenn sa servis pou tou dimoun - pa zis bann ki dan *Home* pou pran pli bon swen ek zot lipye pou fer sa ki nou apel en *pedicure* spesyalize pou sa bann dimoun sa laz, pour ki zot pa a bezwen koup zot lipye an antye.

E sa pa ti pe ganny fer oparavan e i annan lezot ankor bann lezot servis ki Lasante, ki sosyal pe dir nou e ki nou, nou pou bezwen kapab vin sa platform ki pe pouse pou *provide*.

Pa Gouvernman ki pou *provide*. Nou fer partenarya partou avek prive e en kantite lorganizasyon ki pe vin devan. Koman nou lans lapel, zot vini en kantite pe vin devan. E zot pe vin donn en sipor donn en koudmen. E nou pe al lans sa program pou lasante lipye bann dimoun aze tre byento.

E i annan lezot ankor ki kot divizyon "*Qualité de vie*" kot PS Roucou ki'n fini pe fer e zot annan en kantite kliyan ki zot a pe fer ki zot a pe swiv. E i napa zis sa li, i pou annan bann resours ki nou partaze. Nou partaz resours i annan en analozi ki'n servi ki si ou al laboutik mon krwar Onorab Arissol ki'n dir letan ou larzan i reste i retournen, e se sa ki nou pe fer dan Minister.

Se ki ler i annan bann *savings* ki nou fer, akoz nou bann dirizan ki serye. Nou'n serye nou, nou'n fer mannyer nou'n koup tou sa bann tiyo ki ti pe *leak* nou'n aranz tousala. E nou fer sir sa bann *trust fund* partou kote ki ti napa en lord ladan ki pou annan

latransparans e ki *PS Roucou* pou fer bann Komite latransparans ki regard zesyon sa bann fon.

E bann Polisi ek bann Lalwa ki i pou anmennen, ki pou fer sir ki sa i ganny zere e latransparans byen. E vwala en pe filozofi e restriktirasyon ki nou pe vin avek Mr Speaker.

Mon trwazyenm pwen se lenpak pozitiv ki i pou annan, lenpak pozitiv se ki la sa bann dimoun pou napa zis de Konsey, enn pti pe ki pe ganny difikilte pou zot *operate*. Zot pou annan en Minister an antye e nou partaz resours nou.

I annan trwa portfolyo e i annan deza sa bann program ki pe ganny ekrire ki Konsey pour laznes in komans fer ki pou osi apel *Generation Bridging Gap* ki pou fer bann dimoun pli zenn ed sa bann dimoun aze.

E en pli bon relasyon ki annan bokou plis program avek zot. I en gran lavantaz akoz nou partaz resours bokou pli byen, bokou pli efektiv. E i annan bokou diferan Komite ki pe kree ki pou regard bann lezot bezwen e bann lezot program.

Akoz Gouvernman napa monopoli lo nide bann dimoun ki anvi fer program. Kre bann diferan Komite. Nou, nou donn bokou sipor pour nou kapab fer

sa. E reprezantasyon lo zil definitivman, *PS* in monte avek son lekip wikenn pase. In monte e ankor parey mon'n dir nou koz bokou, nou enkyet, nou konsernen. Miting i ganny fer selman nou pa la, napa person lo La Digue ki ti la par egzant e ...

(Interruption)

MR SPEAKER

Minis kontinyen.

MINISTER MARIE-CELINE ZIALOR

E Mr Speaker provizyon se ki letan i annan sa bann rankont, nou ti ava swete kantmenm i annan en reprezantan i vini e ki ansanm nou nobou kapab ganny bann lenformasyon lo kote reprezantasyon, lo kote ki mannyer nou fer bann konsiltasyon, lenformasyon ki nou ape koz lo la bokou.

E definitivman sipor ladministrasyon ki ti napa pou sa de Konsey oparavan. Zot in konplent pa mal, lo zot napa okenn sipor ladministrasyon ler zot zis en *Board* tousel. E ki napa okenn Lazans ki swiv. Napa en lorganizasyon ki pou ede pou zot kapab enplimant zot bann program.

E zot in agree sa bann dimoun pou zot kapab vin donn

zot sipor teknik, e i annan menm ki'n fini ouver zot lorganizasyon, pou li kapab vin donn sipor sa.

E vwala en pti gin mon krwar Mr Speaker si mon nobou kapab tous tou bann konsern avek bann komanter ki'n ganny fer lo kote sa Prozedlwa. E mon ti a kontan fini avek konsernan *Board of Trustees* e sa bann *trust fund* Komite pou ganny fer, pe ganny kree.

Deza diskisyon pe ganny fer pour ki sa bann *Board of Trustees* pa ganny zere par Departman. I ganny zere par en Komite bann group dimoun. E sa bann group dimoun parey mon'n dir zot pa pe al, zot pa pe disparet zot. Zot pe reste la i zis sa striktir ki pe modernize ki pe fer li en pi pe pli byen.

E kontribisyon dan *Home* ki'n ganny touse, mon pa konnen ki mannyer lekonomi pei i pou kapab soutenir ki nou bann dimoun ki dan *Home* bann dimoun aze ki napa kontribisyon.

Sa bann manigans politik i ti ganny fer lannen pase avan eleksyon, pou dir zot pa pey ditou - zot ti pe peye zot - pa pey ditou. E la nou a pe fer analiz e nou bezwen anmenn devan *Cabinet* pou nou kapab annan benn diferan Polisi konsernan bann home enkli osi tou ki

mannyer bann *carer* pou nou kapab formaliz *carer* ansanm, avek larestan Departman avek Lazans ki konsernen.

E sa bann desizyon bann diskisyon e avek bann lenformasyon an mezir ki i ganny aprouve i kapab. Me selman nou'n bezwen koz avek sa bann dimoun dan *Home*. Konsiltasyon, nou bezwen koz avek zot pou nou kapab vin dir ek zot nou pou bezwen kontribye.

Nou bezwen mazin osi Mr Speaker i annan bann dimoun osi ki pe espere pou zot ganny en plas dan en *Home* pou zot vini. E letan nou fer kontribisyon nou kapab fer plis *Home* pou sa bann dimoun ki pe espere pou zot osi kapab ganny en plas.

Pa aköz nou, nou'n antre dan en *Home* prezan nou pa mazin nou kanmarad ki demen ki li osi i bezwen antre dan en *Home*. Apre osi i divizyon, i pa en divizyon ki zis pou *home* i divizyon dimoun aze. I annan bann dimoun aze ki pa dan *Home* li, i pa dan *Home*.

Be li osi i fer kontribisyon dan pei. In fer e li osi i a pe esper bann servis spesyalize ki pou li ki pou son lasante, ki si in par lao 75an, 80an nenport ki bann benefis ki i osi avek bann bezwen ki i bezwen li osi

pou li kapab zwir sa ki i pa zis en sel group dimoun ki pou zwir sa bann servis.

E bann larestan zanfan ki ti a kontan zot paran osi kantmenm zot a pe *take care* byen ek zot paran, ki sa bann servis i annan en kantite servis, i pa aköz fot prensipalman nenport ki dimoun. I zis ki keksoz i evolye.

Nou ti napa en pandemik par egzanp detrwa lannen pase, nou annan la. E keksoz i evolye e bann larestan maladi ki prezan pe vini pe atak bann diferan group dimoun e bann servis ki nou bezwen i bezwen evolye.

E vwala en pti gin mon some - mon somer si oule, mon *summary*. Mr Speaker en pti gin leksplikasyon lo sa Prozedlwa ki nou a pe demann sipor Lasanble. E mersi bokou pou tou bann Manm ki pou siport nou pou sa Prozedlwa, e osi tou nou respekte lopinyon sa bann ki pa krwar dan sa fason fer e mon ti ava kontan swet tou dimoun Mr Speaker en *bonne* kontinyasyon.

E nou, nou reste angaze devan *camera as well as* pa devan *camera*, pou nou kapab avans ver lavan. E pran tre, tre, tre bon swen, swen pli bon ki lemonn ki nou kapab *afford* pou nou bann dimoun aze. E

ansanm avek nou bann dimoun dezabilite. Mon pa pou repet bann leksplikasyon ki bann lezot Manm in donner.

Me selman mon ti a kontan donn garanti Minister, garanti Gouvernman, garanti Departman Lafanmir ki nou pou fer sa, nou napa monopoli. Nou anvi ede vreman, vreman anvi ede *off-camera as well*. Vini nou ava kapab vreman ed nou bann dimoun osi, nou vreman anvi ed zot.

E i annan pa mal louvraz pou nou fer, nou *welcome* tou dimoun ki senserman anvi ed nou bann dimoun, i dwa tou dimoun dan Sesel mon kontan dir sa. E i garanti anba konstitisyon nenport! Nou pe koz enklisivite dwa tou dimoun anba konstitisyon, nou bliye parfwa.

I ganny garanti. E nou, nou la pou fer sir ki sa bann drwa i ganny, nou kapab zwir sa bann drwa pou tou nou bann dimoun. Mersi bokou Mr Speaker.

(APPLAUSE)

MR SPEAKER

Mersi Minis. Onorab Uranie mon pa pe donn ou laparol. Mon krwar pa si i annan en pwen ki demann adres.

HON ROCKY URANIE
(Disruption)

MR SPEAKER

Mersi nou pe prosede, nou pe prosede.

HON ROCKY URANIE
(Off-Mic)
(Interruption)

MR SPEAKER

Ou napa laparol.

HON ROCKY URANIE
(Off-Mic)
(Disruption)

(Mic switched off)

MR SPEAKER

Onorab Uranie out silvouple ziska apre midi!

(APPLAUSE)

MR SPEAKER

Ale. Mersi. Nou a prosede avek vot lo merit zeneral sa *Bill*. Manm ki an faver lev lanmen silvouple? Mersi, ou'n gannyen, Manm ki kont lev lanmen silvouple. Vot lo *General Merit of the Miscellaneous (Repeal of Statutes) Bill, 2021* in ganny 20 vot pour, 6 vot kont e 0 abstansyon.

Donk sa *Bill* in pase lo *general merit*, mon a envit

madanm Clerk pou fer *Formal Third Reading*.

MADAM CLERK

Mersi Mr Speaker. A *Bill for an Act to provide for the Repeal of the National Council for The Elderly Act, 2018 (Act 2 of 2018) and the National Council for The Disabled Persons Act, Cap 138 and provide for matters incidental thereto or connected therewith*. Mersi Mr Speaker.

MR SPEAKER

Mersi madanm Clerk. Mon war dan versyon ki mon annan ki *Bills Committee* i annan enn de lamannman ki paret mwan, i paret mwan ase senp.

So mon pe espere ki nou a kapab fini avek li dan sa sesyon. Mon ava apel Onorab Hoareau pou prezant amannman. Nou a pas dan Staz Komite. Onorab Hoareau ou kapab komanse.

HON JOHN HOAREAU

Mersi Mr Speaker. Bonzour Minis ek ou lekip. Bonzour tou dimoun a lekout. Nou premye lamannman i ganny trouve lo dan *Clause (5) (2)* i lir koumsa; 'Any right, privilege, obligation or liability acquired or incurred by a person under ...' 'either' nou tir sa mo 'any' nou met 'either' ok? Lo dezyenm

lamannman i ganny trouve lo *Clause (7)*.

Mon pou lir – “*On the commencement of this Act the members of ...*” – ‘each’ nou met sa mo ‘each’, nou tir sa mo ‘the’ ‘Councils’ i tir sa let ‘s’ avek “*established under The Repeal Acts shall seize to be*” nou tir ‘the’ – “*of members of the Council or of the Board of the Council as a case may be and shall vacate ...*” – ‘their’.

Nou met sa mo ‘their’ nou tir ‘his or her’ - “*office and the members of the Council shall not be entitled to claim any compensation for the premature termination of the terms of their respective offices.*” Nou tir ‘his or her’ - “*or any contract of service with the Councils or the government.*” Mersi.

MR SPEAKER

Mersi. Eski nou a kapab zis regard avek *panel* si sa bann amannman in annord? *Ok* tre byen. Eski i annan okenn lot amannman, klarifikasyon sorti kot lezot Manm pou Staz Komite?

Bon si napa nou a kapab repas dan Staz Lasanble. E mon a demann Onorab Georges pou prezant Mosyon pou *Third Reading of the Bill*.

HON BERNARD GEORGES

Mersi Mr Speaker. Mr Speaker anba *Order 76(1)* nou *Standing Orders*, mon *move* ki *Miscellaneous (Repeal of Statutes) Bill, 2021 as amended* i ganny lir en Trwazyenm Fwa. Mersi.

MR SPEAKER

Mersi. Mon a ganny en segonnman silvouple? Onorab Sandy Arissol.

HON SANDY ARISSOL

Mr Speaker apre bokou diskisyon mon ti a kontan segonn Mosyon propoze par Onorab Georges *as amended* ganny segonde. Mersi bokou Mr Speaker.

MR SPEAKER

Mersi. Nou a pran vot lo *Third Reading of the Bill*. Manm ki an faver lev lanmen silvouple? Mersi. Manm ki kont? Vot lo *Formal Third Reading of the Miscellaneous (Repeal of Statutes) Bill, 2021 as amended* in ganny 20 vot pour, 5 vot kont e 0 abstansyon. Donk *Bill* in aprouve lo *Third Reading*.

Mon a remersye bann Manm pou zot entervansyon mon a demann Madanm Clerk pou fer *Third Reading of the Bill* avan nou terminen.

MADAM CLERK

Mersi Mr Speaker. *This Act may be cited as a Miscellaneous (Repeal of Statutes) Act, 2021.*
Mersi Mr Speaker.

MR SPEAKER

Mersi. Avek sa nou a kapab terminen lo sa *Bill* ki a vin Lalwa lo *assent* Prezidan. Mon a remersye bann Manm e mon remersye Minis, *PS* e *Legal Counsel* pou zot partisipasyon e mon a swet zot bonn kontinyasyon.

Nou a *overtime* en pe donk mon a retard *sitting* apre midi par en demi erdtan nou a komans 2er edmi. E mon a osi dir ki bann Komite i a ganny retarde par en demi erdtan parey. Mersi nou *adjourn*.

(BREAK)

MR SPEAKER

Bonn apre midi tou Manm Onorab. Bon nou a kontinyen avek nou *Order Paper*. Onorab Uranie mon ava adres ou en moman silvouple. Bomaten ler mon'n - pa bomaten ti apre midi dan dernyen sesyon ler mon'n demann ou pou sorti, ler ou'n leve ou'n kriy avek mwan. Sa mon krwar i pa akseptab e i mank respe. Alor mon demann ou pou *apologies*.

HON ROCKY URANIE

Mr Speaker mon *apologies* si ou santi ki mon'n kriye, me selman kekfwa mon koz en pe for. Ordinerman mon pa abitye mank respe pou dimoun. Ou en Speaker ou'n deza en ansyen ansennyan mwan osi tou parey e mon annan bokou respe pou ansennyan.

Me selman zis met lo rikord pou medya tande e dimoun deor tande, ki mon ti annan reprezantan dan miting Vandredi ki ti fer La Digue ki Minis ti dir mon napa. Se pour sa rezon ki mon ti pe lev lanmen pou mon demann ou pou mon kapab dir Minis poudir mon ti annan reprezantan dan sa miting. Mersi Mr Speaker.

MR SPEAKER

Mon konpran. Mersi pou ou *apology*. Bon nou pou prosede avek, atann en pti moman mon annan de *Order Paper* la. Byen nou pou prosede avek lot *Bill* mon ava apel Vis-Prezidan e son delegasyon silvouple.

E sa ki nou pe pran la i *Penal Code (Amendment) Bill, 2021*. Bonn apre midi Vis-Prezidan ki avek nou pou sa *Bill* e bonn apre midi e byenveni osi *Attorney Zeneral* Mr Frank Ally ankor enn fwa e Ms Vania Marimba Asistan *Legal Draftsperson* dan *AG's Office*.

Nou a pas lo *Penal Code (Amendment) Bill* e mon a demann *Leader Biznes Gouvernman* pou prezant Mosyon pou *Second Reading*.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi Vis-Prezidan. Ou la en pe souvan sa semenn. Bonn apre midi *Attorney General* ek Ms Marimba.

Mr Speaker anba *Order 69(2)* mon *move* ki *Penal Code (Amendment) Bill, 2021* i ganny lir en Dezyenm Fwa. Mersi.

MR SPEAKER

Mersi. Mon a ganny segonnman. Onorab Arissol.

HON SANDY ARISSOL

Mr Speaker mersi. Bonn apre midi *VP* avek ou delegasyon. Mon ti a kontan segonn Mosyon propoze par Onorab Georges. Mersi.

MR SPEAKER

Mersi. Vis-Prezidan mon apel ou pou prezant sa *Bill*.

THE VICE-PRESIDENT AHMED AFIF

Mersi bokou Mr Speaker. Bonzour *Leader Government Business*. Bonzour tou bann

Manm Onorab e tou dimoun a lekout.

Mr Speaker *Penal Code (Amendment) Bill, 2021* i en Prozedlwa ki'n ganny prepare anba proze revizyon Lalwa Sesel. Sa Prozedlwa i annan lobzektif prensipal, de lobzektif prensipal. Premye se pour retir difamasyon kriminel e ogmant laz kot en zanfan i kapab ganny sarze avek en lofans pou sorti 7an pou vin 10an.

Sa Prozedlwa i osi entrodwir lofans *bomb hoax* e menm moderniz bann lamannman anba Kod Penal e lezot amannman.

Difamasyon kriminel: sa Prozedlwa i anvizaze retir difamasyon kriminel par retir seksyon 184 e 191 dan sapit 19 Kod Penal. Mr Speaker partou dan lemonn difamasyon kriminel i poz en gro problemm.

Isi dan Sesel i rar pou en dimoun ganny sarze avek sa lofans, e dan sa dernyen 10an zis en dimoun ki'n ganny sarze e zize. Sa sete Mr Bernard Sullivan devan Lakour Siprenm. Son kondannasyon ti size en lapel devan Lakour Dapel e osi ganny pibliye dan medya enternasyonal.

Wi i vre ki i rar pou en dimoun ganny sarze avek sa lofans isi Sesel, me selman sa Lalwa i kapab ganny servis pou

silans medya ki en menas pou laliberte lekspresyon. Fodre fer kler Mr Speaker ki Lalwa lo difamasyon kriminel i pa ganny servi pou protez repitasyon personn me zis ganny servi pou silans bann ki opoz Gouvernman e bann Zofisye Gouvernman.

Alors sa propozisyon par Gouvernman pou retir difamasyon kriminel, i en letap dan en nouvo direksyon. E i en sinyal pozitiv pou medya e la lakominote enternasyonal.

Mr Speaker Lofis Biro *Attorney Zeneral* in donn konsey Gouvernman ki difamasyon kriminel i en vye konsep e i enkonzistan avek bann norm e pratik anba Lakor Enternasyonal, ki Sesel in sinyen.

Lartik 19 *International Convention on civil and political rights* e bann provizyon *universal declaration of human rights*, i kondann bann limitasyon difamasyon kriminel ki ganny fer kont drwa lo lekspresyon laliberte.

Alors retir difamasyon kriminel pou liberte nou, nou dwa laliberte lekspresyon e donn medya plis laliberte pou efektifman fer L'Egzekitiv, Lezislatif e bann brans Zidisyer rann kont.

Nou osi bezwen fer kler, ki Sesel i annan bann lobligasyon enternasyonal ki i ti ganny fer dan lepase, pour ki difamasyon kriminel i ganny aboli. Mr speaker konmela nou annan bann lezot alternativ ki kapab ganny servi pou adres sa size difamasyon.

Sa ka, "RAMKALAWAN *versus* PARTI LEPEP" e "ERNESTA *versus* BASTIENNE" i demonte ki politisyen i parey nenport lezot dimoun, e zot kapab servi difamasyon sivil anba *Code Civil* Sesel kan zot repitasyon i ganny sali.

Mr Speaker an rezilta sa propozisyon Delwa *Attorney Zeneral* pe revwar bann lezot Lalwa e i anvi adres bann lezot size enportan par egzanp *cyberbullying*, ek *cybercrime*. Annefe *Cybercrimes and Other Related Crimes Bill*, 2021, pou s semenn ganny pibliye dan Gazet Ofisyel e Lasanble a ganny sans deliber li la byento.

Osi menm ki *hate speech* setadir bann form kominikasyon ki ganny servi pou fer bann latak diskriminatwar baze lo ras, seksyalite ek nasyonalite eksetera, *Attorney Zeneral* pou met sa bann propozisyon devan Gouvernman an lefitir.

Laz ki en dimoun i ganny sarze avek en lofans kriminel :

Mr Speaker isi Sesel en zanafan i kapab ganny trete, i kapab ganny arete, detenir i ganny sarze avek en lofans kriminel depi laz 7an. Mr Speaker mon'n ganny dir ki laz ki en dimoun i ganny sarze avek en lofans kriminel isi Sesel, i pli ba ki lezot pei dan lemonn.

Mon ganny dir ki laz minimum ki en dimoun i ganny sarze avek en lofans kriminel i 7an e sa ti ganny etabli par nou lezislatur an 1952. 70an apre ki sa Lalwa ti vin anfers, gran progre i ganny fer dan sa ki konsern etabli devlopman sosyal.

E *neuropsychologique* en zanafan pou tou dimoun kapab agree ki laz 7an i tro zenn pou ekspoz en zanafan a en sistenm Zidisyer kriminel ki tre strik e ki tre sever. Apre bokou konsiderasyon Gouvernman in decide azir lo konsey Komite Konsiltatif previzyon bann Lalwa.

In propoz ki laz *minimum* ki en zanafan i kapab ganny sarze pou en lofans kriminel dan Sesel, i merit ganny ogmante, sorti 7an pou vin 10an. Malgre lefe ki i annan bann demann enternasyonal pou ogmant sa laz *minimum* pou ganny sarze avek en lofans kriminel pou li vin 14an.

Sa propozisyon par Komite Konsiltatif pou revizyon bann Lalwa ti ganny decide ouswa agree, apre ki sa menm Komite ti'n konsider plizyer faktor tel ki, bann pratik ki ganny fer par Lakour ki ziz bann ka ki konsern bann zanafan miner.

Nesesite pou annan balans soutenab kot i konsern koriz ban move aksyon ki bann delenkan anba laz, ouswa miner i fer, e neseseite ki lazistis i ganny fer ou bann viktim e zot fanmir, e osi avek akse ek bann sant koreksyon pou bann zanafan anba laz ouswa bann miner dan Sesel.

I bezwen ganny fer resorti ki an se moman Sesel napa sa bann fasilite neseseite pou fer fas avek bann zanfank i lo detansyon Lapolis, ouswa ki'n ganny santans dan en sant koreksyon, apre ki zot in komet en lofans kriminel.

An prenon kont en tel mankman, Gouvernman a pe travay avek bokou swen e perseverans pou li kapab etabli bann sant koreksyon ki konsern e azir dan lentere bann zanafan anba laz ki komet bann lofans. E pou promot bann mezir prevansyon kont krim parmi bann zanafan. E plis i enportan pou fer resorti ki anba seksyon 94(1) *Children's Act*

(*Cap 28*) okenn zanfan anba laz 14an pa kapab ganny santans a en term lanprizonman. E baze lo la sa, i annan en nesesite irzan pou etabli en sant koreksyon pou bann zanfan anba laz, ki an detansyon Lapolis ouswa ki'n ganny santans dan en sant koreksyon, apre ki zot in komet en lofans kriminel.

An bref Polisi sa lamannman se pour pli mye protez bann zanfan kont bann lefe advers ki ganny asosye avek kriminalizasyon, bann aksyon oubyen bann aktivite ki kont Lalwa, pandan ki nou asire ki okenn latitud ki pa akseptab ki konsern en zanfan, i ganny ankete pou konn son lakoz.

E bann mezir remedyal i ganny pran pou adres latitud konportman sa zanfan, e redwir bann risk ki sa i kapab ariv ankor.

Sekreter Prensipal Mrs Linda William Melanie e son tim pou kontiny zot travay pou revwar bann Polisi ek Lalwa Sesel an relasyon avek bann zanfan. E fer rekomandasyon deplis pou nou protez nou zanfan e redwir aktivite kriminel espesyalman parmi bann zanfan vilnerab.

Lo *bomb hoax* Mr Speaker, Komite Konsiltatif Revizyon Lalwa in rekomande ki

Gouvernman fodre propoz en provizyon pli kler lo *bomb hoax* anba Kod Penal.

Alors sa *Bill* i propoze ki en nouvo provizyon i ganny mete pour ki en dimoun i ganny sarze dan lenstans kot i fer en menas ki kapab an ekrir, oubyen par parol pou dir, ki i pou fer eksploze en keksoz ki kapab fer domaz bann propriyete, oubyen menm kre blesir oubyen okazyonn lanmor.

Penalti maksimonm pou en *bomb hoax* pou R125mil e 5an prizon. Lezot lamannman Mr Speaker, sa Prozedlwa i anvizaze fer lezot amannman. Enn sa bann i pou ogmant bann penalti ki nepli relevan anba Kod Penal.

Par egzanp anba seksyon 173(a) Kod Penal nou pe propoze ki penalti pou lofans dray loto anba lenfliyans lalkol, i ganny ogmante pou vin R25mil. An 1952 sa letan sa lanmann orizinal ti zis R1000 ziska ler ti ganny asiste par *Criminal Offences (Standard of Scales of Fines) Act, 2021*.

En lot amannman osi se pour sanz definisyon larzan pou enkli larzan vertyel parey bann *crypto currencies*. Sa *Bill* osi i anvizaze retir sa konsep '*justice of peace*' ki pour ganny konsidere ler Lasanble Nasyonal pou debat lo *Statutes*

Law Revision (Miscellaneous Amendments) (No.2) Bill, 2021 ki pou pas devan Lasanble Nasyonal byento.

Mr Speaker sa ki mon fek fer resorti i bann gran laliny sa Prozedlwa. Mon remerci ou e mon demann Lasanble pou vot an faver sa Prozedlwa. Mersi bokou.

MR SPEAKER

Mersi Vis-Prezidan. Nou a pran deba lo sa *Bill*. Nou a komans avek Onorab Hoareau.

HON JOHN HOAREAU

Mersi Mr Speaker. Bonn apre midi Mr Speaker bonn apre midi VP ek ou lekip e tou dimoun a lekout.

Mr Speaker napa en Lalwa ki statik. Vedir okenn Lalwa i bezwen servi en peryod letan, menm si in ganny ekrir dan en fason permanans. Me i bezwen servi en peryod letan ki i ladan.

Alor se pour sela rezon ki ozordi nou vwar poudir *Attorney Zeneral* in anmenn nou en seri Lalwa, en seri lamannman lo Kod Penal.

E tou sa bann lamannman parey i ganny dir i pe ganny fer pa en *Law Revision Commission* e bann laprouvasyon i ganny fer par *Cabinet* li menm.

E answit i vin kot nou pou nou donn nou *endorsement* e

pou diskrit lo merit e osi pou nou pas sa bann Lalwa si fodre. Annefe ler ou gete i annan, mon annan lenformasyon ki annan apepre 400 morso Lalwa e anviron 1700 *S.I.* ki pe al ganny revize.

E se pour se la ki dan sa prosen semenn ki pe vini pou annan ankor *Bill* ki pou vin kot nou, Prozedlwa ki pou vin kot nou kot nou pou bezwen osi donn en *Law Advisory Council* ki pou get en pti pe met en lot per lizye si oule, lo sa bann travay kontinyel ki pe ganny fer pou reviz Lalwa pou met li azour.

Me plis ki sa Lalwa i bezwen anliny avek Konstitisyon pei akoz Konstitisyon pei se Lalwa siprenm pei, se sa kontra gouvrenans ki Lepep in fer avek Gouvrenman.

E in ganny vote par en *referendum*. Alor son stati li menm i pli o - i siprenm, alor lezot Lalwa i bezwen dekol dan Lalwa Konstitisyon li menm.

Alor serten sa bann Prozedlwa ki'n vin devan la bann amannman in ganny fer pou met li anliny avek konstitisyon si oule. Mr Speaker parey in ganny dir i annan plizyer amannman ki'n ganny propoze dan Kod Penal me mwan mon pou swazir pou

koz lo de lamannman ki annan en pe plis pwa si oule.

Mon pou koz lo *criminal libel* apre mon pou koz lo *age of criminal responsibility*. Mr Speaker bokou fwa sirtou pandan letan ki nou ti dan Parti Inik, nou *freedom of speech* pa ti egziste. Alor dimoun ti ganny met anba lafreyer, pa ti kapab koze. Sel fason ki i ti pas serten lenformasyon se atraver bann pti papye ki ti ganny mete lo *bus stop* ensidswit.

E si ou ti ganny trouve pe fer, pe annan en lopinyon divers souvandfwa ou ti pou ganny met dan kaso, dan prizon san zize. Ou menm Mr Speaker ou'n pas atraver siprim ou lopinyon - sipresyon ou lopinyon plito.

Mr Speaker ozordi, *I mean* sa mwan nou pou selebre le 25 Oktob depi ler ki sa nouvo Gouvernman in antre o pouvwar.

E sa i pli gran kado ki mwan mon pou krwar ki nou pe fer avek la demokrasi - se pour retir enn fwa pour tou en baryer ki ti annan dan Lalwa, kot i ti siprim ou *freedom of speech* e nou *freedom of speech*.

Parey in ganny dir sa Lalwa li menm i anti-konstitisyonnèl e sa ti ganny teste par sa ka kot Mr Bernard

Sullivan *versus Attorney General* an 2014.

Akoz sa Lalwa i anti-konstitisyonnèl? Mr Speaker ler nou lir Lartik 22 nou konstitisyon, 22 (1) i dir nou; “*Every person has a right to freedom of expression and for the purpose of this article this right includes freedom to hold opinion and to seek, receive and impart ideas and information without interference.*”

So i donn nou en drwa fondamantal ki nou kapab ekspresim nou lekor. Me selman nou dwa parey tou drwa i aret kot drwa en lot dimoun i konmanse. Nou drwa i egal, me nou drwa i balanse osi. Alor Mr Speaker i enportan pou konpran poudir nou *freedom of expression* i annan serten restriksyon ki ganny trouve anba Lartik 22(2) lo ki fason nou egzers nou drwa lekspresyon.

E i annan apepre, i annan 6 anfen - 6 Lartik - 6 bout Lartik ki koz lo fason ki nou pa kapab afekte nou kanmarad par nou drwa lekspresyon. E an prensip dan tan modern ler nou pe gete sa bann restriksyon i kapab ganny adrese par nou bann lezot Lalwa ki la an egzistans.

Sirtou nou Lalwa ki konsern *civil defamation*. E sa Lalwa ti ganny servi an prensip

par *MR RAMKALAWAN versus PARTI LEPEP* an 2017. Alor ler nou pe gete Langleter li menm in *do away* avek *criminal libel* depi an 2010 e en lezot pei osi ki demokratik in al dan menm direksyon.

Nou osi nou bezwen al dan sa menm direksyon si nou oule, sofgard nou la demokrasi ;- si nou oule donn nou pep fason pou li eksprim son lekor. E ozordi nou kapab dir parey mon dir i en pli gro kado apre 1an ki Gouvernman *LDS* in ofer sa pep.

Ozordi nou kapab vwar poudir Mr Herminie ki *Leader* Parti *US* i kapab koze libreman, i kapab dir son lekspresyon tou le semenn, tou le mwan ler i fer son bann konferans depres. Alor napa person ki vin *harass* li menm si nou pa kontan serten sa bann keksoz ki i dir.

Mr Speaker in *legal terms* *defamatory* i parey en *misdemeanor* si oule lo kote Lalwa. *Therefore*, i pa kapab ganny plase menm nivo avek *criminal offences* anba *common law*. So si nou pou get diferans ant stati legal en difamasyon, apre nou pou konpar li avek *common law crime*, nou pou vwar poudir en *misdemeanor*, en penalti i kapab ganny *award* pou sa kalite krim kot tou sa

kalite keksoz, sa kalite lofans si oule, ki pou pey en lanmann.

E sa lanmann i en pinisyon monneter si oule ki ede pou sa dimoun restor son lentegrite e i ganny *vindicated in public* osi. I annan en serten *public apology* osi ki *go with it as well*.

Mr Speaker tandis ki ler nou pe get bann krim, bann *common law crime* anba Kod Penal sirtou, nou a war poudir tou sa bann kriminalite koumsa ki ganny kontrole, ki ganny kontrole par sa bann Lalwa, i bann krim ki entolerab dan sosyete. Alors son stati i pli for.

Si nou pa kontrol sa bann krim koumsa *therefore* dimoun pou *resort to riots, vigilantism* e pou annan *personal vendetta*. Sakenn pou touy kanmarad nou pa pou kapab viv ansanm. Alor se pour se la rezon ki sa se keksoz i pa tonm lo menm nivo, lo menm lesel.

Mr Speaker en lot parti sa lamannman ki mon dir mon pou koz lo la se *age of criminal responsibility* ki pe demann nou pou sorti 7an pou vin 10an.

Parey nou konnen Sesel i parmi bann pei ki annan pli ba laz *age of criminal responsibility*. Alor ozordi pou letan ki nou pe viv ladan in ler pou nou fer refleksyon profon. Eski nou bezwen met li 7an

oubyen nou bezwen *move* li to 10an? Ozordi 10an in ganny propoze, me petet i kapab annan divers lopinyon lo sa size.

I annan dimoun i kapab dir 12an, petet a sa pwen dan ou repons *VP* ou ti ava kapab adres sa size aköz ki 10an in ganny swazir.

I annan dimoun i dir ou 2an i ti ava pli bon, petet a 10amn devlopman en zanfan oubyen lenpak psikolojik ki pou annan si i ganny *find guilty of a crime* i pou mwens, i pou less *traumatize* pou li.

E i pou permet li petet kontiny son lavi pli tar dan en pli bon fason, *rather than* sa bann lefe ki pou fer li vin petet pli *worse* ki i ti ete avan.

Alor bokou dimoun i dir i krwar ki 12an ti ava meyer laz, me mon pou kit sa pou en deba ki nou kapab fer *openly*. Mwan mon ti a pouse ki 12an i ganny konsidere, me selman si lezot dimoun i konsider 10an mon *ok with it*.

Zanfan osi i bezwen de lot kote, ganny kontrole par zot paran e konnen poudir nou pe viv dan en sosyete pou nou viv byen nou bezwen *operate within* bann *parameters* Lalwa.

Alor dan lakour i bezwen annan en serten disiplin ki paran i enstil avek son piti pou

li kapab demen viv dan sa *wider society*, pou li kapab konform avek ban Lalwa ki egziste an deor son lakour.

Alors sa i enportan ki ozordi ki mon pe lans sa lapel ki tou paran i pran serten aksyon disipliner ek son zanfan, lo en baz montre li poudir ki ler nou pe *operate* dan lakour i annan serten Lalwa. Alor ki dan sosyete osi i annan son Lalwa alor ou bezwen konform by sa bann Lalwa.

E sa i ava evite ki nou tande lo radyo poudir en manrmay 10an sepa in kit son lakour nou pe rode kote i ete, nou pa ankor war li si zot kapab telefonn Lapolis dir kote i ete si zot war li ensidswit. Sa i ava ede pou annan plis disiplin kot lakour e plis disiplin dan li menm sa zanfan i a ede pou grandi dan en pli bon fason.

Mr Speaker avek sa mon ava remersi ou. E a ti mon kontribisyon lo sa de laspe sa lamannman ki'n ganny propoze. Mon sir ki i annan bokou lezot lamannman ki lezot dimoun pou koz lo la, me mwan mon'n prefere pou koz lo sa de. Mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun. Mr Speaker parey entervenman avan mwan in dir sa Prozedlwa ki devan nou i annan diferan konponan ki i touse. E mon ava petet zwenn li lo son dernyen bout ki in koz lo la konsernen laz ki en zanfann i kapab ganny sarze pou laspe e kriminalite.

I annan detrwa zour disi mon ti panse poudir wi kekfw a i ti merit en pe pli o ki sa 10an, be solman apre mon'n, anfet i en konversasyon menm ki nou'n annan parmi *Bills Committee*, dan nou *Caucus* nou'n diskite.

Be apre letan mon'n asize mon pe reflexion en pti pe lo nou sityasyon ki nou pe viv ozordi, mon'n sanz mon nide lo sa prensip e mon krwar poudir mon pou agree avek sa ki *panel* in vin avek devan nou.

Parski koman bann Manm Lasanble, bann dirizan dan kominote nou bezwen anvoy en mesaz ki napa okenn anbigite ladan, poudir ki zanfann malgre zot linosans depi byen zenn zot osi zot bezwen annan en sans responsabilite e konnen poudir zot aksyon i kapab annan konsekans.

Bokou nou depi en tre zennaz nou pran kont nou sityasyon nou lavi, e nou'n pran

ban desizyon konsyansye tre zenn pou nou al dan en serten direksyon dan lavi, respe sa ki pli vye ki nou, respe Lalwa, pa pran sa ki pa pou nou, annan respe pou bann lenstitisyon.

Donk mon krwar i ava en mesaz kler ki setyenn Lasanble i ava pe anvoye an siportan sa propozisyon, pou dir ki sa prensip responsabilite endividyel, ki sa nouvo administrasyon pe met aksan e pe souliny en kantite, nou oule ki osi i ekoul parmi zenerasyon lavenir.

Si ou pa anvi dan probleman pa rod probleman. I osi senp ki sa. Donk sa i mon kontribisyon pou sa bout. Me mon krwar bout ki pli enportan pou mwan se sa kestyon dezormen nou dekriminaliz difamasyon.

I en size ki mon'n koz en kantite lo la dan sizyenn Lasanble Nasyonal. I en size ki mon'n koz a plizyer repriz dan bann enteraksyon ki mon'n annan avek diferan lorganizasyon etan koman en pratikan medya. Mon ekrir en kantite lo la e ozordi mon vremen ere pou vwar ki mon pou lev mon lanmen pou fer sa materyalize.

Parey Onorab Hoareau in dir ozordi anfet i dwatet en zour istorik e sa Lalwa i vin dan

mwan ki sa nouvo ladministrasyon pe al selebre lan depi ki i o pouvwar. Tou ban ladministrasyon pou bann ki'n etidye listwar politik, i annan bann Prozedlwa mazer ki zot pase dan zot letan ki vin bann *corner stone* sa ladministrasyon.

E ozordi mon ava dir felisitasyon Prezidan Wavel Ramkalawan avek son ladministrasyon, pou pran en desizyon osi brav pou met Sesel an konformite avek standar Lalwa enternasyonal, avek bann lobligasyon ki nou'n tonm dakor avek atraver plizyer konvansyon. E sa leokri ki'n annan pou plizyer lannen atraver Lafrik partikilyerman pou dekriminaliz difamasyon.

E savedir a sa pwen la, mon ava dir poudir nou merit fyer koman Seselwa parske bokou pei ki konsider zot lekor koman pli avanse ki nou, souvandfwa pe met nou lo *blacklist*. Zot, zot ankor annan sa provizyon Lalwa se zot.

E alor mon ava di ki petet aprezan nou ava kapab koz avek en Lalwa en pe pli for dan bann *forum* enternasyonal kot nou ale partikilyerman lo kontinan Lafrik, pou nou ban koleg ki pe servi dan *SADC*, dan *PAP*. Pou ankouraz lezot parلمان Afriken pou

kontinyelman met presyon lo zot Gouvernman respektif pou tire sa provizyon difamasyon kriminel.

E mon fer sa aköz mon ti pe demann zot koman en pratikan medya, mon pe *lobby* lo lapar mon bann frer ek ser zournalis Afriken ki souvandfwa i ganny *harass* par Lotorite e met dan prizon san bann pei parey *Burundi*, *L'Ethiopie* pou nonm zis enn de.

Mr Speaker difamasyon kriminel i en problem k souzestim rol medya dan *watchdog*, dan son rol *watchdog* dan plizyer pei atraver lemonn.

E pou lontan ziska letan Prezidan pou siny sa Lalwa, i ava enkli Sesel osi. E sa provizyon Lalwa in souvan ganny servi tipikman par bann dirizan politik e biznes an partikilye, pou anpes zournalis fer envestigasyon e ekrir lo koripsyon par bann endividi, koripsyon dan bann *MDAs*; savedir dan bann Minister Departman e Lazans Gouvernman e dan biznes prive.

Plizyer rapor in souliny problem difamasyon kriminel atraver lemonn e partikilyerman Lafrik. E sa ki drol se ki letan bokou pei Afriken in ganny zot

lendepondans, zot in kot sa morso Lalwa kolonyalis lo zot liv Lalwa. Akoz? Preski bann dimoun ti pe koloniz sa bann pei, pa ti kontan letan bann dimoun ti pe mansipe pou lendepondans. I ti servi sa kont zot par egzantp.

E alor nou ti ava espekte poudir bomaten nou'n ganny rapel nou'n ganny libere par en revolisyon. So ler ot ti retir nou dan en kaso pou et nou dan en prizon, zot ti ava siny sa provizyon Lalwa. Me non, zot in gard li pou bokou letan olye met li dan bin listwar.

Solman dan Kod Penal ti annan en provizyon ki ou pa ti kapab dir en keksoz difamatwar kont en Prens, a *foreign Prince*. Be selman sa zot ti *repeal in '76*. So selman apre pou lezot dimoun i pa'n gannyen tire.

E savedir pou bokou pei zot in gard li la pou zot kapab kontrol medya, e sirtou apre ki *broadcast media* in vini e la ozordi i annan *electronic media*.

Be ler mon pe fer mon prezantasyon zisteman koman mon ariv lo sa bout la, preski sa bout medya elektronik i reste en konsern pou mwan e pou bokou lezot dimoun sirtou nou la anndan. Nou ava retourn lo la en pti kou apre.

Alor Mr Speaker nou vwar poudir premye pei Afriken pou

tir sa provizyon dekrimalizasyon pou difamasyon, sete *Ghana* an 2001. Savedir egzakteman 20an pase.

E ou vwar in annan depi 2001, nou'n annan konbyen ladministrasyon? E zot ti kapab swiv sa legzanp. E pourtan nou ti pe ganny en kantite presyon par nou bann partner enternasyonal;- par egzantp toulezan ladministrasyon Ameriken i fer sorti en rapor Drwa Imen e toulezan sa zafer difamasyon dan Sesel, *criminal* i ganny soulinyen dan sa rapor.

E i enpakte lo pozisyon Sesel dan *World press freedom index*. E alor nou pe *look forward* koman en pei pou vwar nou stati, nou *ranking* amelyore angran fer detrwa pa pozistivman an 2022.

E pour bann dimoun ki osi pe *lobby* pou bann lezot dekrimalizasyon petet zot ava vwar sa osi koman en pa pozitiv. Partikilyerman bann dimoun ki pe *lobby* pou dekrimalizasyon litalizasyon kanabis zot ava mazine poudir kekfwa koman en pei nou pe pans dan en fason progresiv.

Alor bann prensip liberal ki bomaten in ganny kritike, pa neserman en move keksoz. Zisteman ki nou pe fer se ki nou

pe anmenn pli gran levantay laliberte. Me sa laliberte mon bezwen dir avek bann dimoun ki pe ekoute, poudir i en pouvwar, i en gran pouvwar sa, me i en pouvwar ki vin avek en gran responsabilite.

Par donn nou sa laliberte pou fer, sirtou bann zournalis pou fer zot travay san lafreyer, san faver, zot bezwen osi prezan mentenir en balans pou nou kapab akonplir en sosyete ki drwat, ki balanse.

E pou gard difamasyon koman en soz kriminel i pa asiz byen dan en sosyete demokratik ki sa nouvo ladministrasyon vreman i oule *champion*. Napa okenn sans *anymore* dan Sesel pou nou silans medya, met zournalis dan prizon. E parey mon dir i en keksoz ki nou bezwen ankouraz bann lezot pei Afriken fer.

E Prezidan Ramkalawan pa anmenn sa Lalwa devan Lasanble Nasyonal, i pe al osi lwen pou etabli laliberte lekspresyon. E i montre son lentansyon koman en *reformist* – en *reformist* en? Parey mon dir souvandfwa i annan bokou bann ladministrasyon ki vini, i annan en keksoz ki zot fer atraver prosedir Lalwa ki i donn en *legacy* zot ladministrasyon. E mon apresye alor vwar poudir nou a pe viv sa sanzman ki nou

ti dir avek pep Seselwa nou pou anmenn.

An dizan sa mon ava termin avek sa, parske letan nou ti *criminal defamation* lo *repeal* sa bann provizyon dan Kod Penal. Aprezan *Code Civil* Onorab Georges si i koze taler i ava kapab eksplik sa pli byen ki mwan, dan *Code Civil* ki nou dir son *Clause 13, Article 1390* i lir koumsa;

The civil law on defamation is governed by specific legislation. E *consequential amendments* ki nou ti fer avek *Code Civil* in fer provizyon ki si i annan bann ka difamasyon, *English Law* ava ganny pran an konsiderasyon.

Me la alor mon ava fer pledwari avek ladministrasyon, ki pli vit posibil preski difamasyon son fason modern apezan i annan en *Standalone Act*. E Langleter koumsa i ete ki Onorab Hoareau in koz lo la, parski akoz nou bezwen touzour *manage* sa sityasyon?

Parske dan nou sityasyon ozordi e dan lemonn in annan larive medya elektronik e partikilyerman bann rezo sosyal. Avek *Facebook*, avek *Instagram* avek *WhatsApp*, Bann dirizan dan bann kominote partikilyerman ban politisyen, i target bann naryen fer.

Ou al en landrwa ou fer en keksoz ou portre i ganny tire, ou dir en keksoz dan Lasanble sa bout i ganny koupe, en dimoun i servi en *fake account* i denigre ou. Ou se ou pe dormi, demen bomaten ou leve, ou ki topik konversasyon dan Sesel !

Be dezormen nou bezwen koz avek en sel lavwa depi sizyenm Lasanble si sa sez ki la ti kapab koze ansyen *Leader of Government Business* in koz longman lo la. E lot kote latab i bezwen siport mwan lo la. So nou bezwen koman en pei koman dan sosyete demokratik dir avek dimoun sa laliberte ki pe donn nou, sa gran pouvwar i vin avek en gran responsabilite.

Ou pa kapab demen bomaten zis ou krwar ou kapab zis trenn mon non dan labou ou non nenport lezot dimoun. Non !

So i bezwen annan bann *lawmakers* a bezwen asize avek konsiltasyon piblik pou nou regarde ki mannyer nou pou adres sa size, kot dimoun i kapab rod rekour letan son repitasyon, son *good name* i ganny *tarnish* par bann nanryen fer.

Donk Mr Speaker mon ava termin la an dizan ki ozordi mon krwar i en gran zour pou mwan personnelman koman en pratikan medya, e vreman mon

apresye ki sa ladministrasyon i pran en desizyon osi brav e osi modern pou anmenn sa *repeal* dan Lasanble Nasyonal. Mersi.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bonn apre midi *VP, AG's* e ou asistan. Mr Speaker mon oule port mon kontribisyon lo sa *Bill* lo sa bann lamannman dan *Penal Code* e mon pou annan detrwa pwen ki mon pou site ki mon krwar i enportan mon fer resorti.

Mr Speaker mon krwar premyerman dan konteks globalizasyon lemonn modern e sivilizasyon nivo ki nou'n arive dan sa lemonn, i pou annan bann nesese kot bann vye Lalwa ki'n date depi bann vye letan - mon kapab dir, i ganny amande pou reflekte la realite dizour.

E Sesel parey bokou bann lezot pei sirtou dan nivo Lafrik, nou pa en bann eksepsyon kot nou bezwen war nou pe fer fas pou nou anmenn bann lamannman nesese, pou kapab met nou azour kwa ki sa dan konteks sivil. Ouswa dan son konteks kot i konsern bann laspe finansyel, sirtou kot i annan bann *fines* osi pou

anmenn li dan konteks ki nou'n arive ozordi.

E pour mwan sa i enportan e okenn Gouvernman responsab i bezwen war li en lobligasyon atraver son sistenm legal sa atraver *AG's Office* pou kapab anmennen sa bann kalite lamannman parey. E en keksoz ki mon santi i enportan, akoz sa nou pe koz lo *Penal Code*. Nou ti fer en travay vremen ekstansif lo Sivil Kod, *ok?*

E pou mwan ler mon war sa *Bill*, mon'n fer enn de pti lanaliz, an menm tan de pti konversasyon avek serten dimoun ki konpran en pti pe ladan. Mon santi petet dan en lenstans nou pe tay avek sa. Mon pa konnen si i annan en lirezans dan son merit li menm li, petet *VP* i ava dir nou ouswa *AG's*.

Me mon santi poudir i annan serten parti ladan *and* ki ti nesedit annan en *sort of* deba kot nou pe angaz lasosyete li menm, dan serten sa bann desizyon.

I pa vedir ki sa bann desizyon i mal li. Nou pa pe dir i mal me selman nou ti kapab aport bann soutyen, sirtou nou annan bann *partners* dan *civil societies* ki petet i ava enterese pou annan serten *input* ladan.

E zot kapab petet anmenn bann nide adisyonnell pou fer ki nou kapab ganny en pli meyer lamannman dan sa Lalwa li menm. E osi mon krwar - mon pa konnen si i pou vin en pratik souvan - vi ki ladministrasyon i nouvo byensir.

Sa eleman *White Paper stage* pa pe tro ganny servi *as such*. Mon konpran nou dan en letan *COVID* nou pa pe kapab fer bann gran, gran rasanbleman gran, gran miting. Me i dwatet osi annan bann lezot fason ki nou devret kapab servi bann lezot *channel* osi, pou nou kapab eksit deba swa atraver medya.

Nou annan *social media* nou annan nou medya Nasyonal, kou annan bann lezot, lezot *channel* osi ki nou kapab petet - akoz i annan dimoun ki mon santi ler nou pou fini pas sa *Bill* ; - en pe parey *Civil Code* apre ki zot konnen poudir ler keksoz i anpakte lo zot ki zot dir, be sa ti'n amande, sa ki koumsa nou pa ti konnen.

So i annan bann posibilite ki nou pou bezwen revwar serten fason ki nou fer sirtou si napa lir zans dan sa *Bill*.

Mr speaker premye eleman ki mon anvi touse ladan se sa laz ki pe ganny sanze pou kapab deklare ki en zanfann in

komet en krim ki sorti 7an pou mont 10an.

E sa osi i en deba ki'n lo nivo SADC ki mon apel ki nou'n diskite lo la. E dan konteks Sesel ler nou ti pe diskite nou ti war poudir ki vre avek lavansman teknolozi zanfan ozordi lespri i en pti pe pli ouver, pou zot komet bann aksyon *without* en lizye ki pe siperviz zot, i pil fasil pou arive ozordi.

Ki sirtou dan mon letan ki mwan mon pou gete ler mon ti annan sa bann laz 7an, kot nou ti viv en lavi plizoumwen anfermen dan en sans. Nou i napa akse avek sa lemonn ouver parey ozordi en zanfan 7an i deza annan.

E lot laspe ki mon krwar nou ti touse se, i annan bann landrwa bann pei ki sa bann letan ti annan bann *conflict areas* mon apele, ki ti pe servi bann zanfan.

Ouswa bann pei ki'n ganny ravaze par bann sityasyon lager osi, ki zanfan dan en sans i ganny servi pou komet serten akt kriminel. Parey nou'n war i annan bann *child soldiers* ozordi dan bann pei, sirtou lo nivo Lafrik laba ki ti vin bann size diskisyon

Sanmenm Nasyon Ini in bezwen enterfer a sa pwen. So pou mwan pou nou met no

azour avek sa Lalwa ki parey i annan ki'n dir eski nou mont 12an?

Me selman pou mwan i lenportans ki nou sitye nou ek la realite e si ti annan osi bann eksper petet osi diskisyon osi ki ti'n ganny fer, lo devlopman mantal en zanfan li menm pou li reakte pou li rezonnen, pou ki koz serten aksyon petet nou ti ava'n ganny gide en pti pe pli lo *the best* sa laz ideal li menm.

Lot pwen ki mon anvi fer resorti i sa kote difamasyon la, ki nou koz en kantite lo la. Nou'n pas dan en *era* nou konnen, ozordi nou'n ariv lo en lot nivo konsernan la demokrasi dan pei.

E nou vwar poudir bokou keksoz i ganny dir tord, atraver nou kapab dir e menm nou la anndan politisyen nou vin bann viktim, bann lakizasyon, bann latak personnel dan diferan form lo medya sosyal.

E pour mwan parfwa nou i annan ki'n matir i pran li alalez, i les pase me selman i annan ki pran li personnel e la i kapab petet pran en aksyon pran en *case* met Ankour.

So mon krwar i annan en ledikasyon ki i bezwen antase avek sa size ki enportan. E sa i a vin avek respe e osi i ava vin en nouvo tolerans matirite ki

nou a bezwen devlope a lavenir kot i konsern difamasyon.

I pa normal. I pa akseptab pou nou dir nenport kwa lo en endividi san ki nou fonde. Sa i normal sa. Mon pa kapab vin akoz Vis-Prezidan, AG's, LOTO ouswa Onorab Arissol li menm li Sandy, pou en keksoz ki mwan menm mon pa konnen si i vre ouswa mon pe repete.

So i bann keksoz - e mon kontan laliny ki pe vini kort VP osi in fer resorti poudir i pou anmenn bann lezot Lezislasyon kot i konsern bann *hate speech* parey bann *hate crime* ki ozordi sirtou Lanmerik i pe soufer avek sa kalite krim ozordi.

E mon krwar nou a pe al se dan en bon diskisyon. E pou nou kapab konsolid sa pilye la demokrasi i pou bezwen annan bann fason fer ki pa pou anpes dimoun koze, ou pa kapab koze me selman ou bezwen annan en laliny ou bezwen, en *fine line* parey nou dir ki ou mars lo la, pour ki ou pa al afekte drwa lezot kot pou ou i fini ou pe afekte lezot.

So Mr Speaker i annan sa lot nou kot i konsern sa bann penalti ki'n ganny amande la ki ganny propoze.

De keksoz ki mon anvi touse, i konsern bann *fine*, ki ler sirtou la VP in nonm dray anba lenfliyans lalkol. e si mon

pa tronpe i dir di ou ganny kondannen, Lakour i kondann ou, ou pou bezwen al pey en lanmann ziska R25mil *minimum*.

Si mon pa tronpe ek sa. E petet mon pa ni pe siport dimoun ki pe dry ak lalkol mon ganny mon byen, byen kler. Akoz ler ou ganny arete avek en nivo lalkol ki ganny preski mon krwar Lalwa la i sipoze si ou par lao 35 *ounce per zot* kalkilasyon ki zot mete, la ou pe komans ganny sarze si mon pa tronpe. La i monte, i monte.

Mon ti a kontan konnen is sa 25mil i zis de koman ou sot 35 ou bezwen al pey 25mil, ouswa pou annan bann diferan nivo ki zot a bezwen pe kalkile dan sa laliny poudir ler ou 35 ou sa, ler ou 50 ou pou sa, si ou 100, si ou 50 i lot nivo, si i pou koumsa?

E pou terminen Mr Speaker lo size pou nou met nou azour akoz tou resaman in annan en pei ki'n annan en *sort of* manifestasyon piblik dan semen ler zot in deside pou adopte *crypto currency* koman zot *legal tender*.

E mon konnen a lavenir mannyer marse finansyel lekonomi e nou pe bouz ver *visualization*, nou pou ariv en pwen petet ankor dan 15an, 20an kot nou pou war nou pe

antre lo sa ki nou apel en marse avek *crypto currency*.

E pour mwan mon krwar si nou pe mazin al ver s direksyon a lavenir, mon konnen i annan bann zefor ki'n komanse, i annan serten lakonpanyen ki'n apros Minister Finans avek *FSA* li menm li.

E nou konnen poudir i annan bann size kontansyon ki atase avek sa kalite tranzaksyon monneter e kot i annan bann *case* kot bann pei osi pe ganny targete. Sesel i osi i pa'n ganny eparnye ladan me mon pa pou al dan sa deba la ozordi.

E eski nou pe prepar mon pou annan bann premyerman anmenn sa bann lezislasyon modern ki pou kapab gid nou en pe e pou Seselwa osi kapab osi mye konpran, ki mannyer nou pou kapab diriz nou pou nou al ver sa kalite marse li menm.

So Mr Speaker mon pa war naryen mal ek ban lamannman ki annan neserman. Me selman mon santi poudir i ti merit annan en deba en pti pe pli larz pou nou angaz bann parti konsernen, bann *intellectual* la deor ki ti a kontan konnen kwa ki pe ganny arive, pou zot osi anmenn serten kontribisyon.

E osi annou pran lopinyon bann eksper osi ki doue dan diferan domenn pou zot kapab anmenn en pti pe plis pwa, petet ler nou pe vini pou nou kapab osi defann en ban lamannman parey e ki mon konnen ki pou vini a lavenir. So avek sa Mr Speaker mo nou dir ou mersi.

MR SPEAKER

Mersi Onorab. Nou a swiv avek Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi *VP* ek ou *panel*, bonn apre midi tou Onorab. Mr Speaker mon pou swazir pou koz lo laz responsabilite pou lofans kriminel sorti 7an pou vin 10an.

Mr Speaker tou dernyerman bann keksoz ki pe pase dan mon distrik Perseverance ozordi i fors mwan koz en pe lo sa *Bill*.

Mr Speaker sa *Bill* ki devan nou pe anmenn en lamannman ki demann nou pou ogmant laz kot en zanfani kapab ganny sarze, pou en lofans sorti laz 7an pou vin 10an.

Mr Speaker bokou dimoun letan pou tann koz lo la 10an, pa pou kontan ki en zanfani sa

laz i kapab ganny arete e sarze. Me dan lot kote, annan bokou dimoun ki pou dakor avek sa.

Akoz ozordi bokou zanfan anba laz pe fer bokou aksyon mal dan zot prop lespri e avek zot prop bi. Osi letan ou pou get serten dimoun ki pe sibir bokou aksyon sabotaz, vandaliz e osi menm zot zanfan pe ganny bate, menase.

Ler ou regard sa bann zanfan se laz 9an, 10an ki pe fer plis sa bann aksyon deplorab. Mr Speaker, i kler ki enn de paran i servi zot zanfan inosan pou komet bann aksyon sal, pou zot, dan lespri ki zot pa pou ganny dekouver e ki sa zanfan a *get away* avek sa aksyon lo baz i pa pe realize ki son kou sa bann domaz ki pe ganny arive.

Ozordi letan nou pe war en zanfan 10an pe mars avek zouti, tel ki kouto, *dagger*, *cutter*, ou demann ou lekor kwa ki dan son lespri e ki son bi?

I malere letan ou pou dekouver ki paran i okouran e ki se li menm ki'n donn direktiv sa zanfan, kote i pou al fer aksyon.

Mr Speaker annan paran ki transform son lanmertim, son lakoler ek dezapwentman dan son zanfan. I met sa zanfan asize i eksplik li egzakteman ki i pou fer dan lespri ki a swazir ki i a pe detri son vwazen,

ouswa propriyete Gouvernman. Akoz senpleman i pa siport sa Gouvernman, pou siport son lanmertim.

Mr Speaker i bon note osi ki vre, ki vreman i vreman fer lapen, ki pandan ki serten konplo pe ganny fer, zanfan i la dan milye e zot pe ganny enstri, zot pe ganny dirize kote pou ale.

Mr Speaker sa lamannman sorti laz 7an pou vin 10an, kot en zanfan kapab ganny arete e sarze pou okenn aksyon kriminel, vandaliz e detri propriyete, ki fer ki lezot zanfan, lezot dimoun i ganny afekte, kraz *sliding window* vwazen, apre taye.

Kraz vit loto e ler sa dimoun i koz ek zot, zot paran ki pou vin ensilte, ki pou vin lager ek sa viktim.

Mwan mon pou siport sa Lalwa 100 poursan, aköz i a vin en lesan pou bann paran kot i pa kestyon zot pa pe sirvey zot zanfan.

Me se ki zot ki pe gat lespri zot prop zanfan e fer sa zanfan vin en mons ankor tre zenn. E mon santi ki laz 10an a donn zot ase lesan pou redres son zot fason viv e osi sanz *mindset* bann adilt ki par deryer bann zanfan, pou komet bann aksyon kriminel dan zot plas.

Mr Speaker in ler pou pran aksyon pou arive koriz

bann move aksyon ki bann zanfan anba laz pe komet konmela. Mersi.

MR SPEAKER

Mersi Onorab. E swivan Onorab Bernard Georges.

HON BERNARD GEORGES

Mersi Mr Speaker. Mr Speaker mon pran laparol ase briyevman apre midi. Me mon santi ki i mon devwar pou mwan dir enn de parol lo sa Lalwa.

Efektivman apard bann lezot *minor amendments* pou elev nivo *fine* oubyen penalti, revwar definisyon *currency* pou *include* 'virtual currency', 'crypto currency' eksetera. Epi tou i sa konsep *justice of the peace*. Ki a en lepok ti annan son neseseite.

Akoz difikilte kominikasyon, eksetera. Ozordi i nepli, i nepli nesese. E parey Vis-Prezidan in fer nou konpran apre midi, sa bann Lalwa isi Sesel pe ganny revize gradyelman par sa Komite Revizyon e pe anmenn zot anliny avek larealite lemonn ozordi.

Apard sa bann, i annan efektivman selon mwan, apard bann *hoax* ki ase senp pou nou konpran, aköz nou bezwen li. I annan sa 2 lamannman ase

sibstansyel ki annan pou fer avek difamasyon kriminel, oubyen difamasyon penal, epi responsabilite kriminel bann zanfan.

Avek ou permisyon Mr Speaker, mon ava komans avek difamasyon kriminel. E mon partaz santiman avek konklizyon Onorab Henrie ek Onorab Aglae ki'n fer nou konpran zis 2 rezon, ki sa set en Lalwa kolonyal ki parey *POA*, bann pei endepandan Lafrik ek en pe dan bann lezot pei, me sirtou Lafrik.

Including nou, sa Lalwa ki ti pe ganny servi pou siprim bann lazitasyon pou lendepandans ek lazitasyon bann pep pou annan en pe plis *freedom*, ki ti ganny servi par pouvwar kolonyal pou siprim sa, in ganny servi par Prezidan ki ti vin an legzersis a lendepandans pou li siprim son pep e pou li kontinyen reste o pouvwar.

E nou isi, nou pa ti en leksepsyon. Nou ti gard sa *POA* e nou ti gard sa Lalwa *Criminal Defamation* apre lendepandans. Aköz i ti servi rezim o pouvwar pou li kapab, malgre ki nou ti'n ganny dir ki nou ti lib pou li kapab gard nou dan en pozisyon sibdikasyon.

E alor mon partaz ozordi lazwa bann Manm isi dan sa

Lasanble, ki finalman, ankor enn fwa, yer nou'n ganny enn, la ozordi en lot, finalman en Gouvernman in annan kouraz pou li fer sa ki bann lezot zis in koz lo la oparavan.

Nepli annan dan nou sosyete en nesese pou pini en dimoun ki fer en difamasyon dan en fason kriminel, ler Lalwa i egziste pou ou rod domaz avek li anba Lalwa Sivil. Ti nepli annan en rezondet.

E sel rezon ki sa ti reste dan Lalwa, sete parey in ganny dir, pou *gag* bann medya, sirtou, me gag bann opozan a en Gouvernman pou anpes zot koze, pou anpes zot egzers zot drwa laliberte.

E aneufe mon pa konpran ki mannyer in pran nou telman lontan pou tir en Lalwa *Criminal Defamation*, ki al an kont drwa a lekspresyon ki depi 1993 nou'n fer li retourn dan nou Konstitisyon.

Me bref, plito tar ki zanmen, parey sanson i dir, ozordi nou pe arive e nou pe fer li. E nou pe fer li aköz osi nou annan bann lobligasyon enternasyonal ki nou bezwen swiv.

Mr Speaker sa Lalwa li *Criminal Defamation* i pa pe sorti partou dan lemond li. I pe reste dan bokou pei, pa zis lo kontinan Lafrik. *La Russie* par

egzanp i servi Lalwa Penal pou *gag* Lopoziyon.

E nou'n vwar egzakte man sa ki pe arive ozordi. Zot annan lezot zouti. Alor i annan bann pei devlope e modern dan serten sans ki pe servi sa bann Lalwa represif, pou fer sir ki Lopoziyon dan zot pei pa kapab annan lavwa ou *chapitre*.

E i pa en gran, ki mannyer mon apel sa, i pa en gran revelasyon ki isi Sesel sel fwa ki sa Lalwa in ganny servi, sete par Gouvernman *SPUP/SPPF/Lepep/US* kont en siporter Lopoziyon.

I pa ditou sirprenan e i antre toutafe dan lord sa ki nou pe koz lo la depi yer. En mo Mr Speaker, lo - anfen les mwan dir ki mon partaz lopinyon tou bann dimoun ki kontan vwar sa Lalwa *Criminal Defamation* sorti dan nou liv Lalwa.

E avek *repeal* tou sa bann seksyon *Code Penal*. 2 mo lo Lalwa Difamasyon Sivil. E mon kontan ki nou dan sa Lasanble, Sizyenm Lasanble, plito, pa bokou nou ki ankor la ozordi nou ti partisip dan sa lavantir pou nou moderniz *Code Civil*.

E enn fwa pour tou nou ti dir nou Lalwa Difamasyon pou nepli Lalwa Angle, nou pou pas nou prop Lalwa.

Antretan nou pou gard Lalwa Angle ki'n egzers nou

Lalwa Difamasyon Sivil pandan tou sa bann lannen. Me nou pe al dan en direksyon kot nou pou annan nou prop Lalwa. E sa mon krwar Mr Speaker i *long, long overdue*.

Akoz Lalwa Angle i vreman restriktif dan bann defans, parey ou konnen Mr Speaker, ou ti en zournalis ou osi e ou'n, i annan plizyer *case* Ankour ki annan ou non lo la. Antan ki en zournalis, kot ou ti bezwen par legzersis ou profesyon pey bann domaz sibstansyel pou bann alegasyon ki ti byen fonde, me ki anba sistenm ki ti ete a lepok, ti trouve ki ti mal fonde.

Me sa pa nou deba apre midi. Sa i pou en lot zour. Sa ki mwan mon ti a kontan vwar, akoz mon'n egzers sa Lalwa Difamasyon pandan tou mon karyer a plizyer repriz - sa ki mwan mon ti a kontan vwar set en asoupleman lo bann prensip Lalwa Difamasyon Angle.

Annou pa bliye ki Lalwa Difamasyon Angle i fer ki Lakour, *High Court Londres*, i, ou plito *L'Angleterre* ek son bann Lakour, i *the defamation Capital of the world*.

Tou bann dimoun ki ganny difanmen *somewhere* i tay *Londres*, akoz se la kot zot pou ganny plis domaz e se la kot bann defans i pli restrikte.

San al dan okenn detay, mon ti a kontan vwar en Lalwa ki permet, akoz difamasyon i en keksoz grav e nou pa bezwen fer krwar ki pa grav, akoz i grav.

Akoz ou repitasyon, sirtou dan en pti pei parey Sesel, ou repitasyon par en dimoun ki anvi zis kraz ou repitasyon, i pou pran *des année, des année*, pou ou reganny li, si ou pou reganny li en zour.

Alor nou bezwen annan en Lalwa ki morde e ki pou fer ki dimoun i ava pran zot responsabilite plis, me osi nou bezwen fer de swa ki nou met bann defans apropiye.

E enn bann defans ki mwan mon'n milit pou sey gannyen tou mon lavi, se ler ou dan domenn piblik, paret i egziste *L'Angleterre*, Lanmerik pardon. I pa egziste *L'Angleterre*. Ler ou dan domenn piblik, ou drwa a ou laliberte, ou privez i ganny dan en serten sans redwir. Si ou pa anvi dimoun koz lo ou, pa al dan bann fonksyon kot dimoun pou koz lo ou.

Me ler ou donnen en pozisyon responsab dan lasosyete, tel parey en politisyen, ou bezwen ekspekte ki ou pou ganny kritike en pe plis ki sa dimoun ki pa'n

advantis son lekor dan domenn piblik.

E nou krwar, nou bezwen fer en leksepsyon pou sa. Anba en parasol malgre tou, kot domaz i ganny *cap*. Akoz enn bann gran problemm avek difamasyon se ki napa en *cap* lo domaz.

E nou'n vwar ki serten fwa dan serten rezim, sa i ganny servi pou met medya anba kontrol. E sa i en keksoz ki nou devret otan ki posib lager kont.

Alor nou bezwen trouv sa bon balans, e nou kapab fer sa avek en bon Lalwa ki akse lo nou santiman ek lo nou posibilite, ek lo nou Nasyon, ek nou kiltir e lafason ki nou, nou fer keksoz.

E non pa neserman en Lalwa en lot pei ki'n zis nou'n apropiye e ki nou servi pou nou. Donk sa mon esper sa Lalwa avek gran enpasyans, ki i ava sorti kot Biro *Attorney General* e ki ava parey bokou dimoun in demande, osi akse lo difamasyon lo rezo sosyal.

Akoz sa osi in vin, anven mwan mon pa lo rezo sosyal, mon pa lo *Facebook* ek sa bann keksoz. Alor mwan mon pa vwar, me mon ganny dir ki i annan bokou keksoz ki pa devret pe ganny dir.

E mon vwar menm lo *WhatsApp*, bann keksoz ki pa

byen, ki pa apropiye, nou bezwen trouv en fason san ki nou met okenn kontrol lo sa ki dimoun i dir, akoz nou drwa, nou laliberte lekspresyon i primordyal.

Me osi ki nou kapab *challenge* bann dimoun ler zot dir bann keksoz ki pa apropiye. Donk Mr Speaker, mon ti a kontan felisit Biro *Attorney General* ek Vis-Prezidan ki'n vin isi ozordi pou touy sa difamasyon kriminel. E pou enn fwa set en lanterman ki mon kontan asiste.

Dezyenn keksoz i annan pou fer avek responsabilite kriminel. E sa in egzers mwan pandan bokou letan.

Annefe Onorab Aglae in *call* pou annan plis konsiltasyon bann *stakeholders* eksetera, bann *partners* ki i annan pou fer avek sa keksoz.

E mon kapab reasir Onorab ki in annan en pe. Kekfwa zanmen konsiltasyon i ase, me nou bezwen *draw the line somewhere*. Me mon kapab dir ki in annan en bon pe konsiltasyon avek Zidisyer, avek Departman Sosyal ki ti *basically* pe parenn en pe sa Lalwa.

E avek enn de lezot akter. Mwan menm mon mon'n ganny demande pou reflexir lo la. E pou anmenn en kontribisyon.

E ankor enn fwa, nou'n bezwen, nou pa kapab zis swiv sa ki lezot pei i fer akoz nou kiltir, nou sityasyon parey Onorab Bastienne in fer nou konpran, i diferan. Sityasyon isi pa parey sityasyon dan bann lezot pei.

Me mon krwar i ava enportan apre midi pou mon donn detrwa legzanp bann pei e ki laz responsabilite kriminel zot annan. I annan ki 7an ankor.

E sa, sa bann pei i annan par egzanp, Lenn, Nigeria, *Singapore, La Suisse, Sid Lafrik - 7an. 8n nou vwar Kenya, nou vwar La Coste, nou vwar Sri Lanka. 9an nou war Malta. 10 nou vwar L' Australie, L'Angleterre, Malaisie, New Zealand.*

12an *Canada, Jamaica, Uganda.* 13 an *La France.* 14an *L'Allemagne, Italy, La Chine, Maurice* a kote nou. 15an *Denmark, Finland, New York, La Suede.*

16an, *Japon, La Pologne, Portugal, L' Espagne.* 18an Lanmerik, preske tou bann lezot leta dan *Belgique ek Luxembourg.* Donk i annan en gran levantay depi 7an ziska 18an.

E nou, nou bezwen sitye nou dan enn ant sa bann ki apropiye pou nou. E mon

krwar ki Gouvernman apre ki in fer sa konsiltasyon, in tonm dakor lo 10an koman en meyer Lalwa ki 7an.

Akoz 7an i vremen zenn. 7an i vremen zenn pou ou responsab dan en fason kriminel. Malgre ki nou konnen ki bokou dimoun, parey Onorab Bastienne in dir nou, zot vin prekos a en laz tre zenn.

E zot kapab fer bann keksoz ki nou pa ti pe ekspekte ki zot ti pou fer. Me nou mazine ki 10an i en bon komansman, malgre ki serten dimoun ti ava prefere war 12. Me avek serten kondisyon. 10an se laz limit.

Par anba 10an ou pa kapab responsab dan en fason kriminel, me i annan en prezonpsyon touzour ki ziska laz 12an, ziska laz 12an, ou pa pou kapab annan sa responsabilite.

E sa i met lo Biro *Attorney Zeneral* ler zot, zot ava eksplor en ka. Barenm i 10an, me zot ava donn ankor sa gap 2an, e zot ava prezimen ki ziska 12an en zanfan pa kapab fer en krim.

Me i ava reste lo 10an, pou pini bann ki dan lopinyon *Attorney Zeneral* i kapab. E parey Onorab Bastienne in eksplik nou, i annan ki menm anba sa laz i konnen sa ki zot pe fer.

Dezyenmman, mon krwar ki dan lespri prosekisyon, o tan ki posib ou pa anmenn en dimoun par anba 14an Ankour. O tan ki posib, e ou fer li zis dan bann ka kot i vremen, vremen nesaser.

E trwazyenmman, o tan ki posib ou pa anvoy en dimoun Prizon avan ki i annan 18an. Ankor enn fwa, o tan ki posib. E ou gard sa an rezerv zis pou bann ka vremen, vremen serye.

E avek sa bann kondisyon, mon krwar Mr Speaker, e sa se, i pa dan Lalwa, me nou konn sa, nou konnen ki lafason ki prosekisyon i travay.

Avek sa bann sofgard mwan mon pare pou aksepte ki 10an pou bann rezon ki'n ganny donnen e pou nou, pou lafason ki nou sosyete i viv, ozordi i apropiye.

Malgre ki dan lizye bokou dimoun i kapab aparet en laz en pe ba. Fodre pa nou tonm dan lespri swiv bann lezot pei e dir ki si Lanmerik in met 18an, nou, nou vwar nou devret met 18an.

Oubyen si *L' Angleterre* i dir ki i devret 14an oubyen nou zanmi *Maurice* i devret 14an, nou osi nou bezwen al lo 14an. Akoz sa i ava fer nou paret koman en pei modern e sivilize. Non Mr Speaker, mon pa krwar.

Mon krwar ki nou bezwen etidye tre byen, se pou sa rezon ki mon'n dir in pran mon en bon pe letan pou mon kapab ariv a sa konklizyon, kot nou bezwen regard nou konteks. E se selman nou konteks ki pou enportan dan sa sityasyon.

Alor ankor enn fwa, mon krwar ki dan lespri moderniz nou Lalwa, dan lespri met nou azour avek bann larealite kiltirel e sosyal dan nou pei, bann keksoz ki ti kekfwa byen dan lannen 1955, e apre midi mon profite pou partaz avek zot ki nou *Code Penal* i annan menm laz ki mwan.

Sa ki ti byen ler mwan mon ti pe ne, i nepli neserman apropiye ozordi. E nou pe *look forward* pou annan bokou plis sa bann amannman ki ava vin devan nou. Mersi Mr Speaker.

MR SPEAKER

Mersi Onorab Georges. Mon annan 3 entervenans ankor. Alor mon krwar i ava bon pou nou pran en *pause* la. Koumsa nou a nobou donn zot nou *full* konsantrasyon apre. Me nou a rezwenn, i 4er 20 pou rebran. Mersi.

(BREAK)

MR SPEAKER

Byen, nou'n ariv kot Onorab Wavel Woodcock.

HON WAVEL WOODCOCK

Mersi Mr Speaker. Mr Speaker ozordi mon pe pran laparol pou mwan dir 2 mo lo size sa *Bill* ki devan nou. Ki pou fer provizyon pou retir difamasyon kriminel sirtou.

E osi pou ogmant laz ki en zanfan i kapab ganny sarze avek en lofans, pou sorti 7an, pou vin 10an. Mon krwar ki i *long overdue* pou sa bann Lalwa dan *Penal Code* ganny re vizite.

Sirtou kot i konn difamasyon kriminel. Annefe pli boner ler enterven an lo lot kote latab ti pe koze, Onorab Aglae si mon pa tronpe, ti dir ki i krwar ki Gouvernman pe tay avek sa bann lamannman, avek sa bann Lalwa.

I pa konnen ki nou pe prese, akoz ki nou pe taye avek. Kan anefe Lalwa *Code Penal* ti ganny pase le 1 Fevriye an 1955.

E Onorab Bernard Georges in dir poudir sa Lalwa i aktyelman pli vye ki li. E dan *Code Penal* sa Lalwa in toultan egziste. Difamasyon Kriminel ki ozordi nou pe deside pou retire dan *Code Penal*.

Mr Speaker, parey plizyer enterven an avan mwan ki'n

koze in dir, se ki sa Lalwa dan en serten sans ti pe *gag* medya e i ti pe kree en serten lafreder dan bann zournalis, pou zot eksprim zot lekor.

I ti pe, ou kapab dir i ti pe met en serten restriksyon lo laliberte lekspresyon. Kot parey nou konnen difamasyon i ler en dimoun i sali limaz ouswa repitasyon en lot dimoun atraver *libel*, bann *written statement* ouswa atraver *slander*, bann *spoken statement*.

Me malerezman parey Onorab Bernard Georges in fer resorti, se ki anba Parti Inik, dan plizyer Gouvernman, sirtou dan bann pei kot i annan en pe sa bann pei ki anba diktatir pou plizyer lannen, sa Lalwa in ganny servi pou opres e viktimizasyon sirtou bann zournalis.

E zisteman, i annan legzanp ki'n ganny donnen regardan en siporter Lopoziyon dan lepase, en Mr Bernard Sullivan, kot i ti fer fas avek en tel form viktimizasyon kot zot ti opres li. Ki en *statement* ki ti'n mete lo rezo sosyal e zot ti servi sa Lalwa Difamasyon Kriminel, pou rimann li, pou met li dan kaso.

I ti fer anviron 14 zour dan kaso, zot ti pe fer prosedir pou prosekut li. I ti kapab *end-up* dan prizon. Akoz difamasyon

kriminel ou kapab *end-up* dan prizon.

E erezman i ti annan li *dual* nasyonalite e i ti fer en rapel avek son lot pei, *Australie*, *Australie* ti met presyon lo Gouvernman Parti Lepep sa letan. Mon krwar ti James Michel, Prezidan Michel ki ti o pouvwar. E atraver presyon ki ti ganny mete, zot ti larg li.

E si ti napa sa bann presyon, presyon pa ti sorti zis an deor Sesel, presyon ti sorti osi sa letan avek bann sipoter *SNP* e plizyer bann lezot dimoun.

E *funny enough* se, mon mazine mon krwar Mr Volcere osi ti enn bann dimoun ki ti pe defann drwa Mr Sullivan sa bann letan.

E plizyer bann lezot dimoun ki ozordi en bann i form parti bann lezot parti politik. E alor ti enportan pou nou. Annefe dan sizyenm Lasanble, sa letan ki ti pe ganny *Chair* par Onorab Henrie, sa i en topik ki a plizyer repriz nou'n adrese nou'n koz lo la.

Me selman ti mank en volonte par Gouvernman avan pou sanz sa Lalwa. Me depi ler nou'n antre dan setyenm Lasanble, nou'n *re take up* sa size ankor e nou'n menm annan en rankont avek Mr Knights kot Biro *Attorney Zeneral*, kot nou

ti diskrit lo sa Lalwa avan ki vin devan Lasanble.

Pou retir Difamasyon Kriminel. E osi nou ti koz lo sa, lo ogmant laz ki en zanfan i kapab ganny sarze. So sa i 2 keksoz ki nou ti ganny sans diskrit avek Biro *Attorney Zeneral* e nou ti donn nou *full sipor*.

E mon rapel sa *meeting*, mon ti envit Deputy Speaker ki pou *join* nou dan sa *meeting*. Akoz li i enn bann dimoun osi ki'n toultan anmenn en lager osi pou tir sa difamasyon kriminel.

Mr Speaker kot i konsern sa revizyon ki nou pe fer, pou fer ki en zanfan, la *as it is* aktyelman, en zanfan ki annan 7an i kapab fer fas avek, i pa ganny sarze.

E nou atraver sa lamannman ki pe ganny anmennen, nou pou ogmant sa laz pou vin 10an. E mwan mon santi poudir sa Lalwa i en Lalwa ki fer sans.

Annefe en zanfan 7an, dan mon lopinyon, son, i pa ankor kekfwa ariv lo sa nivo konsyans moral ouswa son *moral compass* pa ankor ariv lo sa nivo matirite.

Alor dizan i petet en laz ki i kapab fer en pe plis refleksyon, ki'n devlop parey mon'n dir, sa *moral compass*. Alor mon napa

okenn difikilte pou mwan siport sa provizyon ki pe ganny fer.

Me en keksoz osi ki ganny fer resorti dan *Penal Code* se ki dan *Penal Code* i kler ki en Zanfan anba 14an, pa kapab ganny met dan prizon. En zanfan anba 14an pa kapab ganny met dan Prizon.

Me selman mon santi poudir i mank en ankadreman pou bann zanfan ki fer bann lofans par lao 10an. Ki nou pou fer avek sa bann zanfan?

Sa i en konsern ki *UNICEF* in deza fer resorti, ki Sesel nou napa en sant, pou nou ankadre, pou nou anmas sa bann zanfan.

Ti annan en propozisyon ki kot *APDAR* ti ete Amitié avan, ki la zot in retournen, ki nou ti kapab kekfw *subdivide* sa landrwa fer en bout pou fer en sant, pou bann manrmay avek bann problem konportman, bann *juvenile delinquent*, bann zanfan ki fer lofans.

Me sa landrwa pe ganny servi pou fer plito en Lakademi Lapolis, ki mon krwar li osi i en bon keksoz pou Praslin. Me mon santi poudir sa letan in arive, aköz Gouvernman avan pa'n fer provizyon pou en sant, pou en Sant Reabilitasyon, pou en Sant Detansyon, pou anmas sa bann manrmay, pou ankadre sa bann manrmay.

Akoz ou pa kapab met zot dan prizon.

Alor nou bezwen annan en lot landrwa pou nou anmas sa bann zanfan pou nou travay ek zot, pou nou ed zot. E reentegre zot dan lasosyete.

Akoz nou pa anvi ki zot grandi pou vin bann kriminel ouswa pou fer bann lofans pli sever dan lefitir. Kot i konsern difamasyon kriminel la ki i pe ganny retire dan *Code Penal*, i pou *still* annan provizyon anba *Civil Code* pou difamasyon sivil.

Savedir en dimoun ki santi en dimoun in dir en keksoz kont li ki'n gat son repitasyon, i kapab *still* anmenn en *case*, met en *lawsuit*, pourswiv en dimoun anba *Civil Code*.

So i annan en provizyon pou bann dimoun, zot kapab ganny en rekour si zot santi poudir en *dimoun* in fer okenn keksoz, *statement* difamatwar, ouswa in ekrir okenn keksoz difamatwar anver zot.

Mr Speaker i enportan pou nou site en pe kot nou ete ozordi koman en Nasyon, koman en pei. Laliberte lekspresyon i enn nou drwa fondamantal.

E ankor mon pou dir ki sa vre laliberte in vremen antre dan nou pei avek rezilta eleksyon 15 lo 10, an 2016.

Akoz, ou rapel tre byen poudir menm si apre retour Parti Inik in *still* annan bokou dimoun ki'n ganny oprese.

I *still* annan bokou dimoun ki'n ganny pini aköz zot lopinyon. E parey entervenans avan mwan ou'n dir. A plizyer repriz zot in, bann zournalis dan lepase.

Bann zournal lepase, 'Regar', 'Le Seychellois', zot in fer fas avek bokou difikilte. Aköz zot pe eksprim zot lekor, zot lopinyon, zot lapartenans politik.

Ouswa aköz zot pe fer bann serten kritik Gouvernman ki Gouvernman dapre zot, zot in servi sa Lalwa pou sey restrikte sa bann zournalis ki pe sey met o kler kekfwa ban labi ki pe arive dan Gouvernman, bann vol ki pe arive dan Gouvernman, bann *mismanagement of* larzan piblik.

E alor i enportan pou nou realize poudir se vreman atraver rezilta eleksyon 15 lo 10 ki'n anmenn sa nouvo souf dan nou pei. Ki ozordi menm *United Seychelles* pe zwir, pe *enjoy* sa laliberte pou zot kapab eksprim zot lekor ozordi.

Zisteman ozordi Mr Speaker, lontan kot ou ti pou war *SNP* sa letan, ouswa *SNM* ouswa okenn parti politik dan

lepase, ti pou ganny sa loportinite, pou zot eksprim zot lekor dan en *press conference*.

San okenn restriksyon, dir sa ki zot oule. Menm si zot pe *defame* dimoun *whatever*, zot koze, zot dir.

Zot annan sa liberte ki ozordi se travay ki *LDS* in anmennen, ki ozordi Mr Herminie avek son 2 zwer, son 2 *cowboy*, zot kapab dan sa *press conference* dir nenport e kwa.

Zot kapab envant nenport e kwa. E zot, an plis ki sa zot menm annan loportinite, i annan en *party political broadcast* ki ganny pase tou le mwan. Zot ganny ankor *airtime* pou zot kapab. Lontan ou ti napa sa loportinite, nouvel ti zis en kote.

E mon rapel poudir nou ti fer en protestasyon, zanmen mon pou bliye, mon ti ladan mon osi 'Onezime *OUT!*' Aköz, nouvel pa ti balanse.

E ozordi bann parti politik tou i relevan. I annan plizyer parti politik tou le mwan ki pe koze dan en *PBB*. Zot annan sa laliberte pou zot koze, pou zot eksprim zot lekor.

E zisteman, ozordi menm *Leader* Lopozisyon lo zot kote latab i servi sa loportinite ki'n ganny prezante avek li, kot si i annan en keksoz ki pas mal dan

Lasanble, ouswa en keksoz ki li i pa kontan, i pa satisfè, reportaz i apel *SBC* ankor dan son lofis.

I eksplik son lekor dan son fason ki i anvi eksplike. E ganny loportinite pou li al lo bann *state medium*, lo *state media*, lo *SBC*, pou li eksprim son lekor.

Konmsi ou'n war en revolisyon dan laliberte lapres Sesel, dan laliberte lekspresyon, kot ozordi, ozordi nou vwar vremen direksyon ki nou pei pe ale, en direksyon ki vremen, vremen bon. E Mr Speaker i enportan.

I pa kestyon ki Gouvernman pe tay avek en Lalwa parey mon'n dir. Sa Lalwa i l a depi pou 66an. E ozordi nou pei i bezwen met nou an konformite avek bann norm, bann Lalwa ek bann lorganizasyon enternasyonal parey *UN*, *UNISEF*, *IECD*.

E nou bezwen fer sa. Nou bezwen fer sir ki nou pei i an konformite avek bann Lalwa Enternasyonal. Akoz nou pa anvi dan problem demen, nou pa anvi vwar nou dan bann liv nwanr.

Nou pa anvi vwar nou ganny *blacklisted* parey nou'n deza ganny met lo lalis par *EU* ki la. Granmersi atraver travay ki nou Gouvernman in fer,

nou'n ganny tire lo lalis, lo, nou'n ganny tire lo *blacklist EU*.

Konmsi i annan en kantite ki nou Gouvernman pe fer ozordi, pou sir ki nou an konformite avek tou bann Lalwa Enternasyonal.

E alor Mr Speaker, mwan ler mon pe get sa bann lamannman ki devan nou, mon santi poudir i bann keksoz ki bon, ki pe al dan bon direksyon e ki pou ed nou pei progresè. Avek sa 2 mo mon dir ou mersi Mr Speaker.

MR SPEAKER

Mersi Onorab. Swivan Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi *VP*, *AG* avek lot Zofisye laba.

Mr Speaker mon pa ti anvi dir gran keksoz apre midi, me selman an mezir deba in ale, mon krwar mon santi mon oblize petet koz lo serten keksoz dan sa bann lamannman ki devan nou, pou met serten laklerte.

Penal Code i gran, i larz. Me parkont sa ki devan nou ozordi i serten lamannman dan serten provizyon *Penal Code*, ki petet Gouvernman in war li

petet pli nesaser, pli irzan pou fer serten sanzman.

Mon santi petet in osi annan lezot landrwa petet ki ti kapab annan lezot lamannman. Me mon oule koz apre midi, vitman Mr Speaker, lo 3 ou 4 keksoz.

Premye keksoz parey tou Manm Onorab in koz lo la, se sa zafer *criminal defamation*. Parey tou Onorab in dir, i vre, Konstitisyon 1993 i donn nou sa *freedom of expression*. E sa i enportan.

Mon krwar tou dimoun ki ti adopte nouvo Konstitisyon, ti adopte li avek tou son bann provizyon ladan, e tou son bann lespri ki vin avek.

E lekspresyon pou *freedom* pou kapab eksprim ou lekor, i enn tre enportan. E mon krwar i form parti dan nou *charter of human rights*. *Fundamental human rights* e i en drwa vreman, vreman, vreman enportan pou sitwayen.

Bokou ki'n ganny koze apre midi la, in koz lo *criminal defamation* dan bann ka kot, e bokou referans in ganny fer dan bann ka kot Gouvernman ki repres drwa sitwayen.

Me Mr Speaker osi annan lenstans ozordi kot Gouvernman pe kontinyen or pe sey siprim drwa lenformasyon avek lekspresyon. Mon a donn

en legzanp, petet pa sitan kler, me mon a donn en legzanp.

Par egzanp en zournalis, i poz en kestyon pou leklersisman, pou Lepep, pou tou dimoun konnen, i poz en kestyon Prezidan. Me Prezidan i dir li tenir i pe al en pti pe tro lwen.

Konmsi i dan bann sityasyon kot nou'n ariv 2021. Nou koz, e sirtou bann dimoun, bann Onorab lo lot kote latab, i kontinyen koz lo drwa lekspresyon, lo drwa lenformasyon.

E mon pe kont zot lo la mwan en. Mon dakor avek zot e mon swiv zot lo la. Nou tou isi nou dakor avek sa. Me nou bezwen osi, Gouvernman i bezwen viv par legzanp.

Zournalis i bezwen kapab demann kestyon e larepons i bezwen kapab ganny donnen, sirtou ler ou dan en post piblik.

Mr Speaker i osi annan sa size - nou pa'n koz lo la - me i annan sa size proteksyon sitwayen, kont bann lezot sitwayen malisyé. Si nou pe *rely* ozordi, nou pe dir nou pou tir *criminal defamation* e nou dir i annan ase provizyon ozordi pou kapab dil ek sa bann sityasyon.

E nou pe *rely* lo *civil defamation*, then Lalwa i

bezwen vin bokou pli sever. Mon krwar Onorab Georges taler Mr Speaker ki'n dir poudir pou annan en Lalwa ki pou vini konsernan *defamation*. Si mon'n konpran byen. Me letan sa Lalwa i vini, nou bezwen get li byen.

Nou bezwen fer sir ki i vin bokou pli sever an term pinisyon ki en dimoun i gannyen *or* sa ki *liable to pay* son viktim ler Lakour in war li koupab.

Akoz ozordi fasil si mon pa konnen, mon tro asire konbyen i ete. Dizon i R25 mil *or* bann *award* ki pe donner i en pe dan sa laliny, i fasil pou en dimoun ki kapab *afford* i deside denigre karakter dimoun, i ganny en pinisyon, i konnen i pa pou al dan prizon, i pey en konpansasyon son viktim, apre i kontinyen li.

So Lalwa i bezwen vin pli serye, pou nou protez osi sitwayen kont sitwayen. Ler en dimoun i konnen i pou al dan prizon, i tant pou li restrikte en pti pe en pti gin sa ki i dir *or* sa ki i fer, sirtou si i konnen, sa ki i pe dir, sa ki i pe fer, pa neserman laverite.

Se zisteman rezon Mr Speaker ki nou pe demande ki i annan plis konsiltasyon. I bezwen annan konsiltasyon,

akoz sa i en bann lamannman tre konsekan.

Vreman, vreman konsekan, ki konsern laliberte lekspresyon, ki konsern nou pep. E mon krwar ti devret petet deza annan en deba pli larz kot sitwayen i kapab eksprim zot lekor.

Akoz souvandfwa se sitwayen, bann *civil defamation* se sitwayen ki anmennen *against* sitwayen. Se sitwayen ki soufer difamasyon kont en lot sitwayen.

So sitwayen i bezwen kapab eksprim son lekor, dir ki mannyer li i santi e ki mannyer i krwar sa Lalwa i devret bouz devan. So Mr Speaker sa i mon bout konsernan *criminal defamation*.

Mon oule koz osi en pti pe lo, parey lezot Onorab, *age of criminal responsibility*. Pou sorti 7an, mon totalman dakor avek, akoz mon pe mazin mon prop zanfand, 7an i inosan, mon get li, *ok* i annan 8an. Mon get li, mon pa war li kapab fer serten keksoz.

Mon get bokou lezot zanfand, mon pa war zot petet kapab responsab pou serten keksoz. Konmsi zot annan sa linosans. Me parkont mon mazin, mon krwar poudir 10an Mr Speaker, mon krwar i ankor en pti pe tro ba.

Nou'n ganny diferan legzanp, bann diferan pei, i *range*, mon krwar *the average*, mon ti pe lir i apepre 12an, *the average* bann diferan pei, i apepre 12an.

Mon pwennvi mon krwar petet 12an, 12an ti ava *the right* laz pou nou met sa zafer *criminal responsibility* lo sa zanfan. Me i pa fini la.

Ler nou'n met *criminal responsibility* lo en zanfan 12an. I bezwen annan nesesite pou annan fasilite apropiye pou okenn zanfan ki ganny kondannen.

Ki demen bomaten zot pa al war zot dan en fasilite koreksyon avek lezot kriminel, avek lezot kalite, dimoun ki'n komet lezot kalite krim, ki kapab demen dan plas reabilite, sa zanfan i tonm li pli dan fon, pli dan fernwanr, pli dan krim ankor.

E ler i sorti, i al vin, i vin pli en problem pou sosyete ki nou ti pe sey *solve* sa sityasyon. So mon swete ki letan zot pe konsider sa, petet si nou kapab *up* en pti pe sa laz e fer li e fer li vin 12an.

Mon lot pwen ki mon ti oule koz lo la Mr Speaker, se, i pa'n ganny koz lo la ditou. E mon krwar in ganny war koman en *minor amendment* dan

Lalwa. Me sa se, si i annan pou fer avek *crypto currency*.

Akoz ki ozordi nou pe fer antre *crypto currency* dan nou *Penal Code*? Ki Sekter Finansyel, mon ti a kontan ki VP ouswa AG dan zot *summing-up* zot donn mon en larepons lo la. Akoz i vremen, vremen enportan.

Ki Sekter finansyel ozordi i panse lo la. E mwan mon pa vremen en dimoun legal. Me eski i annan, eski sa i kapab afekte nou an term *compliance* avek bann lezot lorganizasyon.

Ki manner lezot pei pou war nou si nou met sa dan *Penal Code*? Zis eksplik mwan en pti pe. Or petet eksplik lezot Manm, Lepep Seselwa, ki manner sa i antre ladan. Eski in annan konsiltasyon avek bann Sekter Finansyel?

Sekter Finansyel ki manner zot war pou *insert* sa zafer *crypto currency* dan nou *Penal Code*? Ki manner zot war li, eski i en keksoz pozitiv, ouswa i pou kree serten problem pou nou?

Eski - e petet la, petet AG, ouswa Onorab Georges osi koman *LGB* e koman en *homme de loi*, i kapab donn nou en legzanp. Eski i annan okenn ziridiksyon dan lemonn ozordi ki'n met sa provizyon dan zot *Penal Code*?

Eski i annan? Akoz nou, nou pe mete? Eski i annan en rezon, eski i annan en keksoz konmsi ki nou bezwen, ki i enportan ki nou met sa dan nou *Penal Code*? Mon lot pwen avan dernyen pwen, i sa *minor* pwen.

Me selman mon krwar i enportan fer sorti. Se sa definisyon '*slavery*' dan *Penal Code*.

Mon krwar lafason ki i ganny dekrir dan Lalwa ozordi, malgre Lalwa in ganny amande, malgre ki nou pe dir sa bann amannman se bann amannman progresif.

Ozordi *slavery* i modern. I desot e al pli lwen ki zis *ownership* en dimoun. Nou konnen dan letan lontan, *slavery* ti ganny dekrir kot en dimoun i propriyete en lot dimoun. Me ozordi *slavery* i bokou plis ki sa.

I mon pwennvi ki nou devret petet annan en amannman en pe pli progresiv. Par egzanp ou get bann dimoun ki fer *human trafficking*. Bann keksoz ki zot servi pou *coerce* sa bann dimoun or pou met presyon lo sa bann dimoun.

Mon dernyen pwen Mr Speaker, e mon pa anvi ki i vin en pwen kontansye dan Lasanble. Me selman mon krwar mon bezwen koz lo la.

Akoz personn pa'n koz lo la e ni menm mon krwar *VP* dan son lentrodiksyon pa'n koz lo la. Mon war nou'n fer antre en zafer *bomb hoax*.

Nou'n dir ki Gouvernman oparavan ti en Gouvernman ki ti per, me zanmen sa Gouvernman oparavan in war nesesite pou met sa dan *Penal Code*. Savedir akoz Gouvernman ozordi in war sa nesese pou antre dan *Penal Code*, eski zot per?

Or eski i annan en keksoz ki nesesite met sa zafer *bomb hoax* dan *Penal Code*? Eski i annan en keksoz pe vini? Eski, konmsi eksplik nou en pti pe akoz sa pe antre dan *Penal Code*.

E an *summing-up* Mr Speaker, sa i mon bann pwen ki mon ti a kontan, mon'n anvi koz lo la ozordi e ki mon'n anvi en leklersisman. E mon krwar ki an mazorite pep Seselwa osi ti ava kontan en leklersisman lo sa bann pwen.

So avek sa Mr Speaker, mon krwar mon pou aret la. Me selman mon krwar i enportan ki ganny eklersi, avan ki mon kapab fer desizyon vote, mersi.

MR SPEAKER

Mersi Onorab. Onorab Vidot.

HON AUDREY VIDOT

Mersi Mr Speaker. Bonn apre midi a tous. Mr Speaker zanfan i reste inosan, me i responsabilite sak paran e gardyen pou nou elev byen nou zanfan e ed li pou li konpran diferans ant sa ki byen ek sa ki mal a en tre zenn laz.

Mon komans koumsa, akoz malgre i annan zanfan ki'n komet lofans kriminel a en tre zennaz leparse, menm si Lasanble i aprouv sa lamannman dan sa Lalwa, Gouvernman i bezwen asire ki osi i annan striktir an plas pou travay avek nou bann zanfan.

Ki kapab komet okenn lofans pe enport zot laz, e ki annan sa bann striktir pou nou ankadre byen sa bann zanfan. Akoz nou konnen ki i annan pei ki annan bann striktir parey.

Nou bezwen mazine osi ki nou annan zanfan ki a en tre zennaz, ou kapab komans dekouver ki i annan en problem lasante mantal.

So i enportan ki pe enport laz nou zanfan, menm si i pe amann Lalwa an term laz ozordi, i enportan ki i osi annan bann striktir ki anmas zot.

Anmas zot, donn zot sa sipor moral e osi sa *counselling*, pe enport ki sikonstans okenn lofans ki'n kapab ganny komet. Me i osi reste enportan ki sa

bann zanfan i merit ganny tou sipor, parey mon dir.

Akoz ozordi dan nou sosyete Sesel, nou annan zanfan ki *at risk*, bokou *at risk* a en tre zennaz. Ki nou, bokou nou, nou konsernen lo zot bann konportman.

E bann aktivite ki zot pe angaz zot ladan a tre zennaz. E i annan menm ki pe ganny servi avek bann adilt pou fer bann aktivite kriminel.

So alors i enportan ki nou bezwen fer sir ki nou pe met bann striktir pou nou kontinyelman.

Apard ki wi nou ranforsi lo responsabilite, me osi ki mannyer nou kapab aport serten sipor ki nou zanfan. Menm si i pe al war i ganny amande, ki nou osi nou kontinyelman fer koudmen pou fer sir ki nou zanfan i vin bann bon sitwayen demen.

Mr Speaker, menm si lo nou kote latab, nou konnen nou, nou'n fini abitye ek sa, nou konpran. Ki letan nou fer serten pwen, ki atraver ou Mr Speaker, Onorab Woodcock i touzour konn pli byen lesplikasyon lo kwa ki nou, nou dir.

Si nou Manm in eksprim en keksoz, zis parey sa ki Onorab Aglae in koz lo la. Se ti rezon nou pe dir pa enportan

pou tay avek en Lalwa, se konsiltasyon.

Konsiltasyon i reste touzour en priyorite, en nesosite pou ki diferan parti i ganny sans donn zot pwennvi, donn zot kontribisyon.

Petet osi atraver nou, nou bann Manm parfwa letan nou pas nou bann deliberasyon, nou pli anrisir, e osi ki ler Gouvernman i finaliz anmenn pwen en Lalwa pou amande, sa bann pwennvi, sa bann lopinyon in ganny partaze.

Mr Speaker, kestyon ki bokou pe demande, eski LDS i vremen senser dan zot parol ler zot koz lo difamasyon? Eski zot pratik sa ki zot prese?

Akoz si mon rapel byen, in annan dirizan dan LDS ki ler zot partisip dan bann *rally*, oubyen mont lo rezo sosyal, dan *rally* nou konnen in deza arive.

Kot letan zot dir nenport kwa lo dimoun, apre ou tande zot pe ganny anmennen devan Lakour pou al pey en lansanm. Konmsi, responsabilite i bezwen konmans avek zot menm zot ki anvi nou piblik nou swiv.

Onorab Henrie atraver ou Mr Speaker, in koz for lo rezo sosyal, lo bann endividi ki ganny denigre, espesyalman nou bann politisyen. Sa mon

pou - ozordi mon pou dir li, mon toutafe dakor avek li.

Akoz zonm koman fanm politisyen i ganny ensilte, swa i annan i al lo *fake profile*. I annan menm bann, ki i annan ki zot in mansyonn non ozordi, ki'n menm pran portre nou bann Manm Lasanble, fer tou sort kalite fason propagann pou sey denigre karakter pou dir lo bann politisyen.

Apre nou oule nou bann zenn swiv nou koman bann dirizan pou fer pli byen, kan nou menm nou parfwa nou pa oule donn bon legzanp.

Zis bomaten ankor, mon konnen mon koleg Onorab Sandy Arissol atraver ou ankor enn fwa Mr Speaker, i kontan pas son, i kontan donn mon sa latansyon petet an term mansyonn mon non, i apresye lefe pou pas ankor bann komanter pou sey denigre mwan.

Konmsi Onorab Aglae, petet i *fancy* Onorab Labrosse en? *You never know*.

(laughter)

HON AUDREY VIDOT

Konmsi nou bezwen donn legzanp. Nou bezwen donn legzanp.

Mon swete ki Onorab parey ou'n dir, ou war mwan

2025, ou pa war ou pe tap ankor baro kot mon manman poudir ou pe vin rod mon pou dir en pti bonzour.

Me selman mon konpran, mon konpran akoz ou, ozordi akoz ou kontan mansyonn mwan. Mon apresye.

Mr Speaker, zis pou mon fer en pwen for atraver sa Lalwa ki devan nou ozordi, parey mon'n fer resorti bomaten, konsiltasyon i enportan. I enportan.

Nou bezwen valoriz e apresye bann diferan *partner* parey mon dir, ki swa bann NGOs, bann paran, bann manm piblik lo bann tel size.

Parey ankor mon koleg lot kote ti'n koz lo medya sosyal, lo bann medya ki nou bezwen annan bann responsabilite enportan, ki letan nou pe koz lo en dimoun oubyen nou pe, nou anvì eksprim nou lopinyon laliberte lekspresyon lo en dimoun. Me nou toultan fer li avek respe.

Ek respe dan le sans ki ou pa vin servi bann mo vilger, ou pa fer bann fo lakizasyon, ki apre ou pou war ou demen a lafen dizour se ou repitasyon ki ganny denigre e ou menm abes ou lekor koman sa endividi ki pe kritik sa lot.

Akoz ou pa realize poudir be sa dimoun, i annan dimoun

ki konn li, ki'n konn valoriz son personnalite ek son karakter. Ki pe enport ou bann negativite ki ou kapab sey anvoye lo li i pa pou zanmen ankadre. Akoz o kontrè i fer zot vin pli for.

Lo sa pwen, mon siport mon bann koleg, bann pwennvi ki zot in fer sorti lo sa kote latab. E mwan mon partaz lopinyon serten nou bann koleg isi anndan. Kot mon pa pou vot kont sa Lalwa, mon pa pou vot kont.

Me mon annan serten rezervasyon. Akoz i annan serten lenformasyon ki petet ti'n kapab pli byen detaye lo nou, *convince* nou vreman lo serten desizyon pou amann serten sa dan serten keksoz dan sa Lalwa. Mersi Mr Speaker.

MR SPEAKER

Mersi Onorab. Bon sa in termin deba lo sa *Bill*. Vis-Prezidan ou a kapab fer ou repons.

THE VICE-PRESIDENT AHMED AFIF

Mersi bokou Mr Speaker. Tou dabor mon ti a kontan remersye tou bann Manm Lasanble ki'n koze, ki'n fer zot entervansyon. I kler poudir bokou latansyon i viz ver 2 konponan lo sa *Bill*, se laz e difamasyon.

Mon krwar lo kote laz sa ki mon'n, ler mon'n ekout bann entervenans, i annan serten ki krwar poudir 10an i en pe tro ba. I annan lezot ki krwar i devret e mon'n tann sa sif 12an, konmsi i paret en pti pe pli rezonnab.

Mon oule asir tou bann Manm Lasanble ki ler sa sif ti ganny propoze ti annan diskisyon e ti annan konsiltasyon.

E PS Melanie e son tim ansanm avek tou bann dimoun lo tim legal, e ti fer bokou konsiltasyon. E ti annan menm bann Manm Lasanble ki ti ganny konsilte dan sa letan pou ariv lo en sif.

Me byensir i pa vedir aköz en sif i la e en lot dimoun i krwar i devret en lot sif, pa vedir pa'n annan konsiltasyon. In annan konsiltasyon. Mon krwar Lasanble i sa landrwa kot zot desid lo lezisasyon.

E personnelman mwan mon krwar poudir 10an, menm 12an tou lede i rezonnab. Selman mon pa *expert* ladan.

Me petet sa i kapab en size ki zot ava, si i annan en propozisyon pou fer li 11an oubyen 12an, zot ava kapab propoz li, petet dan Staz Komite.

Selman Gouvernman in santi dan nou konteks lokal isi

Sesel, 10an i en laz rezonnab, savedir en zanfan ki par lao 11an e 12an, i konn, i annan plis responsabilite, i annan plis konesans.

E alor i devret pli responsab. An se ki konsern difamasyon, ti annan ankor e mon ti a kontan remersi tou bann Manm ki'n koz an faver.

Nou fyer byensir koman en pei pou nou swiv legzanp lezot pei la demokrasi ki permet tou dimoun kapab eksprim son lekor san lafreyer. Byensir tou sa kalite lekspresyon i vin avek responsabilite.

Me selman ki nou pa fer li dan lafason ki i ti ete anba Lalwa avan. I annan en propozisyon ki dir, petet i devret annan en *Standalone Act*. Onorab Henrie ki'n koz lo la.

Gouvernman pa opoze avek sa, annefe dan *Civil Code* i dir ti annan en amannman ki ti pase, ki ti propoze ki si zanmen demen sa i annan en nouvo *Act*, alor se sa *Act* ki pou gid sa. Alor i en keksoz ki normal.

E Gouvernman i pare pou aksepte si i bezwen annan en lot *Act*. Annefe i annan en serten travay ki pe ganny fer pou zisteman annan en *Standalone Act* pou difamasyon.

Onorab Aglae ti mansyonn *fines*. E ti pe koz lo lamannman

lo 173A ki R25 mil. E mon kapab asir ou Onorab, se lentansyon se pa pou gard li *fix*, me pou donn sa diskresyon sa Ziz e Zidisyer pou zot aplik en *fine* ziska sa. Parske lamannman pe propoz li lo *level 2* dan *scale* bann *fine*. E alor si i pou donn diskresyon sa Ziz.

Ti annan en lot komanter ki konsern *crypto currency*. Rezon nou'n met *crypto currency* se pa ki ozordi i neseserman Gouvernman pe rekonnet *crypto currency*. I zis en provizyon ki la, ki si zanmen demen bann Lotorite Finansyel i rekonnet *crypto currency*, sa Lalwa i deza pare pou li, se sel rezon nou'n met li koumsa.

Mon kapab dir ou Onorab osi ki i annan serten diskisyon ki pe ganny fer lo nivo Labank Santral sertenman. Kot zot pe regard tou bann merit pou definir *crypto currency* e pou menm rekonnet *crypto currency*.

Parske i en *currency* ki pe ganny servi. E Sesel ki form parti larestan lemonn, e par ler ou pou ganny lezot pei ki pou fer referans avek en tranzaksyon ki'n pase Sesel, me swadizan dan *crypto currency*.

Alors si ou pa definir li ou pa rekonnet li. *Then* i fer li pli difisil pou sa bann pei dil avek Sesel lo sa nivo. Alors tousala

sa i en sofgard dan nou lezislasyon, dan sa lamannman ki nou'n pase, i senpleman i sofgard.

E o firamezir bann lotorite i desid si nou pou rekonnet *crypto* ou non, *then* nou'n konnen poudir nou'n pare dan sa lezislasyon.

Avek sa Mr Speaker, mon espere ki mon'n adres laplipar bann konsern ki i annan ozordi. Mon remerci tou bann Manm e mon espere nou kapab la ver en vot lo sa *Bill*. Mersi bokou Mr Speaker.

MR SPEAKER

Mersi Vis-Prezidan. Bann Manm a vot lo merit zeneral sa *Bill*. Manm ki an faver lev lanmen silvouple? *Ok* Madanm Clerk. Okenn Manm ki kont?

Alor *vote on the general merit of the Penal Code (Amendment) Bill, 2021, 24* Manm in vot pour, 0 kont e 3 abstansyon. Alor sa *Bill* in aprouve par Lasanble lo *general merit*.

E Madanm Clerk a fer *Formal Second Reading* silvouple.

MADAM CLERK

Mersi Mr Speaker. *A Bill for an Act to amend the Penal Code, Cap 158 to amongst other things, repeal criminal libel; to*

increase the minimum age of criminal responsibility from 7 to 10 years of age; to introduce the offence of bomb hoax; and to provide for matters connected therewith or incidental thereto.
Mersi Mr Speaker.

MR SPEAKER

Mersi Madanm Clerk. Dan versyon ki mon annan, mon war 2 pti amannman lo *Bill* Komite, ou pare pou sa? Nou a pas dan Staz Komite silvouple. Onorab Hoareau ou pou prezant rapor *Bills Committee*.

HON JOHN HOAREAU

Wi Mr Speaker. Bonn apre midi a tous ankor. Premyerman nou annan enn de pti lamannman Mr Speaker. Nou pou komans lo *the title of the Act* li menm.

‘A Bill for an act to amend the Penal Code, Cap. 158 to’, apre ‘to’ i vin en comma la, nou insert en comma. I kontinyen, *‘amongst other thing repeal criminal libel, nou tir sa ‘to’, ‘increase the minimum age of criminal responsibility from 7 to 10 years of age.’*

Aprezan nou ti sa ‘to’ apre sa. *Introduce the offence of the ‘bomb hoax’; and nou tir sa “to provide for matters connected therewith or incidental thereto.”*
Ok.

MR SPEAKER

E AG in sinyale mon krwar, wi. AG ou’n sinyale ki ou an lakor avek sa en? Kontinyen Onorab Hoareau.

HON JOHN HOAREAU

Nou pou al lo bann definisyon aprezan, bann lenterpretasyon. I annan Manm ki’n *flag out* sa mo ‘*vessel*.’ Ki son definisyon la, nou’n servi ‘*vessel*’ li menm pou *define ‘vessel.’*

So which means ki koman en prensip lengwistik ou pa servi en mo pou definir en lot, menm mo pou definir en menm mo. Dan son dezyenm, dan dezyenm fwa ki i servi sa mo dan sa fraz, ki i plito en *issue*. Son premye bout i lir koumsa.

‘Vessel means every description of a vessel in navigation.’ Sa i ok. *‘Whether self-propelled or not and includes aircraft, barges, jet skis, seaplanes and other similar craft,’* la ‘*and vessel.*’

Si nou ti kapab servi en sinonim pou ranplas sa. Sa in ganny demande pou *flag lo the floor*.

MR SPEAKER

Yes AG ou ava adres sa. Ou an lakor AG? Mikro.

**THE ATTORNEY GENERAL
FRANK ALLY**

Mersi Mr Chairman. Mr Chairman nou demande petet ki sa mo i ganny kite parey. Anfet nou'n pran sa definisyon dan *Defence Act*. So i pa, wi, dan *SPDF Act*.

So nou kapab kit li parey. Mon pa krwar poudir i pa a servi mo dan en sel definisyon, i poz en problem. Anfet si nou pe servi en mo ankor, en mo ki i ganny definir, *then 1 will take son ordinary natural meaning* e lot i ava pran.

Par egzanp la *vessel*, i ava *mean the vessel as define*. *The vessel* ki dan sa mo li i a pran en *ordinary natural meaning* ki normalman nou pou definir *vessel*. Mersi. E parey *Bills Committee* in dir, *it means a ship or a large boat*. Mersi.

MR SPEAKER

Mersi. Avan, letan nou lo definisyon, mon pa konnen si mon'n mal tap lo en keksoz. Me regard definisyon *slavery, to the right?* Eski i annan en 'of' ki manke la.

Akoz dan pou mwan i manke, me selman i posibil avek sa bann dokiman *word*, ou pa konnen si annan de ler, ler ou pe lir ou'n tire. '*Attaching to the right of ownership*'. 'Ale, dir

mwan si i la, '*of ownership*.' Si i pa la, nou a *insert* li.

Yes Onorab Hoareau, ou kapab kontinyen.

HON JOHN HOAREAU

Wi, mon krwar i devret en '*of ownership*', wi. Mersi Mr Speaker.

MR SPEAKER

Atann en pti moman, Onorab Georges i annan en pwen ki mon krwar i ankor lo sa seksyon. Onorab Georges ou'n parey?

HON BERNARD GEORGES

Wi Mr Chair. Annefe non, mon pa ti pe vin lo la. Me kekfwa nou kapab retourn lo la en pti kou.

Mon ti anvi zis *for the sake of completeness*, Onorab *Bills Committee*, Onorab Hoareau, akoz Lasanble ki pe pas sa Lalwa, alor nou bezwen tonm dakor lo li. Dan *Clause 1*, dezyenm laliny *right at the end*, i annan en *comma* apre *which*.

Dan *Clause 2 (a)* dan dezyenm laliny '*banks notes*', pou tir sa 's'. *Obviously* en *typo*. E dan *d*, *by inserting*, apre *inserting* ti annan en *comma*. *Just for the sake of completeness*.

MR SPEAKER

Nou a zis tyeke si AG in sezi sa bann sizesyon. Korek? Byen. Onorab Hoareau ou a kontinyen.

HON JOHN HOAREAU

Mersi Mr Speaker. Lo trwazyenm *Clause*, kot i lir koumsa, “*section 15 of the code is amended by repealing the words “seven years” and substituting, therefor the words “10 years”.*

Mon koleg Onorab Andre ki pa avek nou i ti sizere ki nou bezwen *maintain* serten *constituency*. Alors in ekrir, si dan son *original Act* in ekrir *seven years in words*, pe demande si nou kapab ekrir li *ten years in words*.

MR SPEAKER

Onorab Georges *yes*, lo sa pwen. Ankor enn fwa Mr Chair, bann dimoun ki konn mwan, i konnen ki mon pti non i Onorab *comma*.

Mon retourn an aryer lo *virtual currency*, dan dernyen laliny apre *territory*, i annan en *comma, including Seychelles*. E mon pa konnen, mon mazine, mon ava les *Legal Draftsperson* reponn Onorab Hoareau.

Me koman mon annan laparol, mon krwar ki *drafting techniques* e ler en *figure* i annan en *single figure*, i, ou

ekrir li *in words*. Me ler i annan *2 digits or more* ou met li in *figures*. Me mon pa konnen si, se sa, sa teknik ki *Legal Draftsperson* in servi dan sa ka.

MR SPEAKER

AG.

THE ATTORNEY GENERAL FRANK ALLY

Anfet mersi Mr Chairman. Anfet wi sa i le ka. E anba sa *Law revision project* ki nou pe fer, nou pe al adopte plito sif *rather than words, when it comes to* parey bann santans. Mersi.

So this is why, petet, menm si i kapab annan enkonstan avek *Penal Code*, me ler nou pou fer revizyon, sa pou ganny fer. Akoz *Penal Code* osi parey ou’n vwar, sanmenm sa nou pe prezant sa *Bill*, akoz i *part and parcel of the Law revision project*. Mersi.

MR SPEAKER

Mersi AG. Onorab Hoareau nou kapab aksepte sa e ou a *move on*.

HON JOHN HOAREAU

Yes, nou *move to Clause 12, section 52*, i devret retir 52 pou met 123. *Ok*. Nou al lo 18, *Clause 18, (2)*. ‘*A person who*

communicates to another person' pou ganny mete.

'Any information, which that persons knows or believes to be false.' La prezan nou pou retir *'to another person.'* Apre nou al lo -

MR SPEAKER

Nou a poz en pti moman. AG nou kapab kontinyen? Ok, kontinyen Onorab.

HON JOHN HOAREAU

... nou al lo 3. *"For an offence under section (1) or (2), it is not necessary for the offender to have any particular person in mind as the person in whom, the offender intends to-*

La nou introduce the word "induce the belief or false belief." Full stop.

MR SPEAKER

Korek, yes Onorab, kontinyen. Yes Onorab Georges.

HON BERNARD GEORGES

Mersi Mr Chair. Mr Chair ankor enn fwa si nou retourn lo *subclause 2* dan trwazyenm laliny i annan en mo *'in'* ki pou ganny *inserted ant' inducing'* ek *'any.'* Mersi.

I dan zot *track version* mon krwar. AG ou ok, korek Onorab Hoareau, *proceed.*

HON JOHN HOAREAU

Ok nou al lo 4, subclause 4, "a person who commits an offence under this section is liable to a fine of level 4 on the standard scale or to imprisonment for 5 years, comma i vini, "or to both such fine and terms of imprisonment."

MR SPEAKER

Yes. Korek Onorab Hoareau.

HON JOHN HOAREAU

Mr Speaker mon krwar se tou ki'n ganny *point out* lo sa kopi dokiman ki avek mwan. Mon demann en pti pe leskiz si i annan ki bann pti *'in'* ki mon pa'n vwar.

Akoz for the reason ki sa i pa'n tro aparet lo mon kopi an term son lank, pa'n tro, pa tro sorti byen. Mersi.

MR SPEAKER

Mersi. Okenn lot amannman oubyen klarifikasyon *on the floor?* Non, si napa nou a retourn dan Staz Lasanble.

E mon a demann Onorab Georges, *Leader of Government Business* pou fer *Third Reading.*

HON BERNARD GEORGES

Mersi Mr Speaker. Mr Speaker anba *Order 71(1)*, mon

move ki *the Penal Code (Amendment) Bill, 2021, as amended* i ganny lir en Trwazyenm Fwa. Mersi.

MR SPEAKER

Mersi. Nou a ganny segonnman. Onorab Arissol.

HON SANDY ARISSOL

Mersi Mr Speaker, *as amended* i ganny seconde. Mersi.

MR SPEAKER

Mersi. Nou a pran vot lo *Motion for Third Reading*. Manm ki an faver lev lanmen silvouple. Okenn Manm ki kont? Mersi Madanm Clerk.

Lo vot lo *Formal Third Reading of the Penal Code (Amendment) Bill, 2021 as amended*, 24 Manm in vot pour, 0 kont e 3 *abstain*. Alor sa *Bill* in pase par Lasanble lo *Third Reading*. Madanm Clerk a fer *Third Reading please*.

MADAM CLERK

Mersi Mr Speaker. *This Act may be cited as the Penal Code (Amendment) Act, 2021, and shall be read and construed as one with the Penal Code, Cap. 158, which as amended, is hereinafter referred to as the "Code"*. Mersi Mr Speaker.

MR SPEAKER

Mersi. Alor sa *Bill* in vin *Act* e i a vin an fors *upon assent of the President*. Bon, mon krwar nou a bezwen termin la pou ozordi.

Vi ki ler in ase avanse, mon a remersye bann Manm pou zot partisipasyon e mersi Vis-Prezidan pou, mon krwar ou'n pas en bon pe letan sa semenn avek nou. Mersi AG e Madanm *Legal Counsel*. Nou aret la e nou a rebran travay Mardi prosen 9er. *Adjourn*.

(ADJOURNMENT)